

ივანე ჯავახიშვილის სახელობის თბილისის სახელმწიფო უნივერსიტეტის
ჰუმანიტარულ მეცნიერებათა ფაკულტეტი

სამაგისტრო პროგრამა ქართული ლიტერატურა

სალომე სუხიაშვილი

„სხვა ქვეყანა“ ქართულ ფოლკლორში

ნაშრომი შესრულებულია ქართული ლიტერატურის მაგისტრის
აკადემიური ხარისხის მოსაპოვებლად

ნაშრომის ხელმძღვანელი: ხვთისო მამისიმედიშვილი,
ფილოლოგის დოქტორი, თსუ ასოცირებული პროფესორი

თბილისი

2019

ანოტაცია

ფოლკლორისტიკაში ერთ-ერთ უაღრესად მნიშვნელოვან და პრობლემურ საკითხს ხალხური ნაწარმოების სივრცის თემა წარმოადგენს. ეპიკური ჟანრის ტექსტებში ძირითადი მოქმედებები ხდება ადამიანთა ჩვეულებრივი საცხოვრისიდან შორს, ე. წ. „სხვა სამყაროში“.

სამაგისტრო ნაშრომში განვიხილეთ ქართული ზეპირსიტყვიერების ის ნიმუშები, რომლებშიც აისახა „სხვა ქვეყანა“ და „მიღმურ სამყაროს“ ბინადართა ცხოვრება. ფოლკლორულ შემოქმედებაში „სხვა სამყაროს“ თემა იმდენად პოპულარული აღმოჩნდა, რომ მან შეაღწია როგორც მწერლობაში, ასევე ფილმოგრაფიაშიც. ამ მხრივ გამოირჩევა შორეული აღმოსავლეთის ქვეყნები, რომლებიც ამ თემაზე ქმნიან მანგებს ე.წ. კომიქსებსა და ანიმაციურ ფილმებს - „ანიმებს“.

კვლევის შედეგად, ფოლკლორულ ტექსტებში გამოიკვეთა ბინალური ოპოზიცია: სამოთხისებური და ჯოჯოხეთური ყოფა, საკრალური და დემონური სივრცე, როგორც „სხვა სამყაროს“ გამოსახვის ერთ-ერთი საშუალება. ეპიკურ გმირს გადაადგილება უხდება და ზოგჯერ ის აღმოჩნდება ადამიანთა საცხოვრისიდან შორს: საიქიოში, წმინდა ადგილზე, ღვთაებრივ არსებათა გვერდით, დემონურ არსებათა შესაკრებელში და ზღაპრულ სივრცეში, რომელიც ყველაზე დიდი მრავალფეროვნებით არის წარმოდგენილი ზეპირსიტყვიერებაში.

ნაშრომში არ შემოვთარგლულვარ ქართული ფოლკლორის მხოლოდ ერთი რომელიმე ჟანრის ტექსტებით. გარდა ამისა, ნაშრომში გამოვიყენე ოსური და ჩეჩნური ეპიკური ტექსტებიც, რადგან კვლევამ აჩვენა, რომ „სხვა“ სამყაროს თემაზე შექმნილ ქართულ ზეპირსიტყვიერების ნიმუშებს მნიშვნელოვანი პარალელები მოეპოვება ჩრდილოეთ კავკასიის ხალხთა ფოლკლორულ შემოქმედებასთან. სამაგისტრო ნაშრომში გავაანალიზე, აგრეთვე, თბილისის სახელმწიფო უნივერსიტეტის

ფოლკლორის არქივში დაცული ტექსტებიც. გარდა ამისა, მოვიძიე მნიშვნელოვანი პარალელები შორეული აღმოსავლეთის ხალხურ ტექსტებთან.

Annotation

One of the most important and problematic issues in folklore studies is the topic of folk work space. In epic genre texts, main actions are happening far from the ordinary living space of humans, in so called "other world."

In my MA's work, I discussed such folklore works in which action is happening in "another world" and lives of people of "beyond world". The theme of "other world" in folklore was so popular that it penetrated both literature and filmography. Countries of Far East Asia are distinguished in this respect, they create "mangas", so called comics and animated films - "animes".

Research of folklore works gave banal results: paradise and hell, sacral and demonic space, are one of the means of depicting "other worlds". The hero of Epic work has to move around and sometimes he finds himself far away from peoples' normal living space: In afterworld, in the Holy Place, beside the divine beings, in the hallmark of demons and in the fairy tale, which is represented by greatest diversity of oral telling.

The work is not limited to the words of one of the genres of Georgian folklore. Besides Georgian, I used Ossetian and Chechen epic texts, as the study has shown that the samples of Georgian oral artifacts on the "other" world have significant parallels with the folklore of the peoples of the North Caucasus. In my master's thesis, I also used the texts preserved in the folk archive of the Tbilisi State University. In addition, I found important parallels with the folk texts of the Far East.

სარჩევი

| | |
|----------------------------------------------------------------------------------------------------|----|
| შესავალი..... | 6 |
| I თავი | |
| სამოთხისა და ჯოჯოხეთის მოტივი ქართულ ლიტერატურაში და მისი ფოლკლორულ- მითოსური პარადიგმები | 8 |
| 1.1. მაყვლოვანი | 10 |
| 1.2. მგელი „კარაულთა“ მწყემსად | 12 |
| 1.3. ირემი - წმინდანთა და უფლისწულთა მკვებავი | 15 |
| 1.4. ჯოჯოხეთური დრო-ჟამისა და სივრცის რეპრეზენტაცია ქართულ აგიოგრაფიაში | 17 |
| II თავი | |
| სამოთხისებური სივრცე მითოლოგიურ გადმოცემებში | 20 |
| 2.1. დაკარგული და საფარველდადებული საკრალური სივრცე | 21 |
| 2.2. საიდუმლო სამალავები | 26 |
| 2.3. საკრალურის დაარსება | 28 |
| 2.4. საკრალური ადგილები, რომლის აღმოჩენაშიც რჩეული ადამიანები მონაწილეობენ | 33 |
| III თავი | |
| დემონურ არსებათა სამოქმედო სივრცე..... | 36 |
| 3.1. ქაჯავეთი | 37 |

| | |
|-----------------------------------------------------------------------|----|
| 3.2. ნაძრახი ადგილები | 42 |
| 3.2.1. წიქვილი | 43 |
| 3.2.2. ხიდი | 45 |
| 3.2.3. კაკლის ხე | 46 |
| 3.3. ტაბაკონის მთა და აჩხოტის მინდორი დემონოლოგიურ გადმოცემებში | 48 |
| IV თავი | |
| საიქიოს რეპრეზენტაცია ხალხურ ტექსტებში..... | 55 |
| 4.1. სამოთხის მითოსური სახე ქართულ პოეზიაში | 55 |
| 4.2. ჯოჯოხეთის მითოლოგემა ქართულ ფოლკლორში..... | 64 |
| V თავი | |
| „სხვა სამყარო“ ქართულ ხალხურ ჯადოსნურ ზღაპრებში | 73 |
| დასკვნა | 86 |
| გამოყენებული ლიტერატურა | 89 |

შესავალი

სამაგისტრო ნაშრომი ეხება სივრცის პრობლემას ხალხურ ნაწარმოებებში. ნაშრომში განვიხილეთ ისეთი სიუჟეტები, რომლებიც ასახავენ პერონაჟთა მოქმედებას ჩვეულებრივი ადამიანური სამყაროდან განსხვავებულ სივრცეში. „სხვა“ / „მიღმა“ სამყარო/ სამეფო, უცხოურ სამეცნიერო ლიტერატურაში ცნობილია როგორც „The Other World“-ის ან „Иное“, „Небывалое“, „Тридцатое“ სახელმწიფოს სახელით. ნაშრომში მოვიაზრებ, აგრეთვე, ისეთ ვირტუალურ სამყაროს, სივრცეს, რომელშიც გვხვდება ადამიანთა ყოველდღიური ყოფისგან განსხვავებული სივრცე, ან ისეთი სამყარო, რომელიც არცერთ გეოგრაფიულ რუკაზე არ არსებობს (მაგალითად, საიქიო, ქვესკნელი, ქაჯავეთი, ჯვარ-ხატთა შესაკრებელი) და ადამიანს უწევს იქ ზებუნებრივი საშუალებებით მისვლა, როგორც ეს ხდება ზღაპარში. „სხვა სამყარო“, რა თქმა უნდა, სხვადასხვანაირადაა წარმოდგენილი მითოლოგიურ გადმოცემებში, ხალხურ ლექსებსა და ზღაპრებში. კვლევისას ხალხურ ნაწარმოებებში გამოვყავი სივრცული თვალსაზრისით განსხვავებული ადგილები, მოვახდინეთ მათი კლასიფიკაცია და გავარკვიეთ მათი საზრისი. ასევე კვლევის პროცესში ქართული მასალის გარდა გამოვიყენეთ კავკასიის ხალხთა, კერძოდ, ჩეჩნური, ინგუშური, ოსური ხალხური ტექსტები და რწმენა-წარმოდგენები. საკითხის კვლევისას ვიხელმძღვანელებთ კომპარატივისტული და ისტორიულ-მედარებითი მეთოდით.

თემის წერის პროცესში შევისწავლე როგორც ქართული, ასევე უცხოენოვანი ფოლკლორული სამეცნიერო ლიტერატურა და გამოვიყენე ინტერნეტ-რესურსები. ნაშრომში განვიხილეთ სხვადასხვა ჟანრის ფოლკლორული ნაწარმოებები, ქართული ხალხური პოეზიის მრავალტომეულში დაბეჭდილი ლექსები, აღმოსავლეთ და დასავლეთ საქართველოს მითოლოგიური გადმოცემები, ჩრდილოეთ კავკასიის ხალხთა თქმულებები ნართ გმირებზე. ასევე ქართული ხალხურ ზღაპრები, ძველი ქართული ლიტერატურის ძეგლები და ფოლკლორის არქივში დაცული მასალები.

ფოლკლორულ ტექსტებში „სხვა ქვეყანის“ განხილვით დავინტერესდი, რადგან „სხვა სივრცის“ საზრისი, როგორც ხალხური მანარმოების სტრუქტურული ერთეულის

როლი, სამეცნიერო ლიტერატურაში საგანგებოდ ჯერ არ დამუშავებულა. არსებობს ცალკეული უანრის ტექსტების ქრონოტოპის დახასიათება. „სხვა სივრცის“ კვლევისას მეცნიერები ყველაზე მეტად საზღაპრო უანრით დაინტერესდნენ, რადგან „სხვა ქვეყანა“ ისე მძაფრად და მრავალფეროვნად სხვაგან არსად არ არის წაროდგენილი, როგორც ზღაპარში. ზღაპარში ყველაფერი იწყება მაშინ, როცა გმირი გადის სახლიდან. რადგანაც მისი სამყოფელი ეს არის არადინამიკური სივრცე, სადაც არაფერი ხდება, არ მიმდინარეობს დროის ცვლილება. დროის ათვლა კი იწყება მას შემდეგ, როცა ის მოხვდება სხვა სამყაროში.

რას წარმოადგენს ზღაპარში დრო და სივრცე? ამაზე მეცნიერებს სხვადასხვა მოსაზრებები აქვს. ზ. კიკნაძის აზრით, ზღაპრის დრო და სივრცე ერთიანია, განუსაზღვრელი და უსახელო, ისევე როგორც ზღაპრის მთავარი გმირია უსახელო (კიკნაძე 2007:90). ზღაპრების ანალიზის საფუძველზე შეგვიძლია ვთქვათ, რომ სივრცე რომელშიც გმირი მოძრაობს, მოიცავს მთელ ზღაპრულ სამყაროს. იგი მოძრაობს როგორც შუასკნელში, ასევე ქვესკნელსა და ზესკნელში და როგორც ზღაპრის ქართველი მკვლევარი რ. ჩოლოყაშვილი წერს, ამ სამ განზომილებაში გმირის მიმოსვლა იგივეა, რაც მიმოსვლა ცოცხალთა და მიცვალებულთა სამყაროებს შორის (ჩოლოყაშვილი 2004:69).

რა ხდება ამ მხრივ სხვა ფოლკლორული უანრის ნაწარმოებებში, მაგალითად მითოლოგიურ გადმოცემებში. სხვა სივრცე თუ ზღაპარში ვირტუალურია, გაურკვეველია, მითოლოგიურ ტექსტებში მას აქვს კონკრეტული მდებარეობა და ეს შეიძლება იყოს აჩხოტის ველი, ტაბაკონის მთა. ოსური რწმენა-წარმოდგენებით დემონურ არსებათა შეკრების ადგილს ჰქვია ქურისი/ ბურქუსი. ან ეს განსხვავებული სივრცე შეიძლება წარმოდგენილი იყოს ღვთისშვილების შეკრების ადგილით, ამას ქვემოთ ვნახავთ, ან ძუარების შერკების ადგილი. მაგალითად, როდესაც ღვთაებები სოსლანს ასაჩუქრებენ. ამ დროს ყველა ღვთაება იკრიბება ერთად, მართავენ ნადიმს.

ქართულ ხალხურ პოეზიაში კი ეს სხვა სივრცე, წარმოდგენილია საიქოს სახით, სადაც გმირები მოგზაურობენ მხოლოდ სიზმარში. არ ვიცით ის ტერიტორიულად სად მდებარეობს, თუმცა მას, თუ როგორა არის მონყობილი, ხალხური ტექსტები

თვითმხილველთა ნაამბობით გადმოგვცემენ. სხვა სივრცე, „სხვა ქვეყანა“ გვხვდება ქართულ აგიოგრაფიულ ნაწარმოებებში.

| თავი

სამოთხისა და ჯოჯობეთის მოტივი ქართულ ლიტერატურაში და მისი ფოლკლორულ-მითოსური პარადიგმები

სამოთხისა და ჯოჯობეთის თემა აქტუალურია ზეპირსიტყვიერებაში. ადამიანს, ერთი მხრივ, ცხოვრება უნევს დაცემულ ნუთისოფელში, ხოლო, მეორე მხრივ, არსებობს „სხვა“ სამყარო, რომელიც არცთუ იშვიათად გვხვდება ბიბლიურ-სასულიერო ლიტერატურასა და ფოლკლორულ ნაწარმოებებში. ბინალური ოპოზიცია, სამოთხე და ჯოჯობეთი, ზოგჯერ მთავარ თემას წარმოადგენს როგორც მითოლოგიურ გადმოცემებში, ასევე წმინდანთა ცხოვრების ზოგიერთ ეპიზოდში. რ. სირაძე მიიჩნევდა, რომ აგიოგრაფიამ და აგიოგრაფიულმა გმირებმა მითოლოგიიდან ისესხეს ისეთი ელემენტები როგორცაა ზებუნებრივ ძალთა ფლობა, რადგანაც მითოსურ გმირთა ზებუნებრიობას მათი ფიზიკური ძალა განაპირობებდა. აგიოგრაფიამ ფიზიკური ძლიერების კულტი ჩაანაცვლა სულიერი ძლიერებით, რამაც აგიოგრაფიულ გმირს მიანიჭა სულიერი სასწაულმოქმედების უნარი (სირაძე 1982:86), ამიტომაცაა, რომ აგიოგრაფიული ნაწარმოების მთავარი გმირი მხოლოდ იდეალური ადამიანის განსახიერებაა, რომლის ცხოვრებამაც მომხდარი ცვლილებები, პრობლემები დამხმარე მასალაა, რათა ისინი იქცნენ სახე-იდეებად და არა სახე-ხასიათებად (სირაძე 1982:88). ასეთ დროს წმინდანი ერთ საერთო იდეას ემსახურება, რომელთათვისაც ცხოვრებით ტკობა არაფერია. წმინდანი თავისი ცხოვრებით ცხადყოფს თავის შინაგან ძალას, რწმენის სიძლიერეს (სირაძე 1987:15), რასაც მივყავართ იქამდე, რომ მათ ცხოვრებაში ვხვდებით სამოთხისებური ყოფის ანარეკლს, რომელსაც ადამიანებს სიწმინდის კლების შედეგად გაუქრათ.

მაშასადამე, ამ თავში განვიხილავთ სამოთხისა და ჯოჯობეთის მითოსს ქართულ ჰაგიოგრაფიაში, როგორაა ის წარმოდგენილი წმინდანთა ცხოვრებაში.

1.1. მაყვლოვანი

ავიოგრაფია და მითოლოგია რომ ზოგჯერ ერთად თანაარსებობენ ამის კარგ მაგალითს გვაძლევს „წმინდა ნინოს ცხოვრება“. როგორც რ. სირაძე წერდა, „ნინოს ცხოვრებაში“ შეჭრილია მითოსური ნაკადი, ქრისტიანული მოდელირებით, ხან კიდევ პირიქით (სირაძე 1987:81).

სამოთხის მოტივი „წმინდა ნინოს ცხოვრებაში“ წარმოდგენილია სამეფო ბაღის ეპიზოდით. აქ ბალი გადააზრებულია ედემად. წმინდა ნინომ ქართლში მოსვლისას, არმაზის კერპის დამსხვრევის შემდეგ, სამეფო ბაღში დამკვიდრებამდე ნახა ჩვენება. „და სამგზის ვიხილე ჩუენებასა შინა მცირედსა მას მირულებასა ჩემსა მუჯლთა ზედა, მოვიდიან მფრინველნი ცისანი, შთავიდიან მდინარესა, დაიბანნიან და მოვიდიან სამოთხესა მას, და ბაბილოსა მას მოისთულებდიან და ყუავილსა მას ძოვდიან, და მოწლედ ჩემდამო ლალადებედ, რეცა ჩემი არს სამოთხეჳ იგი. გარე მომადგიან უღავილით და ჳმობედ ჩემდა მომართ მრავალფერად“ (აბულაძე 1963:123).

სამეფო ბალი არ არის ჩვეულებრივი გეოგრაფიული სივრცე, ის წარმოდგენს საკრალურ სივრცეს, სადაც წმინდა ნინომ უნდა აღასრულოს თავისი სასწაულები. ძველ აღთქმაში სამოთხის ბალი შემდეგნაირადაა აღწერილი: „უფალმა ღმერთმა ბალი გააშენა ედემში. აღმოაცენა უფალმა ღმერთმა მიწიდან ყოველი ხე, სანახავად საამო და საჭმელად ვარგისი, შუაგულ ბაღში კი ხე სიცოცხლისა და ხე კეთილის და ბოროტის შეცნობისა. მდინარე მოედინება ედემიდან ბაღის მოსარწყავად, მერე იტოტება და იქმნება ოთხი ნაკადი“ (დაბად.2:8-10).

„ნინოს ცხოვრებაში“ სამეფო ბალი, სამოთხედაა გააზრებული, რასაც რ. სირაძე მიიჩნევდა ტიპიურ ქრისტიანულ სიმბოლიკად, ხოლო წარმართობასთან აკავშირებდა ფრინველებს და მათ საქციელს. ფრინველები თავისი ქცევით ნინოს უთმობდნენ ბაღს (სირაძე 1987:85). საინტერესოა, რატომ აკავშირებს რ. სირაძე ფრინველებს წარმართობასთან. ამასთან დაკავშირებით შეიძლება მხოლოდ ვივარაუდოთ, ასე იმიტომ ფიქრობდა, რომ ძველი რწმენა-წარმოდგენებით სამყარო დაყოფილია სამ სკნელად: ზესკნელად, შუასკნელად, ქვესკნელად და არსებობენ ისეთი ფრინველები,

რომლებიც ამ სამივე სკნელში გადაადგილდებიან, მაგალითად ფასკუნჯი. ასევე უნდა გავიხსენოთ, რომ ბაბილო, რომელსაც ავტორი „მოქცევაჲ ქართლისაჲში“ ახსენებს, სულხან-საბა ორბელიანის განმარტებით, არის ხის ვენაჯი, ან გრძელი ვაზი (ორბელიანი 1991:87). მითოლოგიაში კი ვაზი ღვთაებრივი მცენარეა და იგი უკავშირდება დიონისეს კულტს, ხოლო რ. სირაძე წიგნში „ქართული კულტურის საფუძვლები“, წერს რომ ვაზი ქართველთა წარმოდგენით იყო „სიცოცხლის ხე“ (სირაძე 2000:148).

წმინდა ნინო, სანამ ნახავდა ჩვენებას, რომელიც განუცხადებდა, რომ სამოთხის ბალი მისია, ნინომ იხილა ჩვენება: „ჩუენებით ვხედევდ, მოვიდა კაცი ნათლისა ფერი და მრქუა მე: „სამოთხესა შევედ, ნაძუთა ქუეშე ბაბილოთა ადგილი არს მცირე საყუარელად შემზადებული, მიწაჲ აღილე ადგილსა მისგან და შეაჭამე კაცთა მაგათ, და ესუას შვილი“ (აბულაძე 1963:123). სხვა ვარიანტში ნაძვის ნაცვლად გვხვდება კვიპაროზი: „ხოლო ხე იგი იყო კვიპაროზი და ქვეშე მისსა - მრავალფერი ყვავილი“ (ქართული პროზა 1981:197). კვიპაროზი/ნაძვი აქ უნდა გადავიაზროთ, როგორც ცისა და მიწის, როგორც სხვადასხვა სივრცის კავშირი. ცისა და მიწის კავშირს ქართულ ფოლკლორში, კერძოდ, ხევსურულ გადმოცემებში გამოხატავს მირომდინარე ხმალას ალვის ხე და ფშაურ თქმულებებში ოქროსშიბიანი ლაშარის მუხა. ეს ალვის ხე ძალიან მაღალი იყო და მას მირონი გადმოსდიოდა. ალვის ხეს ძირში დარანი ჰქონდა და ხიდან გამოსული მირონი იქ მდგარ სამ ქვევრში ჩადიოდა. ალვის ხეზე ღვთისშილებსა და ანგელოზებს გაბმული ჰქონდათ ოქროს შიბი და იმაზე დადიოდნენ. ეს რომ ცისა და მიწის კავშირი იყო, მტკიცდება იმით რომ ალვის ხე ზურაბ არაგვის ერისთავმა მოაჭრევინა, მას შემდეგ რაც ხეს კატის სისხლი წაუსვეს, მაშინ ღვთისშილები აეხსნენ/ მიატოვეს ჯაჭვი და „გაბმული ოქროს შიბი მოწყდა და მაღლა ცაში წავიდა. როცა მიდიოდა, შიბი ისე ხმამაღლა წიოდა, რომ მთელმა ხევსურეთმა გაიგონა“ (ანდრეშები 2009:13-15).

ბაღში, სადაც ნინომ დაიღო ბინა, კვიპაროზის ხესთან იდგა მაყვლის ბუჩქი, რომელიც კვიპაროსზე იყო გადასული და ფარავდა მას. ამ მაყვლოვანში დაიღო ბინა წმინდა ნინომ და იქ ლოცულობდა და კურნავდა ხალხს. მაყვლოვანს ბიბლიაში საკრალური დატვირთვა აქვს: როდესაც მოსე თავისი სიმამრის ცხვარს მწყემსავდა იგი მიადგა ღვთის მთას, მას „გამოეცხადა უფლის ანგელოზი ცეცხლის ალად შუაგულ

მაყვლოვანში. ხედავს უკიდია მაყვლოვანს, მაგრამ არ იწვის მაყვლის ბუჩქი“. მოსემ გადაწყვიტა მისულიყო და ენახა. უფალმა კი უთხრა: „ახლოს ნუ მოხვალ! გაიძრე ფეხსამოსი, რადგან ეს ადგილი, სადაც შენ დგახარ, წმინდა მიწაა“ (გამოს.3:5). სწორედ იქ აღუთქვა ღმერთმა მოსეს ებრაელების ეგვიპტიდან გამოყვანა.

მ. ელიადე წიგნში „მარადიული დაბრუნების მითი“ ერთ-ერთ ქვეთავში განიხილავს „ცენტრის“ სიმბოლურ მნიშვნელობას და წერს, რომ კოსმოსის ცენტრი შეიძლება იყოს ქალაქი, რომელიც ითვლება სამი კოსმიური სამეფოს შესასვლელად. ესაა: ცაში, მიწაზე და ჯოჯოხეთში. ებრაელებისთვის ცისა და მიწის შემაერთებელ ჯაჭვს წარმოადგენს ქალაქი იერუსალიმი, იგი დედამიწის ცენტრია, რადგანაც იქაა მთა-გოლგოთა, სადაც ეწამა იესო ქრისტე და იქვეა დაკრძალული ადამი, სადაც შეიქმნა (ელიადე 2017:37). ვიცით, რომ ქალაქი მცხეთა მიჩნეულია მეორე იერუსალიმად, მაშასადამე, ზემოთ თქმულიდან გამომდინარე, თამამად შეიძლება ვთქვათ, რომ მცხეთის წმინდა ნინოს მაყვლოვანი ბიბლიური მაყვლოვანის ალუბიაა და იგი ნაწარმოების ერთგვარ საკრალურ ცენტრს წარმოადგენს, საიდანაც იწყება მცხეთის ხალხის რჯულზე მოქცევა და შემდეგ უკვე მთლიანად საქართველოსი

1.2. მგელი „კარაულთა“ მწყემსად

წმინდა მამები, აგიოგრაფიული ლიტერატურის მიხედვით, ჩვეულებრივ, პროფანულ სივრცეს საკრალურ სივრცედ გარდაქმნიან, ამის ნათელ დადასტურებას წარმოადგენს „შიოსა და ევაგრეს ცხოვრება“.

შიო მღვიმელი, როდესაც დაშორდა ასურელ მამებს ის სულიწმინდის წინამძღოლობით დაემკვიდრა მცხეთის დასავლეთით. ეს ადგილი იყო ღრმა ხევი, რომელიც იყო ძალიან ცხელი, უდაბური და უწყლო, საცხოვრებლად იქ არაფერი არ იყო. შიომ ბინა დაიდო იქვე გამოქვაბულში. ის ლოცულობდა და როცა იხილა ღმერთმა მისი მოთმინება, რომ უდაბნოში არაფერი იყო საკვები, მაშინ ღმერთმა, რომელიც ყველაფერ დაფარულს ხედავს, „ღმერთმან, რომელმან გამოზარდა ელია და უდაბნოსა შინა ყორნისა მიერ, ეგრეთვე წმინდაი ესე მამაი ჩუენი გამოზარდა, რამეთუ ტრედისა

მიერ დღითი-დღე უბოძებდა საზრდელსა“ (აბულაძე 1963:217-218). სახარებაში უფლის მიერ ელია წინასწარმეტყველის გამოკვება ასეა აღწერილი: „ და გამოეცხადა უფლის სიტყვა: ნადი აქედან და აღმოსავლეთისაკენ იარე, ჩაიმაღლე ქერითის ხევში, იორდანეს გასწვრივ. ამ ხევიდან სვი წყალი; ყორნებს ვუბრძანებ, რომ გკვებონ მანდ. მოჰქონდათ მისთვის ყორნებს დილაობით პური და ხორცი, და საღამოობითაც პური და ხორცი“(მესამე მეფეთა.17:1-6). პირველ რიგში, უნდა აღვნიშნოთ, რომ მტრედი ეს არის სულიწმინდის სიმბოლო. „ მოვიდა იესო გალილეის ნაზარეთით და ნათელ ილო იორდანეში იოანესაგან. და წყლიდან ამოსვლისთანავე, იხილა ცანი გახსნილნი და სული ღმრთისა მტრედივით გადმომავალი“(სახ. მარკ.1:9-10). გარდა ამისა, მტრედი, ძველი აღთქმის მიხედვით არის მშვიდობის სიმბოლო, რომელიც ნოეს წარღვნის დასრულებას აუწყებს. „შვიდ დღეს დაიცადა და ხელახლა გაუშვა მტრედი კილობნიდან. დაბრუნდა მტრედი საღამოჟამს და, აჰა, ზეთისხილის ნედლი რტო ეჭირა ნისკარტით. მიხვდა ნოე, რომ დამწყდარიყო წყალი დედამინაზე“(დაბად.8:10-11).

შიო მღვიმელს მალევე გამოუჩნდნენ მოწათფები და შეიკრიბა ძმობა. ძმები საკვებისა და წყლის მოსატანად, ასევე სხვა საჭიროებებისთვის იყენებდნენ სახედრებს. ის ადგილი სადაც ძმები ცხვრობდნენ მთიანი ადგილი იყო, ამიტომაც იქ ბევრი იყო გარეული ნადირიც. ნადირი შეეჩვია „კარაულთ“, რამაც ბერები ძალზედ დაამწუხრა. მაშინ შიომ ილოცა და მხეცნიც მის წინ მივიდნენ, ბერმა მხეცებს უბრძანა, რომ ყველა მხეცი წასულიყო, გარდა ერთისა. მართლაც, ყველა მხეცი წავიდა გარდა მგლისა: „მგელი დგა მოწინებით, ვითარცა მონადრინაშე მისა, და რქუა: „სახელითა უფლისა ჩუენისა იესუ ქრისტესითა გიბრძანებ შენ, მჭეცსა მაგას, რადთა ვითარცა მწყემსი კეთილი აძობდე კარაულთა ჩუენტა, რადთა ვვრი რომლითაცა ჩუენ ვიზარდებით. ხოლო განასხემდი დილასა და ჟამსა მწუხრისასა მოასხემდი, და იყავ მწყემს და მცველ საწყდართა ჩუენტა, ხოლო მგელი იქმნა მორჩილ, ვითარცა მონად და ჰყოფდა ბრძანებისაებრ ბერისა“ (აბულაძე 1963:221).

ბერები ახდენენ სივრცის კოსმიზირებას, სადაც მგელი და სახედარი ერთად თანაარსებობენ. ერთად თანაარსებობენ ისევე როგორც ეს იყო „მას ჟამსა შინა“, როცა ღმერთმა შექმნა „მინის ყველა მხეცი, ცის ყველა ფრინველი, ყველა ქვემძრომი, რასაც

კი სიცოცხლის სული უდგას“ (დაბად.1:29) და ყველა ერთად დაასახლა, მაგრამ ხდება ეპოქალური ცვლილება, რომელიც ადამიანის დაცემულმა ბუნებამ განაპირობა. ადამის ცოდვით დაცემის შემდეგ ცხოველები ერთმანეთს დაუპირისპირდნენ, ადამინებისთვის კი მთავარი საზრისს წარმოადგენს პირვანდელ ქმნილ სამყაროს დაუბრუნდეს, რაც ხდება წმინდანთა ცხოვრებაში, რადგანაც ისინი ახდენენ სივრცის კოსმიზირებს, ამ შემთხვევაში კი ეს მოხდა „შიო მღვიმელის ცხოვრებაში“.

მგელისა და ცხვრის/ თხის თანაარსებობა არაა უცნობი არც სხვა ქართული ლიტერატურული ნაწარმოებისათვის თუ ბიბლიისათვის. ამგვარ სამოთხისებურ ყოფას იყენებს შოთა რუსთაველი „ვეფხისტყაოსანში“, როდესაც ასრულებს ტარიელისა და ნესტან-დარეჯანის ქორწილის ამბავს:

„ყოვლთა თოვლთა წყალობასა ვითა თოვლსა მოათოვდეს,
ობოლ-ქვრივნი დაამდიდრნეს და გლახაკნი არ ითხოვდეს,
ავის მქმნელნი დააშინნეს, კრავნი კრავთა ვერ უწოვდეს,
შიგან მათთა საბრძანისთა თხა და მგელი ერთად სძოდეს“ (1664).

ტარიელისა და ნესტანის ქორწილით დამყარდა სამოთხისებური ყოფა და ქვეყანა დაემსგავსა პირველქმნილ სამყაროს. მოხმობილი სიუჟეტის მსგავსი ეპიზოდი გვხვდება ესაია წინასწარმეტყველთან, როდესაც ის ქადაგებს იესოს ამქვეყნად მოვლინების შესახებ.

„დადგება მგელი ცხვართან ერთად და ვეფხვი დაბინავდება ციკანთან ერთად, ხბო, ლომი და ნასუქალი პირუტყვი ერთად იქნებიან და ჩვილი ბავშვი წაუძღვება მათ. ძროხა და დედადათვი ერთად მოსძოვენ და მათი შვილები ერთმანეთის გვერდით დაწვებიან, ლომი ძროხასავით შეჭამს ჩალას“ (ესაია წინასწარმეტყ.11:6-7). სხვა ადგილას კი ამბობს: „მგელი და კრავი ერთად დაიწყებენ ძოვას და ლომი ძროხასავით შეჭამს თივას, გველს კი საჭმელად მტვერი ექნება; არ იბოროტებენ და არც რასმე წაახდენენ მთელს ჩემს წმინდა მთაზე, ამბობს უფალი“ (ესაია წინასწარმეტყ.65:25).

ამ ეპიზოდში მგლის ბუნება გარდაიქმნება, იგი უარყოფს თავის ბუნებითობას, მაგრამ ამის შესახებ ზ.კიკნაძე წერს, რომ მგლის მწყემსობა დროებითი და ეფემერულია, რადგანაც თვითონ ასურელი მამა გაანთავისუფლებს მგელს მითვის უჩვეულო

საქმიანობისაგან. ასე იმიტომ იქცევა შიო მღვიმელი, რომ მგლისთვის განსაცდელი აეცილებინა (კიკნაძე 2016:227).

შიო მღვიმელის ცხოვრებაში, ჩვენ ვხვდებით, იმ პირველქმნილი მდგომარეობის, in illo tempore-ში დაბრუნებას, როდესაც ქვეყნიერებამ არ იცოდა თუ რა იყო ბოროტება, მაგრამ ეს ყოფა ღროებითია, რადგანაც ჯერ კიდევ არ დაუკარგავთ და უარი არ უთქვამთ ადამიანებსა თუ ცხოველებს ბოროტების ჩადენაზე, ამიტომაც შიო ათავისუფლებს მგელს მასზე დაკისრებული მოვალეობისგან, ხოლო რაც შეეხება მტრედის ეპიზოდს, ვიცით, რომ მტრედი სულიწმინდის ფრინველია და მისი გამოჩენით, უფალი უცხადებს შიოს, ისევე როგორც ხევსურულ ანდრეზებში მკადრეს, რომ უფალი მის გვერდითა იქნება და ერთგულ ყმას არ მიატოვებს.

1.3. ირემი - წმინდანთა და უფლისწულთა მკვებავი

„დავით გარეჯელის ცხოვრებაში“ ვხვდებით უდაბნოს გარდაქმნას სამოთხისებურ სივრცედ, როცა წმინდა მამებსა და გარეულ ცხოველებს შორის ისპობა გაუცხოება, რომელიც სამყაროში ცოდვით დაცემის შემდეგ შემოვიდა. განდევნილი ბერის მონაფე ლუკიანე გარეჯის უდაბნოში ჯავრობს იმის გამო, რომ მათ არ აქვთ არც საკვები, არც წყალი. მამა დავითი მას გამუდმებით ამხნევენს, მაგრამ ლუკიანე მაინც შფოთშია. ერთხელაც მამა დავითი ამშვიდებს ლუკიანეს და როცა მან დაასრულა თავისი სიტყვა, „მეყსეულად მოვიდეს სამნი ირემნი, რომელთა უკუანა სდევდეს ნუკრნი მათნი და წარმოუდგეს წინაშე მათსა ვითარცა ცხოვარნი დამშვდებულნი“ (აბულაძე 1963: 231). ირემი ღვთაებრივი ცხოველია, რომელიც გვხვდება ფსალმუნში „ ვითარცა სახედ სურინ ირემსა წყაროთა მიმართა წყალთასა, ეგრე სურის სულსა ჩემსა შენდამი, ღმერთო!“ (41-ე ფსალმუნი), ასევე წყაროს დაწაფებული ორი რქაბორჯალა ირემი გამოსახულია ატენის სიონის შესასვლელ კედელზე. მითოლოგიას ახსოვს ის დრო, როცა ირემი თავისი ნებით მიდიოდა სალოცავში და მას მსხვერპლად ეწირებოდა. მეცნიერთა აზრით, ირემს უნდა მიეღო მონაწილეობა კოსმოგონიურ პროცესში. იგი თავისი რქებით ცისა და მიწის კავშირის ცოცხალი განსახიერებაა. მითოლოგიაში, მხოლოდ ზებუნებრივ

არსებებს შეუძლიათ ირმად ქცევა. ირემი ყოველთვის დადებითი პერსონაჟია. ის სიკეთის განსახიერებაა, რომელიც ასევე სიამაყის, დიდებულებისა და სიმშვიდის განსახიერებაცაა თავის თვინიერებასთან ერთად. ის სამეფო ცხოველია და თავისი ბუნებით უნდა ემსახურებოდეს ხალხს (კიკნაძე 2016:207). ირემი ქართულ მითოლოგიაში უფლისწულთა მკვებავია, ისევე როგორც მგელი რომაულ მითოსში.

„ბატონიშვილს ერეკლესა

ირმის ძუძუ უწოვნია“ [ქართ.ხალხ.საისტ.სიტყვ. 1964:9].

ტექსტში „ლეგენდა თამარზე“, ნათქვამია რომ თამარმა უკანონო ვაჟი მოსამსახურეს მთაში დაატოვებინა. ბავშვი ტიროდა და მის ტირილზე მოვიდა ირემი. ნახა ბავშვი, შეებრალა და დაუწყო ძუძუს წოვება. ირმის რძით ბავშვი გაიზარდა (ქართ. ხალხ. საისტ. სიტყვ.1961:81), ფურ-ირმის რძითაა გაზრდილი შუმერული ეპიკური თქმულებების გმირი ენმერქარიც. ზ.კიკნაძე ირემის საკუთარი ნებით მსხვერპლად შეწირვის თვისებაზე წერს, რომ ირემს თითქოს სურს უფრო ახლოს მივიდეს ადამიანთან, ამიტომაც ნებაყოფლობით მსხვერპლადაც კი იღებს თავის თავს სალოცავში, როგორც შინაური ცხოველები იქცევიან, მაგრამ ადამიანი ნაცვლად იმისა, რომ მიიღოს მისგან ნებაყოფლობითი მსხვერპლი ნანადირევად აქცევს მას. საკრალურ დროს ირემი მოვიდა მსხვერპლად შესანიშნავად, მაგრამ ადამიანებმა შეურაცხყოფა მიაყენეს მას და ღმერთმა საგვარეულოს დააკისრა ვალი, რომელსაც იმ დროიდან მოყოლებული დღესაც ასრულებენ, თუ არ შეასრულებენ ამ ვალს, მაშინ საგვარეულო დაისჯება (კიკნაძე 2016:208). ირმის შეწირვა ხშირად, წმინდა გიორგის სახელთანაა დაკავშირებული. იგი გზავნის სალოცავში მსხვერპლად ირემს, რომელიც თავისი ნებით მიდის მათთან და ეწირება. ასეთ ირემზე თქმულებები გავრცელებულია საქართველოს სხვადასხვა კუთხეში. ირმის ნებაყოფლობით მსხვერპლად შეწირვა ინახავს ხსოვნას საკრალურ დროზე, რომელიც ადამიანებმა სინმინდის დაკლების შედეგად დაკარგეს. მას შემდეგ ირემს ხარი ჩაენაცვლა. მოხდა ეპოქალური ცვლილება და ეს ადამიანებს დღესაც ახსოვთ, რაზეც მოწმონს ხალხში გავრცელებული თქმულებები. მაგალითად, ზემო იმერეთში, ბაღდათის რაიონ სოფელ ხანში, დღესაც სულთმოფენობის დღესასწაულზე, აღნიშნავენ ველაობას, სადაც ტაბეშაძეების გვარის

წარმომადგენლები კლავენ სამი წლის კურატს. ეს ტრადიცია მოდის სწორედ იმ უხსოვარი დროიდან, როცა ირემი მოდიოდა და თავისი ნებით ეწირებოდა მსხვერპლად, შემდეგ კი ადამიანთა შეცოდების გამო, მათ თავიანთ თავზე იღვეს ამ მოვალეობის შესრულება და ამიტომაც ირემს ჩაანაცვლეს ხარი.

1.4. ჯოჯობეთური დრო-ჟამისა და სივრცის რეპრეზენტაცია ქართულ აგიოგრაფიაში

წუთისოფელში სამოთხისებური სივრცის გვერდით გვხვდება ჯოჯობეთური სივრცე და დრო-ჟამი. როგორც სამოთხის მოტივები აისახა ჰაგიოგრაფიაში, ასევე მოხდა ჯოჯობეთის შემთხვევაშიც. ჩვენ შეგვიძლია გამოვყოთ ის ეპიზოდები ქართულ აგიოგრაფიაში, სადაც გვხვდება ჯოჯობეთური სივრცე. პირველი ტექსტი, რომელიც ამ მხრივ ჩვენს ყურადღებას იპყრობს არის იაკობ ხუცესის „შუშანიკის წამება“. საპყრობილის ეპიზოდში ვკითხულობთ: „ციხესა მას შინა, ტილი მოუგონებელი ადგილსა მას დასხმულ იყო. ჟამსა ზათხულისასა ცეცხლებრ შემწეული იგი მჭურვალეზად მზისად, ქარნი ხორშაკნი და წყალნი მავნებელნი, რომლისა მკვდრნიცა მის ადგილისანი სავსენი სენითა, წყლითა განსივებულნი, ჩარადოვანნი, პირ-მსივანნი და დღე-მოკლედ ცხორებულნი; და მოხუცებულნი არავინ არს მათ ქუეყანათა“ (აბულაძე 1963: 25). „შუშანიკის წამების“ აღნიშნული ეპიზოდი წარმოადგენს იმქვეყნიური ჯოჯობეთის ალუზიას.

„დავით გარეჯელის ცხოვრებაში“ ჯოჯობეთის ალუზიას წარმოადგენს ის ეპიზოდი, რომელშიც მონაწილეობს გველეშაპი, იგივე ვეშაპი, რომელიც თავისი სახით ჯოჯობეთს განასახიერებს. როგორც ზემოთ აღვნიშნეთ, დავით გარეჯელთან მოდიოდა ირემი, რომელიც ღვთის განგებით მას და მის მოწათეს კვებავდა, მაგრამ ირემების ფარეხთან ახლოს ბინა დაიღო გველეშაპმა: „იყოფებოდა ვეშაპი დიდი და საზარელი, რომელსა ესხნეს თუალნი სისხლის ფერნი და რქად იყო შუბლსა და ფაჩარი ფრიად ქედსა მისსა“ (აბულაძე 1963:231), გველეშაპმა ირემის ნუკრი შეჭამა. დამფრთხალმა ირემებმა მამა დავითთან მიიბრინეს, ხოლო ლუკიანემ წმინდანს უთხრა, რომ ირემები იყვნენ

შეშინებულები და თან მათთან მარტოებიც მივიდნენ, მაშინ ღავით გარეჯელმა, რომელსაც ხელში კვერთხი ეჭირა ნახა ირმების სადგომი და დაინახა იქ გველეშაპი და მიმართა მას: „ან გამოვედ ადგილთა მაგით და წარვედ შორთა უდაბნოთა, და უკუეთუ არა ისმინო ჩემი, ძალითა უფლისა ჩუენისა იესუ ქრისტესითა ჩემითა ამით კვერთხითა მუცელი შენი განვხეთქო და საჭმელ მატლტა გყო შენ“ (აბულაძე 1963:232), მაშინ გველეშაპი დასთანხმდა წასვლაზე, მაგრამ წმინდანს პირობა წაუყენა: „აღმომყევ თავადმდე ამის მთისა და თავს-მდე მქემენ, რადთა არა მიაქცივნე თუალნი შენნი ჩემგან, ვიდრე არა შთავიდე წყალსა მას, რომელი დის სამხრით კერძო მთისა ამის, რამეთუ მეშინის მე მეხის-ტეხისაგან და მით ვერ გამოვალ მე“ (აბულაძე 1963:232). ღავით გარეჯელმა პირობა მისცა და ის წინ გაუძღვა გველეშაპს. მამა ღავითი მიდიოდა და თან ფსალმუნს კითხულობდა, მაგრამ უფლის ანგელოზმა ღავითი უკან მიახედა და მისი მეხედვისთანავე გველეშაპიც დაითრგუნა, დაეცა მას მეხი და დაინვა. ამით განადგურდა ჯოჯოხეთური სივრცე უდაბნოში.

ასევე ჯოჯოხეთის განმასახიერებელად უნდა მივიჩნიოთ გველეშაპი ამირანის თქმულების მოხიერ ვარიანტში, „გაქვავებული გველეშაპი“, სადაც გველეშაპი ცდილობდა მყინვარწვერის ფერდობზე მიჯაჭვული ამირანის შეჭმას. ის მყინვარის წვერიდან გადმოცოცდა და დაბმულ ამირანს შეჭამდა რომ არა წმინდა გიორგი, რომელმაც მისი განზრახვა გაიგო, მაშინვე ამირანთან გაჩნდა და გველეშაპი გააქვავა (ჩიქოვანი 1947: 346), ასევე ამირანის ეპოსის სხვა ვარიანტი „მყინვარის გველეშაპი“, მოგვითხრობს, თურმე მყინვარის კალთაზე ბუდობდა ერთი გველეშაპი. მყინვარის ამ კალთაზე იყო თბილი წყალი და გველეშაპი მასთან არავის უშვებდა, ხალხისგან მსხვერპლს მოითხოვდა. სოფელმა ხატს შესთხოვა გველეშაპისგან გათავისუფლება და ხატს თან ძღვენიც მიართვა. მაშინ იესო ქრისტემ გააქვავა გველეშაპი (ჩიქოვანი 1947: 347). წმინდა გიორგის/იესო ქრისტეს მიერ გაქვავებული გველეშაპი თავის თავში ატარებს ჯოჯოხეთურ სახეს და ყოფას არა მხოლოდ აგიოგრაფიულ ლიტერატურასა და ხალხურ რწმენა-წარმოდგენებში, არამედ ქრისტიანობაშიც. როგორც ვიცით, წმინდა გიორგი გვევლინება გველეშაპთან მებრძლოდად და იგი ხატებზე გამოსახულია, როგორც გველეშაპის დამთრგუნველი.

გარდა ხალხური გადმოცემებისა და ლიტერატურული წყაროების, ასევე იოანე ღვთისმეტყველის გამოცხადებაში წერია: „და ვიხილე ანგელოზი, ჩამომავალი ზეცით, რომელსაც ჰქონდა გასაღები უფსკრულისა, და ხელთ ეპყრაჯაჭვი გრძელი. და შეიპყრა ურჩხული, გველი დასაბამი, რომელიც არის ეშმაკი და სატანა, შეკრა იგი ათასი წლით. და ჩააგდო იგი უფსკრულში და დახშა კარი, და დაიბეჭდა იგი, რათა ვეღარ აცდუნებდეს ხალხებს“(გამოცხ. 20:1-3).

მითოლოგიაში გველეშაპი პრეკოსმიური არსებაა, რომელიც ელოდება უამთა აღსასრულს, რომ ხმელეთი ნანგრევებად აქციოს და სამყარო დაუბრუნდეს შესაქმნელ არარაობას. ამიტომაც იგი არის არა მხოლოდ ბოროტების მომტანი, არამედ თვით ბოროტების პერსონიფიცირებული ფიგურა (კიკნაძე 2016:228).

თავის დასასრულს, შეგვიძლია ვთქვათ, რომ აგიოგრაფიულ მწერლობაში წარმოდგენილი სამოთხის მოტივის ერთგვარ პარადიგმას ვხვდებით ქართულ მითოლოგიაში და ეს არის ცისა და მიწის კავშირი, ცხოველისთვის თავისი პირვანდელი ფუნქციის აღდგენა, ღვთის ან რომელიმე წმინდანის მიერ, მართალია, იგი დროებითია, მაგრამ ამის მიუხედავად დედამიწაზე მაინც მყარდება ჰარმონია. ასევე, არაერთი მითოლოგიური გადმოცემით მტკიცდება, რომ ისევე როგორც აგიოგრაფიულ ლიტერატურაში, ქართულ მითოლოგიურ გადმოცემებშიც ბერები და წმინდანები გარდაქმნიან ჩვეულებრივ პროფანულ სივრცეს „კვივად“, საკრალურ სივრცედ.

სამოთხის ბინარულ ოპოზიციას სასულიერო ლიტერატურასა და მითოლოგიაში ჯოჯოხეთი წარმოადგენს. წმინდა ბერების მიერ გარდაქმნილ სამოთხისებურ სივრცეს ხალხურ ტექსტებში უპირისპირდება დემონურ არსებათა სამოქმედო არეალი, რომელიც წარმოადგენს „სხვა“ სივრცეს და იგი ჯოჯოხეთის ნიშნებს ატარებს. ასეთი ადგილი სამოთხის ანტითეზას წარმოადგენს.

II თავი

სამოთხისებური სივრცე მითოლოგიურ გადმოცემებში

ქართულ მითოლოგიურ ტექსტებში ხშირად წარმოდგენილია საკრალური სივრცე, როგორც ბიბლიური სამოთხის ერთგვარი პარადიგმა. მართალია, ადამიანებმა სამოთხე მრავალი ათასწლეულის წლის წინ დაკარგეს, მაგრამ, მიუხედავად ამისა, ხალხური ტექსტების მიხედვით, დედამიწის ზედაპირზე მაინც გვხვდება ისეთი ადგილები, სადაც სამოთხისებური ყოფის ფრაგმენტები ჯერ კიდევ არის შემორჩენილი, რომელიც სინმინდისა და მარადიული გაზაფხულის ნიშნებს ატარებს.

ასეთი ადგილების ხსოვნა შემოინახეს, ერთი მხრივ, რჩეულმა ადამიანებმა, როგორც არიან ბერები და ხევისბრები, ხოლო, მეორე მხრივ, საკრალური ადგილები თვით ღვთის ნებით გამოჩნდა დედამიწაზე. გადმოცემები საკრალური სივრცის შესახებ უმეტესად გვხვდება საქართველოს მთიანეთში, რადგანაც, თუ გავიხსენებთ ბიბლიას ვნახავთ, რომ თვითონ ღმერთმა აირჩია მთა წმინდა ადგილად, პირველად, როცა ღმერთმა ადამი დაასახლა ედემის ბაღში, „აიყვანა ადამი უფალმა ღმერთმა და დაასახლა ედემის ბაღში“ (დაბად. II.15), ხოლო მეორედ, როცა ის გამოეცხადა მოსეს მთაზე და მისცა ათი მცნება.

მთასთან დაკავშირებით ზ. კიკნაძე წერს, რომ მთაწმინდა ძველი და ახალი აღთქმის რელიგიებში ამქვეყნიური სამოთხის ხატია, რადგანაც იქ შეიკრიბა სამოთხიდან განდევნილი ადამის შთამომავლობა, ამიტომაც ატარებს ის სამოთხისებურ ნიშნებს (კიკნაძე 20016: 116). მ. ელიადეც თვლის, რომ მთა ეს არის ადგილი, სადაც ცა და დედამიწა ერთმანეთს ხვდება და ის სამყაროს ცენტრში მდებარეობს (ელიადე 2017: 31).

ზემოთ თქმულიდან გამომდინარე, სწორედ მთაში უნდა ვეძებოთ გამორჩეული, სამოთხისებური ადგილები, მაგრამ აქ უნდა განვმარტოთ, რატა ბუნდოვანი არ იყოს, თუ რას ვგულისხმობთ სამოთხისებურ ყოფასა და სამოთხისებურ ადგილში.

ჩვენი კვლევის წყაროს წარმოადგენს რელიგიურ - მითოლოგიური გადმოცემები და იქ მოხმობილი ტექსტები, ამიტომაც ჩვენ ამ მასალას ერთგვარი კლასიფიკაცია უნდა

მივცეთ, რათა ადგილი დასანახი აღმოჩნდეს, თუ რას ვგულისხმობთ სამოთხისებურ ადგილებში.

1. სამოთხისებური ადგილები, რომლებიც სინმინდის დაკლების გამო დაიკარგა.
2. ჯვრის საიდუმლო სამალავები.
3. საკრალური
4. საკრალური ადგილები, რომლის აღმოჩენაშიც რჩეული ადამიანები მონაწილეობენ

აქვე უნდა აღვნიშნოთ, ამ სივრცის მახასიათებელი ნიშნებში. რა ახასიათებს სამოთხისებურ, საკრალურ სივრცეს. ასეთ ადგილას ცოდვილს არ შეუძლია მიახლოება, იმ ადგილას აკრძალულია ქალის მისვლა. იქ ჯვრის მსახური მიდის განმედილი ან განმმენდის მიზნით ფეხშიშველი. ასეთ გამორჩეულ ადგილას ანგელოზები იკრიბებიან.

2.1. დაკარგული და საფარველდადებული საკრალური სივრცე

საკრალურ სივრცეში მდებარეობს მრონმდინარე ხმალას ალვის ხე და ოქროსშიბიანი ლაშარის მუხა. მათზე საუბარი გვქონდა პირველ თავში, როგორც ცისა და მიწის დამაკავშირებელ წმინდა ხეზე, თუმცა ეს ადგილი, ისევე როგორც სამოთხე, დაიკარგა ადამიანის პატივმოყვარეობის გამო. ერთ-ერთი გადმოცემა გვამცნობს, რომ ხმალას ალვის ხის მოპირდაპირედ, არაგვის გადაღმა, გორზე, იდგა მაღალი ციხე, რომელსაც შურის ციხე ერქვა. შურის ციხესა და ალვის ხის წვერებზე ანგელოზებს გაბმული ჰქონდათ ოქროს შიბი, რომელზეც ისინი დადიოდნენ. ქისტებს და ლეკებს სურდათ ამ ციხის ხელში ჩაგდება, ალვის ხის მოჭრა და ოქროს შიბის წაღება, მაგრამ ვერ მოახერხეს. თუმცა ბიბლიიდან თუ ისტორიიდან ვიცით, რომ ყველაგან გამოერევა ხოლმე ერთი იუდა და მათაც იპოვნეს ასეთი ადამიანი, ერთი ლუღელი კაცი, რომელმაც ასწავლა ქისტებს თუ როგორ უნდა მოეჭრათ ალვის ხე. ალვის ხეს ერთი თვისება ჰქონდა, მას რამდენჯერაც ცულს დაჰკრავდნენ, იმდენჯერ მთელდებოდა. ყოველგვარი სინმინდის შელახვა შეიძლება უწმინდურობით და ეს ხეც კატის, როგორც უწმინდური ცხოველის წყალობით გააუწმინდურეს. ხეს აეხსნენ თუ არა ღვთისშვილები ისიც მაშინვე

წაიქცა და მის მოპირდაპირედ მდგარი შურის ციხეც დაინგრა, ხოლო შიბი წივილით წავიდა ცაში. ეს ადგილი გაუნმინდურდა, იქ აღარ დარჩა არც ერთი ნიშანი იმისა, რომ იქ ოდესმე ასეთი სამოთხისებური ყოფა იყო. ამის მიზეზი კი ის გახდა, რომ ალვის ხის ნაფოტი არაგვმა ჩაუტანა მეფეს და მეფემ ეს ხე ძირ-ფესვიანად მოათხრევინა, ესეც არ იკმარა და სამირონე ქვევრები, რომელიც ალვის ხის დარანში იყო, თან წააღებინა (ანდრეზები 2009: 15).

ხალხურმა სიტყვიერებამ შემოინახა ლექსი „შურის ციხე“, საიდანაც ვიგებთ, რომ შურის ციხეს, მიწის ქვეშ ჰქონდა წყაროზე ჩასასვლელი. ალვის ხეს კი, რომელიც მის მოპირდაპირედ იდგა, ცხრა კეცად ჰქონდა გრძელი შიბი, რომელზეც ისხდნენ ოქროსთმიანი ანგელოზები და წვრილი ხმით გალობდნენ. ციხის ასაგებად დასჭირდათ 20 წელი. ანდრეზისგან განსხვავებით ლექსი ზუსტად გადმოგვცემს, თუ რა რაოდენობის სასყიდელი მისცეს საიდუმლოს გამცემ კაცს. ლექსის მოქმელი ხალხის ცნობისმოყვარეობასაც აკმაყოფილებს და გვატყობინებს, თუ საიდან იცოდა ლუღელმა კაცმა ციხის საიდუმლო. მოქმელის მოქმით, ამ კაცს თურმე ანგელოზები ეცხადებოდნენ (ხალხური პოეზია 1973: 200).

მეორე ოქროსშიბიანი ხე, რომელიც ცასა და მიწას აკავშირებდა, ჰქონდათ ფშავლებს და მას ლაშარის მუხას ეძახდნენ, ახლა მის ადგილას ლაშარის ჭვარია. გადმოცემების თანახმად, მუხის წვერზე ოქროს შიბი ეკიდა, რომელზეც ანგელოზები ადი-ჩამოდიოდნენ და ხეზე სხდებოდნენ, მაგრამ ამ სამოთხისებურმა ყოფამ დიდხანს ვერ გასტანა, რადგან ზურაბ არაგვის ერისთავმა მოინდომა ფშავ-ხევსურეთის დამორჩილება და თან იმ ოქროს შიბის ხელში ჩაგდებაც სურდა. რას არ მიმართა მან, როგორ არ დასაჯა ხალხი, რათა საიდუმლო გაეგო, მაგრამ ვერაფერი მოახერხა. თუმცა როგორც ხმალას ალვის ხის შემთქვევაში მოხდა, აქაც გამოჩნდა ერთი გამცემი კაცი, რომელმაც გასცა მუხის ხის მოჭრის საიდუმლო. ხმალას ალვის ხის ანალოგიურად ლაშარის მუხის მოჭრაც მხოლოდ წაბილწვით შეიძლებოდა. კატა დაკლეს და მისი სისხლი ხეს ასხურეს. ხე მოჭრეს თუ არა წვერზე დაკიდებულმა შიბმა გველივით წივილი დაიწყო და წივილითვე წავიდა ცაში, დაუბრნდა თავის პირვანდელ სამყოფელს (ანდრეზები 2009:161).

მაშასადამე, ამ ორი ანდრეზით ვიგებთ, როგორ შეუძლია ადამიანს მოსპოს საკრალური სივრცე.

კიდევ ერთი გამორჩეული ადგილი, რომელზეც ანდრეზები მოგვითხრობენ, არის ცროლის მთის სანება, სადაც ზამთარში დღეობაზე მისულ ხალხს არც სციოდათ და არც ზვაგი ხვდებოდათ გზაში. ირგვლივ ტყე არ იყო, რომ ცეცხლი დაენთოთ, მაგრამ იქ ხორცი უცეცხლოთ დულდა. სალოცავში მისაყვანი საკლავი თოვლზე ისე გაივლიდა, რომ ნაკვალევს არ ტოვებდა და თავისი ნებით ხალხს წინ მიუძლოდა. სხვაგან თუ ქარბუქი და სიცივე იყო, იქ თბილოდა. სალოცავში მისული ხალხის სანთლებსაც თავად ეკიდებოდა ცეცხლი, მაგრამ მას შემდეგ, რაც წესების დაცვა დაივიწყა ხალხმა, ხევისბერი, მკადრე, ჯვრის კაცი სინმინდეს აღარ ინახავდნენ და იქ დაიწყეს სიარული, სადაც დედაკაცები გაივლიდნენ, ჯვარში წასვლამდე მარხვას არ ინახავდნენ და ქალთანაც იყვნენ, ცროლის სანებასაც ღვთისშვილები აეხსნენ. ამის შემდეგ არც ხორცი დულდა თავისით, არც სანთელს ეკიდებოდა ცეცხლი, ქარბუქიც იყო და ხალხსაც იქ მისვლა უჭირდათ. დაიკარგა ის სამოთხისებური ყოფა, რაც ცროლის სანებაში იყო და ყველაფერი ადამიანების გამო, რომლებმაც ვერ შეძლეს სინმინდის დაცვა (ანდრეზები 2009:79).

მეორე ასეთივე ადგილი, მდებარეობს ფშავში, ჭიჩოში. გადმოცემის თანახმად, იქ მდებარეობდა სალოცავი, რომლის სახელიც ხალხის მესხიერებას შემორჩენილი არ აქვს, ამიტომ იმ ადგილს მთაწმინდას უწოდებენ. ეს ადგილიც ადამიანთა სინმინდის დაკლების გამო დაიკარგა. ანდრეზის თანახმად, იქ ადამიანს მისვლა ღლესაც ეკრძალება. მთაწმინდა მდებარეობდა ყველაზე მაღალ მწვერვალზე, სადაც თოვლი სულ იყო, მკათათვეშიც, ხოლო მარიამობის თვეში კი კიდევ ახალი თოვლი ემატებოდა იქაურობას. ამ მთაზე ცხოვრობდნენ ბერები, რომელთაც იქ აუშენებიათ სამლოცველო. ეკლესიის ფიცრები და ხეები სისხლივით წითელი ყოფილა. ეკლესიას ჰქონდა ერთი ქვევრი, რომელიც ზედაშისთვის იყო განკუთვნილი (ანდრეზები 2009:227). ანდრეზი, ასევე მოგვითხრობს დაუღეველ პურზე, რომელიც ბერებს ჰქონიათ.

საკრალური ადგილები, რომელზეც მოხმობილი ორი ანდრეზი მოგვითხრობს, წარმოდგენილია ტაძრის სახით. ვიცით, რომ მთა წმინდაა და არაა გასაკვირი, რომ

ვხვდებით კიდევ კონკრეტული ადგილის სახელწოდებად მთაწმინდას, მაგრამ რატომ არის ის ადგილი ასეთი განსაკუთრებული, სადაც ტაძარი/სალოცავია აშენებული?

მ. ელიადე საკრალური „ცენტრის“ სიმბოლურ მნიშვნელობას შემდეგნაირად განმარტავს. წერს, რომ ტაძარი არის კოსმოსის სახეა და მისკენ მიმავალი მომლოცველი სამყაროს ცენტრს უახლოვდება. სულ ბოლო ტერასაზე ასვლისას ის სხვა დონეზე გადაინაცვლებს, იგი გადალახავს პროფანულ სივრცეს და შეაღწევს „სუთთა ადგილას“ (ელიადე 2017: 35). სწორედ ეს „სუთთა ადგილი“, საკრალური სივრცე, „სხვა“ სამყარო, სადაც ადამიანი გადის ჩვეულებრივი ყოფიდან და გადადის ზებუნებრივ სამყაროში.

ხშირად ადამიანები ცოდვას ნებსით თუ უნებლიეთ ჩადიან, რადგან მათ არ იციან, როგორ უნდა ამაღლდნენ საკუთარ მიწიერ განცდებზე და შესაბამისად ისჯებიან კიდევ. ეს სასჯელი კი ხშირად საყოველთაოა, რადგან, ცოდვის ჩამდენი ადამიანების გარდა, სხვებიც ისჯებიან, ანუ ცოდვა სხვებზეც გადადის. ზუსტად ასეთ სიტუაციაზე მოგვითხრობს ანდრეზი „მყინვარი, ბერები და ქალი“, სადაც საუბარია სამოთხისებურ ყოფაზე, იდეალურ გარემოზე, როცა ბერები მზის შუქზე ხურჭინს გადაჰკიდებდნენ და ხურჭინიც ღვთის შეწევნით ივსებოდა პურითა და მადლით. მათ სალოცავში აკვანიც ჰქონდათ, რომელზეც მტერედები ისხდნენ. მტრედი ხომ სულიწმინდის მადლის გამომხატველი სიმბოლოა, ამიტომაც არაა გასაკვირი, რომ მტერედებს ბერებისთვის პურის სამი მარცვალი მიჰქონდათ და ბერებიც ამ მარცვლებით საზრდოობდნენ. ბერებისთვის წყალი ერთ ქალს მიჰქონდა, მაგრამ ეს ქალი ერთხელ ავად გახდა ბერებისკენ მიმავალ გზაზე და ის მწყემსმა შეიტარა. იმ ღამით ქალმა და მწყემსმა შესცოდეს და შემდეგ დღეს კალათამ წყალი ვეღარ დაიჭირა, რადგან ამ წაბილწვით დაიკარგა სინძინდე და უმანკოება. ბერებიც იძულებულნი გახდნენ მიეტოვებინათ იქაურობა (ანდრეზები 2009: 341). ასე დაიკარგა კიდევ ერთი სამოთხისებური სივრცე.

თუ ადამიანები შებილწავენ წმინდა ადგილს, მაშინ ის დაკარგავს საკრალურ-რობას, ანალოგიურად იმ სამოთხისა, რომელიც ერთხელ უკვე დაკარგა ადამ და ევას შეცოდების გამო. თითქოსდა ყველაფერი იმ პირველ სანყისს იმეორებს და ადამიანები ვერ უფრთხილდებიან მათზე მინდობილ სინძინდეს. ხედენიშის ანდრეზის თანახმად,

თურმე ხედენიშში ღვინით წვიმდა და თეთრი პურით თოვდა, მაგრამ ადამიანები არ გაუფრთხილდნენ ღვთისგან ბოძებულ საჩუქარს და ეს საჩუქარიც დაიკარგა, რადგან ერთმა დედაკაცმა, ხედენიშობას ეს ადგილები ბავშვს წააბილწვინა, რის გამოც ეს ყოფა დაიკარგა და ბევრი ცდის მიუხედავად ის უკან ვეღარ დააბრუნა ხალხმა (ანდრეზები 2009: 343).

მითოსის თანახმად, საკრალური სივრცისა და სამოთხისებური ყოფის დაკარგვა შესაძლებელია არა მხოლოდ სინმინდის დაკლების გამო, არამედ აკრძალვის დარღვევის შედეგად. მაგალითად, აკრძალვის დარღვევის შედეგად დაიკარგა თამარის სამოთხე, რომელსაც მითოლოგია იცნობს, როგორც „მარადიული გაზაფხულის მითოსს“.

ტექსტის მიხედვით, თამარმა დაატყვევა ზამთარ-ზაფხულის გამჩენი შუქერ-ვარსკვლავი, ამიტომაც იალბუზის მთაზე თოვლი არ მოდიოდა, შეჩერებული იყო დრო-ჟამის მსვლელობა. თამარს იალბუზზე, სხვა ვარიანტით ბრუტ-საბრძელას მთაზე, სასახლე ჰქონდა აშენებული. სასახლეს თორმეტი ოთახი ჰქონდა. შუქერ ვარსკვლავი კი სასახლის ერთ-ერთ ოთახში ჰყავდა ჯაჭვებით დაბმული. თამარის სასახლის თორმეტივე ოთახი სულ გარეული ნადირის ძვლებითა და ძვირფასი ხალიჩებით იყო მორთული. სასახლეს გარშემო დიდი გალავანი ერტყა. გალავანში ერთი დიდი თორმეტოთახიანი კოშკი იყო, ერთივე სხვა სასახლე. გალავანს შუა მშვენიერი ბალახი იზრდებოდა, სადაც თამარ მეფეს გარეული თხა, კანჯარი და ირმის ჯოგი ჰყავდა გაშვებული. ერთხელ თამარ მეფე, სხვაგან წავიდა. სხვადასხვა ვარიანტის მიხედვით გამდელმა/ მოსამსახურე გოგომ იმ ოთახის კარი გააღო სადაც შუქერვარსკვლავი იყო დამწყვდეული, ან ცხენად ქცეული შუქერვარსკვლავი წყლის დასალევად წაიყვანა და შუქერვარსკვლავი გაიქცა. განთავისუფლებულმა შუქერვარსკვლავმა კი ასტეხა ქარი, თოვლ-ბუქი და იდეალური ყოფაც დაიკარგა (სიხარულიძე 1961: 254).

მართალია, ადამიანებმა ცოდვით დაცემის გამო დაკარგეს სამოთხე და სამოთხისებური ადგილები, მაგრამ, ზ. კიკნაძის აზრით, ეს ადგილები არ გამქრალან, მართალია, ფიზიკური თვალთ შუეძლებელია მათი დანახვა, მაგრამ ეს ადგილები მაინც ცოცხლობენ მკადრეთა და რჩეულ პირთა ხილვებსა და იღუმალ გამოცდი-

ლებაში, რადგან მას საფარველი აქვს დადებული (კიკნაძე 2016:117). წმინდა ადგილების დაკარგვა-გაუჩინარება ადამიანთა ცოდვის გამო ბიბლიურ პარადიგმას წარმოადგენს, როცა ადამმა და ევამ, თავიანთი შეცოდების გამო დაკარგეს სამოთხე და ადამიანებიც ამას თავიანთი ქმედებებით გამუდმებით იმეორებენ.

2.2. საიდუმლო სამალავები

განსხვავებულ სივრცეს წარმოადგენს ყველა ის ადგილი, რომელსაც ღვთის განგებით საფარველი ადევს, რათა კაცის თვალმა ვერ ნახოს და ვერ წაბილწოს ის თავისი „თეხის ნალით“. ასეთ ადგილებში ხშირად შენახულია თას-განძეულობა და მას თავისი მცველი ჰყავს, თუ ასეთი ადგილი ნახა კაცმა, ის აუცილებლად დაისჯება. თუმცა, ამ ქვეთავში არ შევხებით თას-განძეულობას. ჩვენ გვინტერესებს ისეთი ადგილები, რომლებიც ადრე ცხადი იყო და იქ ხალხი მიდიოდა, თუმცა შემდეგ საფარველი დაედო.

ხევსურული ანდრეზის მიხედვით, ერთ-ერთი ისეთი ადგილი არის ცროლის სანება, რომელსაც სინმინდის დაკლების შემდეგ საფარველი დაედო, რათა იქაურობა და იქ არსებული სინმინდეები: დარბასი, საქვაბეები, თას-განძეულობა ხალხს არ შეეპილწა. საფარველის გამო არავინ იცოდა, სად იყო ეს ტაძარი და ამის გამო იქ ვერავინ მიდიოდა, ამასთანავე მოსულმა ზვავმა ჩაიტანა სანების კარის ფიცარი. იქ მოხვედრილი კაცი ვერ მიხვდებოდა, თუ სად იმყოფებოდა. ერთხელ ერთ გზააბნეულ მონადირეს - გუროელ კანანათ მანგიას - ნადიროისას შემოაღამდა, ისე შევიდა სამების დარბასში ისე რომ ვერც მიხვდა, მაშინ მას დაესიზმრა თეთრცხენიანი კაცი, რომელსაც ხელში მათრახი ეჭირა. თეთრწვერიანმა კაცმა მანგიას მათრახი წაჰკრა და უსაყვედურა იქ შესვლის გამო. სამაგიეროდ მანგიამ იმის გამო, რაც მან ნახა, ჯვარს საზღაური გადაუხადა ოთხრქა ვერძის შეწირვით. იქ ყოფნისას მონადირემ იხილა სკამებით, საცეცხლურით, საკიდლით განწყობილი დარბაზი, რომელიც გამართული იყო სპილენძის ქვაბ-ტაბლებით. დარბაზს სხვა კარიც ჰქონდა, სადაც მანგია შესულა და იქ კიდევ უნახავს ქვაბ-საკიდელი, დიდი სალუდე ქვაბი, შეშები, ლათბა, ტომრის კედ-პირსაკრავები. იმ ღამით მანგიას არ შესცივნია, პირქით დარბაზის იატაკზე თბილად იწვა და ოფლიც

მოსდიოდა. იქიდან წამოსულმა კი შემდეგ ხევისბერთან ერთად ველარ მიაგნო იმ დარბაზს, რადგანაც მას ღვთისშვილებისგან ისევ საფარველი დაედო, რათა ადამიანებს ველარ ენახათ ის (ანდრეზები 2009: 80).

ასევე, ერთმა ხევსურმა კაცმა, ალიათ უშიშამ, შემთხვევით, როდესაც მიწას ხნავდა ნასოფლარ ადგილას, სახნისი გამოსდო რაღაცას, რომელმაც უღარუნი დაიწყო და უეცრად მის წინ გამოჩნდა ქვაბი ოქრო-ვერცხლით სავსე, რომელზეც წითელი ოქროს ხბო იწვა და თვალებს აბრიალებდა. ამის ნახვის შემდეგ ალიათ უშიშამ გონება დაკარგა. გონს მოსული სულ სხვა ადგილას იწვა. მან ამ ადგილის შესახებ არავის გაუხილა თავისი შვილის გარდა, რომელმაც ასევე არავის უთხრა. ასე დარჩა საიდუმლოდ ეს წმინდა ადგილი (ანდრეზები 2009:150). რეალურად ალიათ უშიშას მიერ ნანახი ხბო არ არსებობს, ეს მოჩვენებაა, რომლითაც განძი თავს იცავს ადამიანებისგან.

დედამინაზე და სამოთხეში ერთნარად მოედინება მდინარეები და წყაროები, მაგრამ იმ მრავალ წყაროთა შორის, რომელიც ჩვენს სამყაროშია, შეიძლება იყოს გამორჩეული წყარო, რომელსაც უკვდავების წყალი შეიძლება ჩამოსდიოდეს, სწორედ ასეთ წყაროზე მოგვითხრობს გადმოცემა „უკვდავების წყარო“, რომელიც თურმე ფშავის სოფელ გომენარში მდებარეობდა. ის თავისი ბუნებით სკრალური და წმინდა იყო, რადგან შვიდ წელიწადში ერთხელ გომენარში, მაღანლის მთის ძირას გაიდებოდა ოქროს ღარი, ზედ გადმოვიდოდა უკვდავების წყალი და რამდენიმე წამის შემდეგ კვლავ გაქრებოდა, მაგრამ საიდუმლო ყოველთვის დაფარული არ არის და ამ სანახაობითვის ერთ ქალს შეესწრია თვალი, რომელსაც მოუნდომებია ამ წყლის დალევა და დალია კიდევ. ამის გამო ის დაისაჯა. სასჯელი კი ის იყო, რომ ღრმად მოხუცებულ ასაკშიც კი აღარ კვდებოდა. არავინ იცის სადაა ახლა ის წყარო, რადგან მას ღვთის საფარველი იცავს, რათა სხვამაც არ დალიოს (ანდრეზები 2009:216).

აზერბაიჯანული „ქოროლლის“ ეპოსში გვხვდება ჩვეულებრივი ყოფისგან განსხვავებული სივრცე, სადაც ალი ქიში გადის ინიციაციას. ის ადგილი სამოთხის ნიშნებითაა აღბეჭდილი და ედემის ბაღს მოგვაგონებს. ეპოსში ვკითხულობთ: როვმანმა დიდი წვალეებით მიაღწია მიუვალი კლდის წვერს. მის თვალწინ კი გადაიშალა შემდეგი პეიჟაჟი: კლდის თავზე ყვავილოვანი და ბალახოვანი-მდელოვანი წალკლოტია.

წალკოტის შუაში ერთი ბებერი ხე დგას, ხის ქვეშ კი ორი წყარო გამოდის, ყოშაბულაღი წეროს თვალივით კრიალებს, ცრემლივით მოლიკლიკებს და გარემოს რძის ტბად აქცევს. შუალამეს კი, აღმოსავლეთით ერთი და დასავლეთითაც ერთი ვარსკვლავი ამოკამკამდა. დაიძრნენ ეს ვარსკვლავები ერთმანეთისკენ და ზედ შუა ცაზე შეიჭახნენ. ვარსკვლავების შეჭახებაზე ყოშაბულაღი ამოდულდა და თეთრი ქაფი კაცის სიმაღლეზე ამოვიდა. ამ ქაფს შეეძლო ადამიანის განკურნება და ასევე, იმ ქაფში განბანილს ქაფი ძალ-ღონეს შეჰმატებს, ლექსისა და სიმღერის ნიჭს მიჰმადლებს, ამ ქაფში განბანილი ადამიანის კვილს ვერავინ გაუძლებს და მისი მომრევი ვერავინ იქნება ქვეყანაზე (ქოროლი 2003:23-24). აზერბაიჯანული ეპოსის მიხედვით, ყოშაბულაღის მთაზე გადის ინიციაციას როვშანი, რის შემდეგაც ის ეპოსის მთავარ გმირად ქოროლიად გარდაისახება (მამისიმედიშვილი 2017: 130).

დასკვნის სახით, შეიძლება ითქვას, რომ საფარველი არის საშუალება, რითიც წმინდა ადგილი თავს იცავს უწმინდურებისგან, თუმცა არსებობენ გამორჩეული ადამიანები, რომლებიც ღირსნი ხდებიან ამ საიდუმლოს ნახვისა, რათა მათ თავიანთ შთამომავლობას გადასცენ ცოდნა ასეთი ადგილების არსებობის შესახებ.

2.3. საკრალურის დაარსება

არაერთი მაგალითი შეიძლება მოვიყვანოთ იმისა, რომ შეიძლება ჩვეულებრივი ადგილი, სადაც ადამიანები ცხოვრობენ იქცეს განსაკუთრებულ სივრცედ, სადაც თვითონ ღვთისშვილი მოინდომებს თავისი მინიერი საბრძანისის დაარსებას. ჰიეროფანია საკრალური, ღვთაებრივი ნიშანია და ჯვარი რა ადგილას დაარსდება არ არის დამოკიდებული ადამიანის ნებაზე, სწორედ ამ დროს ხდება ადგილის კოსმიზირება. ასეთი ადგილები სამოთხისებურ ადგილებად უნდა მოვიაზროთ, რადგან, პირველ რიგში, ჯვარი უწმინდურ ადგილას არ დაარსდება, ამასთან, ვიცით, ჯვრისჩენის დროს იფანი ამოდის კერიაში და ოჯახს აუწყებს, რომ ეს ადგილი უკვე არა ჩვეულებრივი საცხოვრისია, არამედ წმინდა, ჯვრის ადგილსამყოფელად გადაქცეულა. ჯვარი კერიას

ირჩევს, რადგან კერია ყველაზე წმინდა ადგილია სახლში, რომლის ირგვლივაც იკრიბება ოჯახი.

ანდრეზი „იფანი კერიაში“ მოგვითხრობს, რომ შუაღამოსში ამოსულა ხე, ეს უცნაური მოვლენა იყო. ერთი შეხედვით, ვერავინ ხვდება რომ ეს ადგილი ჯვარმა მიისაკუთრა, ამიტომაც ის ხე მოჭრეს, მაგრამ ხე მეორედაც ამოვიდა, მეორედაც მოჭრეს, უკვე მესამედ ამოსულს თან ვერცხლის შიბი ამოჰყვა, რომელიც ამ ხეზე იყო დახვეული. ამის ნახვის შემდეგ ოჯახმა ადგილი დაუთმო ჯვარს და ასე დაარსდა იქ ხახმატის წმინდა გიორგი (ანდრეზები 2009:27).

მსგავს ისტორიას მოგვითხრობს ანდრეზი „შუბნური ჯვრის დაარსება“. გადმოცემის მიხედვით, ჯვარმა დაარსება მოინდომა ნერგის ანგელოზის საარსოში, სადაც სამი ძმა ცხოვრობდა. მათ კერიაში იფანი ამოვიდა. პირველად მოჭრეს ეს იფანი, შემდეგ მეორედაც ამოვიდა და ისევ მოჭრეს, ხოლო მესამედ უკვე მას გველი ამოჰყოლია, ამის შემდეგ ძმებს სახლი დაუტოვებიათ, მაგრამ გზიდან მობრუნებულა მესამე ძმა და ცეცხლი წაუკიდა სახლისთვის, თუმცა იფანი არ დამწვარა. მესამე ძმა კი სასტიკად დაისაჯა (ანდრეზები 2009:62).

იფნის ამოსვლით დაარსდა რომის მთავარანგელოზიც, რომელიც გაზაფხულზე ამოსულა კერიაში, ორჯერ მოჭრის შემდეგ, მესამედ ამოსულს გველი ამოჰყოლია, ამის შემდეგ ოჯახი აიყარა (ანდრეზები 2009:93).

„გიორგი წყაროსგორულის დაარსების“ ანდრეზი მოგვითხრობს, რომ იმ ადგილას, სადაც ჯვარი დაარსდა, პირველად მისვლისას ერთი სახლი მოსწონებია და მკითხავის პირით შეუთვლია პატრონებისთვის სახლი დაეთმოთ მისთვის, მაგრამ მეკომური არ დასთანხმდა. ამაზე გიორგი გაჯავრდა და იფანი ამოვიდა მათ კერიაში, ეს იფნის ხე, ორჯერ მოჭრეს. შემდეგ კერიაში საჭმელი დაუკიდათ მოსამზადებლად, ამ დროს გველი ჩამოსულა საკიდლიდან, ჩაძვრა ქვაბში და შიგ მოიხარშა. ყველა დაიხოცა. გიორგი იქ დაარსდა და გიორგისვე დავალებით ეს ადგილი საქვაბედ და დარბასად გადააკეთეს. ჯვარს ადგილებიც თვითონ დაუჭერია, სადაც კარგი მამულები იყო (ანდრეზები 2009:115).

იფანი კერიაში, მეტად გავრცელებული სიუჟეტია ქართულ ჯვარ-ხატთა დაარსების შესახებ. იფნის ამოსვლა კერიაში, შეიძლება ზოგიერთი ვარიანტის მიხედვით გავიგოთ როგორც ოჯახის დასჯის ერთ-ერთი საშუალება.

საკრალური ადგილების აღმოჩენაში მნიშვნელოვანი როლი აკისრიათ ცხოველებს. ქართული მითოლოგია არაერთ გადმოცემას იცნობს, რომლის მიხედვითაც არერთი სალოცავი თუ კვრივი ადგილის აღმოჩენა ცხოველს უკავშირდება. მაგალითად, ლალანგურის დაარსება მიენერება ხარს. ერთხელ მწყემსებმა ნახეს შიბზე ჩამოსული ხატი, როგორც კაცის სურათი ისე იდგა, ხელში ხმალი ჰქონდა. ამის ნახვის შემდეგ მწყემსებმა იმ ადგილას სოფლის ხალხი მიიყვანეს და ნახეს, რომ იმ ადგილას ხარი იყო, ხატი კი ამ ხარს რქების შუაში ეჯდა. როდესაც ხარი მივიდა ხატისთვის განკუთვნილ ადგილას, ხატი ხარის რქებიდან აფრინდა და ნაშალ მიწაში დაიმალა. შიბიც გაფრინდა და დაიკარგა. ამის შემდეგ ეს ადგილი გახდა წმინდა. ხატის სამყოფელი და ხალხმაც დაიწყო იქ მსახურება (ანდრეზები 2009:54).

აქვე უნდა აღვნიშნოთ, რომ არაერთი ოსური მითოლოგიური ტექსტი მოგვითხრობს ძუარების დაარსებაზე, რომლის აღმოჩენაშიც მონაწილეობდა ხარი. ასე დაარსდა მაგალითად რექომი ძუარი. ერთხელ ვასთირჯმა გადანყვიტა სამლოცველოს აგება ისეთი ხისგან, რომელიც არასდრს დალჰებოდა. ასეთი ხის მოსატანად მან თავისი ხარები გაუშვა (მამისიმედიშვილი 2015: 88).

ცხოველის სახელს უკავშირდება გერგეტის სამების დაარსება, როცა სამმა მეფემ: ქართლის, კახეთისა და იმერეთს ვერ გადანყვიტეს, სად აეშენებინათ სამების ტაძარი, მაშინ მცხეთაში ერთმა ბერიკაცმა ურჩია, დაეკლათ ხარი და მისი ბეჭი სოფლის ბოლოს დაეგდოთ. მოფრინდებოდა ყორანი და წაიღებდა ამ ბეჭს, სადაც ყორანი ხარის ბეჭს გამოხრავდა იქ უნდა აეშენებინათ სწორედ ტაძარი (ანდრეზები 2009: 342).

მტრედის სახელთანაა დაკავშირებული „ახალჯვრის დაარსება დანოში“. დანოელებს არ ჰქონდათ ჯვარი, ამიტომაც მათ დაიჭირეს მტრედი და თქვეს, გაშვებისას, სადაც ის დაჯდებოდა იქ დაეარსებინათ ჯვარი (ანდრეზები 2009: 313). ასევე, მტრედის სახელს უკავშირდება „დიდგორის ჯვრის დაარსება“. ანდრეზის თანახმად, მტრედი აჰყვა ერთ კაცს, როცა ის საძელის უღელტეხილზე მივიდა, მტრედმა სამჯერ შემოჰკრა

ფრთები ერთმანეთს და ცეცხლი გაჩნდა. ცეცხლის ალი წავიდა გორაზე, როშკის სამხრეთით, თავბერაულის სიმაგრეში და იქ მისვლისთანავე ცეცხლის ალი ჩაქრა, ამის შემდეგ იქ დაარსდა დიდგორის ჯვარი (ანდრეები 2009:93). ანდრეები „გუდანის ჯვრის დაარსება შატილის მხარეს“ მოგვითხრობს, რომ ისიც მტრედის სახით მიფრინდა კისტინის მთაში (ანდრეები 2009:99).

საკრალურ, ღვთაებრივ ადგილად უნდა გავიაზროთ ყველა კვრივი ადგილი, სადაც არ შეიძლება ადამიანის ფეხის დადგმა, რადგან ის წმინდაა. ასეთი ადგილების რომლის აღმოჩენაშიც ცხოველები მონაწილეობენ. მაგალითად, ანდრეები „ფუძის ანგელოზის დაარსება“ მოგვითხრობს, რომ ერთ კაცს თურმე ძროხა დაუკარგავს, დიდი ძებნის შედეგად მიაგნო ერთ ადგილას, სადაც ძროხას ხბო მოეგო. ხბოს პატრონმა სცადა ხბო აეყვანა ხელში, მაგრამ ადგილიდან ვერ დაძრა, მაშინ წავიდა და სოფლებს უამბო ეს ამბავი, მაშინ ხალხიც წავიდა იმ ადგილას და როცა ვერც მათ დასძრეს ხბო ადგილიდან, მაშინ მოიფიქრეს ფუძს ანგელოზს შევედრებოდნენ. ასეც მოიქცნენ. ამის შემდეგ ხბო თავისუფლად გამოიყვანეს, მაშინ მიხვდნენ რომ ეს ადგილი ფუძის ანგელოზს ეკუთვნოდა და დაიწყო ხალხმა იქ ლოცვა (ანდრეები 2009: 27). მსგავს ისტორიას მოგვითხრობს ანდრეები „ პირიმზე - ფუძის ანგელოზი ” , ის ადგილი სადაც ფუძის ანგელოზმა ბინა დაიდო ადრე თურმე დევებს ეჭირათ, მაგრამ ხალხმა არ იცოდა თუ ის მინდორი ფუძის ანგელოზმა დაიკავა. ამ მინდორზე ძროხას ხბო მოეგო, მაგრამ ეს ხბო სახლში ვერ მიჰყავდათ. ძროხა მივიდოდა მინდორზე და იქ აწოვებდა ხოლმე რძეს თავის ხბოს. შემდეგ ერთმა მოხუცებულმა კაცმა ხალხს უთხრა, რომ ეს ხბო ფუძის ანგელოზისთვის დაეყენებინათ. ასეც მოიქცნენ და ამის შემდეგ ხბო წამოიყვანეს. იმ ადგილს კი უწოდეს ფუძის ანგელოზი და გაჩნდა იქ პირიმზე-ფუძის ანგელოზის სალოცავი (ანდრეები 2009: 284).

როგორც ვიცით, კვრივ ადგილზე გავლა აკრძალულია, მაგრამ ღამე სიარულისას შეიძლება ადამიანმა იქ თავისდაუნებურად გაიარო, ეს რომ არ მოხდეს მას თვითონ ხატი მიანიშნებს რომ იმ წმინდა ადგილას იმყოფება, ამაზე მოგვითხრობს ანდრეები „ხატის მგზავრობა“ და „ხატის გადავლა“. ერთი ანდრეები მოგვითხრობს, რომ ხატი კვრივის ადგილას რომ მივიდა მაშინ იქ ორ ნაინლად გაიყო: „ცეცხლმავ კვრივისას სწორად

გადაირავ. იმ ხვთიშვილმავ კვრივსავ ბოლო მაუარავ, ზედ არ გადაირავ. როგორც მათრახსა გაჰყევავ, ეგეთა ბაია წამოვიდავ და ისევ ცეცხლს შაუერთდავ“ (ანდრეზები 2009: 29). მეორე ანდრეზი კი მოგვიხრობს, რომ მაღალი მთიდან, სადაც სალოცავი იყო, იქიდან შუქი წამოვიდა, დაჰკრა ხატის ტერიტორიას და სწრაფადვე უკან გაბრუნდა. შუქი იყო თოვლივით თეთრი და კაშკაშა, რომელიც ცისარტყელასავით გაკრთა თეთრი და წითელი ერთმანეთში ქამრებივით და გაჭრა (ანდრეზები 2009:32).

მართალია, კვრივ ადგილზე გავლა და შესვლა არ შეიძლება, მაგრამ გამონაკლისებიც არსებობს, როდესაც თვითონ ხატი რთავს ნებას ადამიანს იქ გაიაროს. სწორედ ამაზე მოგვითხრობს ანდრეზი „საჯანგეს თავშეფარებული ქისტები“, გადმოცემის თანახმად, ხევსურებს თავს დაესხნენ ქისტები, მაგრამ ხევსურები მტერს გამოუდგნენ და ქისტებმა თავი შეაფარეს საჯანგეს ტყეში, სადაც სანების ჯვრის ნიში იყო და იქ ხევსურები არ შედიოდნენ. ქისტებიც გადარჩნენ (ანდრეზები 2009: 77).

როცა ადამიანი შეეფარება კვრივ ადგილს, ის იქ თავს დაცულად გრძნობს, რადგანაც მას იქ ვერაფერი შეეხება და ის მთლიანად მინდობილია ხატს. ქისტები სწორედ ამიტომაც შევიდნენ სხვა სივრცეში. ამგვარ მოტივს იცნობს ოსური ფოლკლორიც. გადმოცემა „ხეთაგის ტყის სასწაული“ მოგვითხრობს სწორედ მსგავს ამბავს, როდესაც ჯვარი საფარველს ადებს გაჭირვებულ ადამიანს და იცავს მას სიკვდილისაგან. ტექსტის თანახმად გაქრისტიანებულ ხეთაგს, უფროსი ძმები მოსაკლავად მისდევდნენ და მან ვასთირჯის დახმარებით თავი ტყეს შეაფარა, სადაც წმინდანმა საფარველი დაადო ხეთაგს და ძმებმა ის ველარ მოკლეს (მამისიმედიშვილი 2015:93).

ქვეთავის დასასრულს შეიძლება დასკვნის სახით ვთქვათ, რომ წმინდა ადგილები, რომელთა ნახვა ადამიანებს თავისუფლად შეეძლოთ, ისინი ისევ და ისევ იმ მიზნით დაიკარგა, საფარველი დაედო, რომ ადამიანებს თავიანთი ცოდვით არ წაეხდინათ და წმინდა ადგილი არ გაეუწმინდურებინათ. ანდრეზები მოგვითხრობენ ასევე, როგორ შეიძლება გარდაიქმნას ჩვეულებრივი საცხოვრებელი სივრცე საკრალურ სივრცედ.

2.4. საკრალური ადგილები, რომლის აღმოჩენაშიც რჩეული ადამიანები მონაწილეობენ

როგორც ირკვევა, სამოთხისებური ადგილების აღმოჩენაში ან კონკრეტული ადგილის სამოთხისებურად გარდაქმნაში მონაწილეობენ წმინდა მამები. მითოლოგიური გადმოცემები მოგვითხრობენ ჯვრის რჩეულ მკადრეებზე, რომლებმაც აღმოაჩინეს საკრალური ადგილები.

პირველი ასეთი ადგილი არის კოპალას სალოცავის დაარსება ლიქოკში, კარატისწვერზე, რომელიც აღმოაჩინა ორმა მწყემსა, ქალმა და ვაჟმა. ისინი ერთმანეთს მხოლოდ ზაფხულობით ხვდებოდნენ ხოლმე და მათ ერთმანეთთან დაძმური სიყვარული აკავშირებდათ. ერთხელაც, როცა ისინი სამწყემსურში იყვნენ კარატისწვერზე, მათ მოესმათ წივილი და დაინახეს, რომ ზეციდან ჩამოვიდა ერთი თასი და ვერცხლის ჯაჭვი. თავიდან ბავშვები შეშინდნენ, მაგრამ შემდეგ მაინც გაბედეს მისვლა. თასი და ჯაჭვი კი განაგრძობდნენ წივილსა და უღარუნს. ქალმა და ვაჟმა ეს ნივთები გაანაწილეს. ქალს შეხვდა შიბი, ამიტომაც ის ქალურის სანცისია, ხოლო ვაჟს-თასი, მამაკაცური სანცისი. სახლში არავის გაუმხილეს მომხდარის შესახებ, მაგრამ განძმა მაინც არ დამალა თავი და დაიწყო წივილი. ქალს შიბი დამალული ჰქონდა პურიან კიღობანში, ვაჟს თასი კი- ჭერხოს კარების უკან. ნივთები წივილს არ წყვეტდნენ, ქალ-ვაჟი იძულებულნი გახდნენ მშობლებისთვის ეთქვათ მომხდარი ამბავი. მკითხავმა კი უთხრა, შიბი ორად გაეჭრათ და სადაც ჩამოვარდა იქ დაეფლათ მიწაში და ზედ კომპი აეშენებინათ, ასევე თასიც უნდა დაემარხათ და მასზეც პატარა კომპი აეგოთ. ასე დაარსდა სალოცავი, მაგრამ მოჭრილი შიბის ნაწილი, ქალმა წაიღო ბულალაურთას. მკითხავები და ხუცესები კი ხედავენ, რომ ყოველ მეშვიდე წელს კარატისჯვარის კომპიდან ამოვა გველი და ბულალაურთაში ადგილის დედის კომპში ჩადის. ამას ყველა ვერ ხედავს. ამას მხოლოდ გამორჩეული ადამიანები ხედავენ (ანდრეზები 2009:58). აქვე უნდა გავალოთ პარალელი ჩრდილოეთ ოსეთში ქურთათის ხეობაში- ძივლისის ძუარის დაარსებასთან. ტექსტის მიხედვით, ქურთათის ხეობაში, შუა ზაფხულში, თოვლი მოსულა, მხოლოდ ერთ ადგილას არ მიიკარა მიწამ თოვლი. იმ ადგილას ბალახი

მწვანედ ბიბინებდა. ბალახზე იყო ორი ჯაჭვს-საკიდელი, რომლებსაც ორთქლი ასდიოდათ. ხალხმა კი ამ ადგილას, ამის ნახვის შემდეგ, სალოცავი ააშენეს (მამისიმედიშვილი 2015: 84).

გამორჩეულ ადამიანებს ასევე სიზმარში ეჩვენებათ გამორჩეული ადგილები. არაა აუცილებელი სამოთხისებური ყოფისთვის მხოლოდ ადგილის ჩვენება, სამოთხისებურ ყოფაზე მიგვითითებს წმინდანთა კრებულის ხილვა, რადგან საიქიოში ყველა წმინდანი ერთადაა შეკრებილი. ერთხელ ერთმა ხევსურმა სიზმარში ნახა, ვიციით რომ, ქართულ რწმენა-წარმოდგენებში ადამიანებს საიქიოს მოხილვა შეუძლიათ სიზმარში, ქმოდის გორზე შეკრებილი უცხო ხალხი, სულ შვიდი კაცი და ისინი ხვთისშვილები აღმოჩნდნენ (ანდრეზები 2009:205).

მთარველი წმინდანის „ყუდრო კარზე“ შესვლა მხოლოდ ჯვრის რჩეულს შეუძლია. ანდრეზი „საღვთო ეკლესია“ მოგვითხრობს, რომ მხოლოდ ერთ დეკანოზს შეუძლია მისვლა და სხვა არავის. ეს ეკლესია კლდეშია და იქ ვერავინ მივა, დეკანოზის გარდა, რადგან ხატმა ასე იწება (ანდრეზები 2009: 252). აღმოსავლეთ საქართველოს მთიანეთის ჯვარ-ხატთა მიწიერ საბრძანისში შესვლა უმეტესად მხოლოდ ჯვრის რჩეულებს შეუძლიათ საგანგებო განწმენდის შემდეგ.

ბეთლები არის ქრისტიანებისთვის ერთ-ერთი ყველაზე წმინდა ადგილი, რომელიც უკავშირდება ქრისტეს დაბადებასა და წმინდა დავით წინასწარმეტყველს, ამიტომაც საინტერესოა, რომ საქართველოში ბეთლემის სახელწოდებით გვხვდება უბანი თბილისში, სოფელი სენაკის რაიონში და გამოქვაბული ყაზბეგის რაიონში.

მცინვარწვერის ბეთლემზე უძველესი ჩანაწერი ვახუშტი ბაგრატიონს ეკუთვნის, რომელიც წერს: „მცინვარის კლდეა შინა არიან ქუაბნი გამოკუეთილნი ფრიად მაღალსა, და უწოდებენ ბეთლემსა, გარნა საჭიროდ ასავალი არს, რამეთუ არს ჯაჭვი რკინისა, გარდმოკიდებული ქუაბიდან, და მით აღვლენ. იტყვიან უფლის აკუანსა მუნ და აბრაჰამის კარავსა, მდგომსა უსუეტოდ, უსაბლოდ, და სხუათაცა საკვირველთა. არამედ მე ვღუმებ“ (ქართლის ცხოვრება 1973: 357). ვახუშტი ბაგრატიონი ღუმს, რადგან არ შეიძლებოდა ბეთლემის საკრალური სივრცის საიდუმლოს გათქმა.

ხალხური გადმოცემები კი მოგვითხრობენ ბეთლემის გამოქვაბულის ოქროს აკვანზე, ოქროს მტრედებზე, უსვეტოდ მდგარ აბრაამის კარავზე (ანდრეები 2009: 339). სწორედ ეს ბეთლემი მოინახულა მღვდელმა იოსებ მოხევემ, რომლის სათნოების და სინმინდის ამბავიც განთქმული იყო მთელს ქვეყანაში, მან ღვთის ნებით მოინახულა კაცთაგან შეუვალი ადგილი და ნახა კარავი და აკვანი აბრაამის. მან მეფე ერეკლეს იქიდან წამოუღო ნაჭერი აბრაამის კარავის (ანდრეები 2009: 339).

ბეთლემი გარდა იოსებ მოხევისა მოიხილა, ასევე გერგეტის უდაბნოში განთქმულმა მონადირემ და ღვთისმოყვარე ბერმა, მამუკამ. მას ძილში გამოეცხადა მზესავით ელვარე ჭაბუკი და უთხრა, რომ ის ბეთლემის წმინდა გიორგი იყო და ის თავისი ღვთისმოსაობის გამო ღირსი გახადა, რომ მოეხილა მისი საცხოვრისი მყინვარზე. მამუკა, სანამ მყინვარისკენ გზას გაუდგებოდა, მანამდე ლოცულობდა, მარხულობდა და ყოველდღე რძეში იბანებოდა. როცა უკვე მყინვარისკენ გზას გაუდგა, თან წაიყოლა თავისი ძმისწული, ორი დღე იარეს. მესამე დღეს მიადგნენ დიდ უფსკრულს. მაშინ მამუკამ სცადა თოკით ჩასვლა, მაგრამ რომ ჩავიდა ძმისშულს ხელიდან გაუვარდა თოკი და თვითონ ველარ შესძლო ჩასვლა. მამუკამ უთხრა, რომ ორი დღე მოეცადა მისთვის. მესამე დღეს უკან დაბრუნებულმა კი ასეთ რამეს მოჰყვა, რომ საყდარი ერთ უშველებელ, თივის ბულუღასავით მომრგვალებულ, სულ მთლიანად ლუსკუმ ყინულის მთაზე იდგა. მთისძირიდან წვერამდე შიგ ყინულში გამოკვეთილი კიბე აუყვება. კიბე რომ ავიარე დავინახე მთის წვერი, რომელიც საგანგებოდ გადაჭრილს ჰგავდა. კალოსავით მრგვალი და ხელისგულივით მოსწორებული ვაკე ისე ლაპლაპებდა მზეზე, რომ გაყინული ტბა გეგონებოდა. იქიდან ჩანდა მთელი ცისკიდური, ზღვა და ხმელეთი. ყინულის სარკეში ჩახედვისას კი მამუკამ დაინახა ქვესკნელი. საყდარში ეკლესიის გუმბათი ვარსკვლავებისაა, იატაკი სულ თვალ-მარგალიტით არის მოჭედილი. შუაგულ იატაკზე ოქროს აკვანი დგას, ისიც პატიოსანი ქვებით მოოჭვილი, ზედ მტრედი აზის და არწევს. ხოლო საკურთხეველში ნანახი არ გასცა მამუკამ, მაგრამ ბოლოს გულმა ვერ მოუთმინა და უამბო ძმისწულს იქ ნანახიც, მაგრამ აკრძალვა რადგან დაარღვია, იგი დაისაჯა და დაღუპდა (ანდრეები 2009: 340).

ბეთლემი რომ გამორჩეული ადგილია, ამაზე მიანიშნებს სწორედ ისიც, რომ მან შეაღწია მწერლობაშიც. კერძოდ, ილია ჭავჭავაძის „განდეგილში“, რომელიც ბეთლემის შესახებ წერს:

„იმ ტაძრის მადლი მთიულთა შორის ყველგან განთქმულა
და ის ადგილი, ის არემარე ესოდენ წმინდად სწამს დღესაც ერსა,
რომ ნასროლს ნადირს, მუნ შეფარებულს, მონადირეც კი ვერ ახლებს ხელსა“
(ჭავჭავაძე 2007: 217).

ასეთი ადგილები, როგორც ბეთლემია, უმეტესად დაფარულია. ადამიანებმა ეს სიწმინდე თავიანთი ცოდვების გამო დაკარგეს. მათ დაკარგეს უფლება, რომ მისი ნაწილი გამხდარიყვნენ. რჩეულები ღირსნი ხდებიან ამ ადგილების მონახულებისა, რათა შემდომ მათ თავიანთ შთამომავლობას დაუტოვონ ცოდნა ასეთი ადგილების შესახებ.

III თავი

დემონურ არსებათა სამოქმედო სივრცე

ხალხის წარმოდგენით, სამოთხე და ჯოჯოხეთი ერთმანეთის გარეშე არ არსებობს. თუ არსებობს საკრალური სივრცე, მაშინ არსებობს მისი საპირისპირო - ჯოჯოხეთური სივრცე. ხალხურ ტექსტებში ჯოჯოხეთი არის ეშმაკების, ცოდვილ და დაწყვევლილ არსებათა საცხოვრისი, მათი საარსებო სივრცე. ამიტომაც ჯოჯოხეთის განსახიერებად დედამიწაზე უნდა მივიჩნიოთ ის ადგილები, სადაც დემონური არსებები იკრიბებიან. რა ადგილი უკავია ადამიანთა სამოქმედო სივრცეში ტყეს, მინდორს, წისქვილს, მთას, ხიდს. დემონურ არსებათა შეკრების ადგილი ხომ არ არის წარმოსახვითი? რას გამოხატავს ხალხურ გადმოცემებში ქაჯ-ეშმაკთა შეკრება, როდის იკრიბებიან ისინი და მოეძებნებათ თუ არა მათ პარალელები არა მხოლოდ მეზობელ ხალხთა ფოლკლორში, არამედ უფრო დაშორებულ ხალხებთანაც.

3.1. ქაჯავეთი

პირველი ადგილი, რომელიც უნდა მივიჩნიოთ საკრალური სივრცის საპირისპიროდ, არის ქაჯებით დასახლებული ადგილი, ქაჯავეთი. წარმოდგენა რომ შეგვექმნას, როგორი არსებები არიან ქაჯები უნდა ვნახოთ, როგორი განსაზღვრება აქვთ მათ მითოლოგიურ ლექსიკონში.

მითოლოგიური ლექსიკონის თანახმად, ქაჯი ეს არის ავი სული, მავნე, რომელიც მსოფლიო ხალხებში ასოცირდება ყოველგვარ ბოროტულ სანცისთან, რომელიც ღმერთს უპირისპირდება. ქართულ ენაში იგი სინონიმია ეშმაკის. პირველი ადამიანი, რომელიც გაეშმაკდა იყო ლილითი, ადამის პირველი ცოლი უძველესი გადმოცემებისა და ბიბლიური პირველწყაროების მიხედვით, ლილითი ადამთან განშორების შემდეგ ცოლად გაჰყვა უზენაესს ეშმაკს და იქცა ბოროტ დემონად, ქაჯად. ცრუ რწმენებისა და სხვადასხვა რელიგიების მიხედვით ქაჯი ემორჩილება „ქაჯთა მთავარს“ და მას მართლ მოქმედება არ შეუძლია, ხოლო ქაჯავეთი ეს არის ქაჯთა ციხე-ქალაქი (გელოვანი 1983: 513).

ქაჯავეთი, როგორც ეშმაკის, დემონის სამყოფელი ადგილი, სივრცულ განზომილებაში ჯოჯოხეთის გამოვლინებას წარმოადგენს. ქაჯავეთი, ხალხური ტექსტების მიხედვით, ისევე როგორც „ვეფხისტყაოსანის“ ქაჯეთი, მიღმა სამყაროში მდებარეობს. იქ სამოგზაუროდ აუცილებელია რაიმე მიზეზი არსებობდეს, რადგანაც ეპოსებიდან ჩვენ ვიცით, რომ მიღმა სამყაროს გმირები კონკრეტული მიზეზით სტუმრობენ. მაგალითად, საიქიოს, როგორც მიღმა სამყაროს გამხატულებას, გილგამეში სტუმრობს, რათა გაიგოს როგორაა ის მონყობილი. ნართი გმირი სოსლანი საიქიოში მიდის, რადგან იქიდან წამოიღოს აზა მცენარის ფოთლები, რომელიც საცოლეს მოაპოვებინებს და ა.შ.

ყოველგვარ უწმინდურობას და ბოროტებას უპირისპირდება მხოლოდ წმინდა ადამიანი, ამიტომაც ქაჯავეთს ლაშქრავენ კიდევ ღვთისმშვილები, თუმცა მათ თან ახლავთ ხორციელი ადამიანი, გამორჩეული პიროვნება, ჯვრის მკადრე - გახუა მეგრელაური. საინტერესოა, როგორ ხდებოდა ცოცხალი ადამიანის ქაჯებთან წაყვანა,

რადგანაც ქაჯები ადამიანთა წარმოდგენით უსხეულო არსებები არიან. სწორედ ამიტომაც ღვთისშვილები ადამიანს სულს ამოაცლიდნენ, სხეულს ქვიშაში/მინაში დამარხავდნენ და ისე მიჰყავდათ ის ქაჯავეთში (ანდრეზები 2009: 38). კაცი, რომელიც ღვთისშვილებმა ქაჯავეთში წაიყვანეს იყო გახუა მეგრელაური, რომელმაც შემდეგ ქაჯავეთში ლაშქრობა აღწერა. მისი მონათხრობით, ქაჯავეთში მისვლისას ისინი თურმე ტყეში დამალულან და დაღამებას დალოდებიან. აქედან ვიგებთ, რომ ქაჯების სამყოფელიც ჩვენი ქვეყნის წყობაზეა მოწყობილი და რომ იქაც არის ტყეები და რომ იქ დრო-ჟამის ცვლილება ხდება.

ქაჯების იარაღი ღვთისშილთა წინააღმდეგ არის უწმინდური ცხოველი, კატა. ამიტომაც იქ მისულ ღვთისშვილებს ესვრიან კატის თავ-ფეხს. თუ ის მოხვდება ღვთისშვილს, მაშინ ის აუცილებლად დაზიანდება. ანდრეზების თანახმად, ღვთისშილს მოხვდა კატის თავ-ფეხი და მან ღვთისშვილს წააცალა ფეხი (ანდრეზები 2009:41). ჩვენ ვნახეთ წინა თავში, რომ საკრალური სივრცისა და სინმინდის დაკარგვა სწორედ კატის სისხლის მეშვეობით გახდა შესაძლებელი.

ქაჯავეთში ღვთისშვილები სხვადასხვა სახით შედიან. თუ სამოთხეში მტრედის სახით შედიან, ერთი გადმოცემის თანახმად, ქაჯებში მოხვედრა შეიძლება ბუმის სახით. სწორედ ბუმს სახით შეფერინდა ხახმატის ჯვარი ქაჯავეთში (ანდრეზები 2009:46). მეორე გადმოცემის თანახმად, ხახმატის ჯვარს ქაჯავეთის აღება გასჭირვებია, ამიტომაც ხან ირმის სახით წასულა, ხან ღრუბლის სახით, მაგრამ რამდენჯერაც მისულა არ შეუშვიათ, სულ ისარი დაუშენიათ. ბოლოს ცხენის ორმოში ჩამძვრალა და ისე შეჰპარვია ქაჯებს ციხეში (ანდრეზები 2009: 47). აქვე უნდა შევნიშნოთ ისიც, რომ რადგან ქაჯავეთი მიღმა სამყაროა, როგორც საიქიოში იქაც ადამიანი თავისი პირვანდელი სახით ვერ შევა, საჭიროა მან განიცადოს მეტამორფოზა.

ქაჯავეთში ღვთისშილთა ლაშქრობის სხვადასხვა გადმოცემები არსებობს, ამ გადმოცემებიდან ვიგებთ ჩვენ როგორ არის ქაჯთა სამეფო მოწყობილი და როგორ შეიძლება მათი განადგურება. მაგალითად ერთ-ერთი გადმოცემის თანახმად, წმინდა გიორგი მარტო წასულა ქაჯებში, მხოლოდ ერთი ხორციელი კაცი გაუყოლებია თან, რა თქმა უნდა, მხოლოდ მისი სული წაიყვანა. გიორგი მისულა ქაჯავეთში სამჭედლოში,

სადაც მჭედლის სინა მოეწონა. აილო გიორგიმ ის და დაუნყო გრდემლის დარტყმა. სინა თუ გატყდებოდა, მაშინ მთელი ქაჯეთი ამოწყდებოდა (ანდრეზები 2009: 48). ამ ანდრეზიდან ვიგებთ, რომ ისევე როგორც ადამიანთა საცხოვრისს აქვს თავისი რელიგიური ცენტრი სალოცავის სახით, ქაჯავეთში ქაჯაველებსაც აქვთ თავიანთი ცენტრი სამჭედლოს სახით.

მაშასადამე, ქაჯავეთის განადგურება მხოლოდ წმინდანებს შეუძლიათ და თუ იქ ადამიანი მივა, მხოლოდ მის სულს შეუძლია შესვლა. ხორციელად იქ შესვლა შეუძლებელია. ერთი თუშური გადმოცემის თანახმად, ქაჯეთში მოხვედრა შეიძლება ქაჯის ქალის დახმარებით. ანდრეზი „თუში ქაჯეთში“, მოგვითხრობს რომ ერთ თუშ კაცს გზაზე შეხვდა ძალიან ლამაზი ქალი, რომელიც ერთი შეხედვით მოეწონა. ქალი გვერდით ჩავლისას მას დაეჯახა და შემდეგ თუშს აღარათფერი ახსოვდა, რომ გამოიღვიძა უკვე ქაჯეთში იყო. მას ეგონა იქ რამდენიმე დღე დარჩა, თუმცა აღმოჩნდა რომ მისი დაკარგვიდან სამი წელი გასულიყო (ანდრეზები 2009: 91).

მაშასადამე, ქაჯავეთში, როგორც „სხვა“ სამყაროში დრო-ჟამის ცვლილება ხდება წელი. იქ ერთი დღე ერთ წელს უდრის, მსგავსად ქართული ზღაპრისა „უკვდავების მაძიებელი ჭაბუკისა“. ფშაველების წარმოდგენით, ქაჯავეთი არის ის ადგილი, სადაც ავსულები ცხოვრობენ, ამასთან ეს ავსულები არიან ბრძენნი, მაგრამ ბოროტნი. მათი ქყვეყანა მდებარეობს უდაბურ, კლდოვან ადგილას, უსიერ ტყეში. იქ ყველა ვერ მოხვდება. ქაჯავეთში მისვლა შეუძლია მხოლოდ მას, ვისაც აქვს ძალა, სიბრძნე და საჭირო გამოცდილება, ამიტომაც იქ მხოლოდ ღვთისშვილები მიდიან, მაგრამ ადამიანსაც შეეძლო ქაჯავეთში ჩასვლა და ეს ადამიანი იყო თორღვა (ანდრეზები 2009: 220).

კლდოვანი/ მიუვალი ადგილი ადამიანისათვის არის გარე სამყარო, სადაც ადამიანის წარმოდგენით ბოროტი ძალები ცხოვრობენ და ისინი საფრთხეს უქმნიან ადამინებს, მაშინ როცა „შინა“ წარმოადგენს მონესრიგებულ სამყაროს (მამისიმედიშვილი 2017: 32). ამიტომაცაა რომ ხალხს, ქაჯების, კუდიანების, დემონების საცხოვრებელ ადგილად წარმოუდგენიათ მიუვალი და საშიში ადგილები.

ანდრეზების თანახმად, ქაჯავეთელ ქალებს ქსოვა ისე შეეძლოთ, რომ მათი წალმა-უკუღმა ნაქსოვი არ ჩანდა. ობობას ქსელივით ქსოვდნენ, უჩინარს, ამიტომაც ვინც მათ ნაქსოვს მოისხამდა უჩინარი გახდებოდა. მას არც ტყვია მიეკარებოდა, არც ისარი. ასეთი ნაქსოვი მოსასხამი მზგმე ლივლივებდა როგორც გველის პერანგი. ასეთი მოსასხამს ქაჯები მხოლოდ ნაწილიან ადამიანებს აძლევდნენ (ანდრეზები 2009: 221).

როგორ არის ქაჯების ქვეყანა მონყობილი? ეშმაკები უკუღმა ლაპარაკობენ და ყველაფერს უკუღმა აკეთებენ. მაგალითად, ერთმა რომ თქვას სახლი დაანგრეო, მეორე მის შენებას დაიწყებს. მათი ადგილსამყოფელი კლდეებში, გამოქვაბულებშია. ისინი, ასევე ცხოვრობენ ძველ ნასახლარებში, მიტოვებულ სოფლებში. მათი ქალები ადამიანს ლამაზი გარეგნობით ეჩვენებიან, მაგრამ მათ კოჭი მოქცეული აქვთ. ღამე მათ ტერიტორიაზე გავლილ კაცს აეკიდებიან და თავის სახელს მისძახიან, ამიტომაც ისინი ადამიანებს აგიუებენ. ქაჯები ღამ-ღამობით იკრიბებიან მინდორში ან ტყის შუაგულში და ცეცხლი აქვთ გაჩაღებული (ანდრეზები 2009: 221).

თ. ოჩიაურს წიგნში „მითოლოგიური გადმოცემები აღმოსავლეთ საქართველოს მთიანეთში“, აქვს თავი „თქმულება ქაჯავეთის დალაშქვრაზე“, საიდანაც ვიგებთ, რომ ქაჯებს ქაჯავეთში ჰქონდათ საფეხვნო და რომ ისინი ცნობილი იყვნენ მჭედლობით და რომ ქაჯავეთში ბევრი სამჭედლო იყო. ჯედვა რომ უშუალოდ მათი საქმიანობა იყო ამის დასადასტურებლად მას მოჰყავს ციტატები ლექსიდან:

„ჯაჯვმა თქვა სამანქანურმა

ქაჯებმ ამასხეს თითია“

(ოჩიაური 1967: 83).

მაშასადამე, განხილული მასალიდან, ვიგებთ თუ როგორაა მონყობილი ეშმაკთა საცხოვრისი და როგორ შეიძლება დავამარცხოთ და გავანადგუროთ ასეთი ადგილი. ეს შესაძლებელია ისევ და ისევ ღვთის მეშვეობით. ამიტომაც იქ მიდიან ღვთისშვილები, თუმცა უნდა აღინიშნოს ისიც, რომ ღვთისშვილები ყველაფერს არ ანადგურებენ ქაჯეთის ქვეყანაში და იქიდან მოჰყავთ ქაჯის ქალები, საქონელი და ნივთები, რომლებიც საფუძვლად დაედო მათ საკრალურ ყოფას: თასი, ზარი და სხვ.

ჩვენ როცა ქაჯებზე ვსაუბრობთ, არ შეიძლება არ მოვიხმოთ რუსთაველის „ვეფხისტყაოსანი“, რადგანაც იქ ერთ-ერთი მთავარი სამოქმედო ადგილი არის ქაჯების ქვეყანა და ქაჯეთის ციხე, სადაც ნესტან-დარეჯანი ჰყავთ დატყვევებული. მნიშვნელოვანია ის ეპიზოდები, სადავ ფატმანი ქაჯებს და ქაჯეთს აღწერს, რადგანაც ავთანდილის ისინი წარმოედგინა როგორც უხრცონი, ხოლო ფატმანმა დაუხასიათა ქაჯები და უთხრა რომ, მათ ქაჯები იმიტომ ერქვათ, რომ ისინი ერთად ცხოვრობდნენ, იყვნენ გრძნეულები და ადამიანების მავნებლები. ქაჯებს ყველანაირი ჯადოქრობის ჩადენა შეეძლიათ. მაგალითად, მტერს თვალებს დაუბრმავებენ, საშინელ ქარს აღძრავენ, ნავს ზღვაზე დაამხობენ, წყალს დააშრობენ. მათ შეეძლოთ დღის დაბნელება და ღამის დღედ ქცევა (ვეფხისტყაოსანი: 1256-1258).

მნიშვნელოვანია დავადგინოთ, თუ რატომ ლაშქრავენ ღვთიშვილები ქაჯავეთს, რატომ სტუმრობენ გმირები საიქიოს. მაგალითად, ოსური ნართების გმირი სოსლანი სტუმრობს საიქიოს, რათა მოიპოვოს აზა მცენარის ფოთლები, გილგამეშიც ჩადის საიქიოში, რათა ნახოს ენქიდუ. ვიცით, რომ საიქიოს იმიტომ სტუმრობენ გმირები, რომ იქიდან წამოიღონ გარკვეული ცოდნა, რადგან იქ ინახება კაცობრიობის ცოდნა და გამოცდილება. გარდაცვალებისას ადამიანს თან მიჰყვება მისი ცხოვრებისეული გამოცდილება, ამასთანავე მიცვალებულებმა იციან ცოცხლებში რა ხდება და ვის რა ბედი მოეწივს, მაგრამ რა მიზნით სტუმრობენ ღვთიშვილები ქაჯავეთს? წმინდა გიორგის ქაჯავეთში ლაშქრობაზე ხალხური ლექსიცაა, რომელიც მოგვითხრობს რომ, თურმე ღვთისმშობელმა გიორგის ჰკითხა, რატომ მიდიოდა ქაჯებში

„ქაჯავეთ რად იარები,

გიორგივ, მგელთა ფერაო?“

ხოლო გიორგიმ უპასუხა, რომ ქაჯებს მისი ვალი აქვთ და იმ ვალის მოსათხოვნად მიდიოდა მათთან (ხალხური პოეზია 1972: 116).

თუ ანდრეგებს დავაკვირდებით, ვნახავთ, რომ ღვთიშვილებს ქაჯავეთიდან მიჰყავთ საქონელი და ქაჯის ქალები. ანდრეგების თანახმად, წმინდა გიორგი ანადგურებს სამჭედლოებს და ამ სამჭედლოდამ მოაქვს მას ჯაჯვი. რას უნდა ნიშნავდეს ამ ჯაჯვის წამოღება? თ. ოჩიაურის აზრით, ღვთისშვილები იმიტომ სტუმრობდნენ

ქაჯავეთს, რომ იქიდან წამოეღოთ საკრალური ნივთები და საიდუმლო ცოდნა, მათ შორის მჭედლობის საიდუმლო (ოჩიაური 1967:86).

დასკვნის სახით, შეიძლება ითქვას, რომ ხალხურ ტექსტებში დემონურ არსებათა სივრცე მრავალფეროვნადაა წარმოდგენილი, რადგან, როგორც წესი, ავი სულები ცდილობენ ადამიანებს ავნონ, მაგრამ მათ სამყოფელში მოიპოვება ისეთი ნივთები, რომლებიც ადამიანებს სარგებლობას მოუტანს. თუნდაც ქაჯების უჩინარი ნაქსოვი მოსასხამი, რომელშიც ადამიანს ხმალი ვერაფერს დააკლდებდა. თუმცა, ხალხური ტექსტების ლოგიკით, ასეთი ადგილი უნდა დაილაშქროს, იქ დატყვევებული უნდა გათავისუფლდეს და იქიდან წამოღებული ცოდნა და განძი ადამიანთა კეთილდღეობას მოხმარდეს.

3.2. ნაძრახი ადგილები

ნაძრახ ადგილს აღმოსავლეთ საქართველოს მთიანეთში „რიოში“ ჰქვია. რიოში არის იგივე უწმინდური, ბინძური, საკრალურის საპირისპირო სივრცე. ნაძრახი ადგილები სოფელსა და მის შემოგარენში ჰქვია ისეთ სივრცეს, რომელთა ახლოს გავლას ადამიანი ერიდება. თვითონ სიტყვა ნაძრახი ნიშნავს სახელგატეხილს. ხალხური წარმოდგენების მიხედვით, ნაძრახ ადგილებში ავი სულები იკრიბებიან. ასეთი ადგილებად კი უნდა მივიჩნიოთ: წისქვილი და მისი შემოგარენი, რადგან წისქვილი ეს არის უცხოთა და შინას გარდამავალი სივრცე. ნაძრახ ადგილებად ხალხურ ტრადიციაში მიჩნეულია აგრეთვე ხიდი, ტყე და კაკლის ხე.

3.2.1. წიქვილი

ხალხური ტექსტების მიხედვით, ადამიანთა საცხოვრებელი სივრცის მახლობლად ბოროტი სულების თავშეყრის ადგილად და საკრალურის საპირისპირო სივრცედ მოიაზრება წიქვილი და მისი შემოგარენი. წიქვილი, როგორც წესი, მდებარეობს სოფლის, ადამიანთა საცხოვრებელი სივრციდან მოშორებით, ტყის პირას. ამიტომაც ხალხის წარმოდგენაში იგი არის უცნაური, შიშის მომგვრელი ადგილი, სადაც უმიზნოდ არავინ გაივლის და შიგნითაც არავინ შეიხედავს. ამას რა კავშირი უნდა ჰქონდეს კუდიანებთან? გადმოცემების მიხედვით, სოფელში მცხოვრები კუდიანი ქალები შებინდებისას სოფლის გარეთ გადიან, წიქვილის სიახლოვეს მგლებად იქცევიან და ფარას ანადგურებენ. ა. ნადარაიას აზრით, მგელი და ტურა კუდიანებისთვის განკუთვნილი ცხოველები არიან და რომ დასავლეთ საქართველოში კუდიანობას ტურაობას ეძახიან (ნადარაია 1980:187). იმას რომ, კუდიანები მგლად იქცეოდნენ ადასტურებს თუშური გადმოცემა „კუდიანი დედაკაცი“, მთქმელის თქმით ერთმა დედაკაცმა ტანსაცმელი სულ გაიხადა, მიწაზე გაგორდა და მგლად იქცა (ანდრეგები 2009: 332).

ადამიანის მაქციობის თემა, მეტად გავრცელებულია მსოფლიო ხალხთა ფოლკლორში. შეგვიძლია პარალელი გავავლოთ, იაპონურ მითოლოგიასთან, რომლის თანახმადაც, ბაკემონო - დემონი, იცვლის თავის სახეს და იღებს ცხოველის სახეს, მაგალითად კატის სახეს (<http://www.faena.com/aleph/articles/ghosts-and-demons-of-japanese-folklore/>).

ბ. მამისიმედიშვილი წიგნში „საკრალური ისტორიები“, როდესაც განიხილავს კუდიანებს წერს, რომ მგლადქცეული კუდიანი იტაცებდა ცხვარს და შემდეგ ისევ ადამიანის სახეს იღებდა. ისინი მაქციობდნენ სოფლის განაპირას, წიქვილის სიახლოვეს, რაგდანაც იქ ერთი სახის საგანი მეორე სახისად გადაიქცევა. წიქვილის ადგილმდებარეობამ მისტიკური სახე მიიღო და ლამეული თავგადასავლებისათვის შესაფერისი გარემო შექმნა(მამისიმედიშვილი 2017: 201), ასევეს სხვა სტატიაში ბ. მამისიმედიშვილი წერს, რომ წიქვილი, მწყემსი, ცხვარი, კუდიანი, მგელი -

დემონოლოგიური თქმულებების მნიშვნელოვანი ელემენტებია. წისქვილის სიახლოვეს მინა თითქოს მაგიურ ძალას იძენს, რომელსაც ადამიანს სხვა სახეობის არსებად გადაქცევა შეუძლია (მამისიმედიშვილი 2018)

წისქვილში რომ უცნაური ამბები ხდება, ამას ადასტურებს არაერთი ფოლკლორული გადმოცემა. სწორედ ამიტომაც ადამიანებს წისქვილი წარმოუდგენიათ დემონოლოგიური არსებების შეკრების ადგილად¹. სწორედ ამიტომ ხალხი წისქვილს და მის მიმდებარე ტერიტორიას მიიჩნევს ნაძრახ ადგილად. ეს რომ ნამდვილად ასეა, ამაში დაგვარწმუნებს 2017 წლის საჩხერეში ჩატარებული ფოლკლორული ექსპედიციის მასალები.

ფოლკლორულ მასალებში ერთ-ერთი მთქმელი იხსენებდა ბაბუის მოყოლილ ამბავს, რომ წისქვილიდან გამოსულს, წისქვილთან ახლოს დახვდა ანთებული ცეცხლი, რომლის გარშემოც ჭინკები შეგროვილიყვნენ და ტაშს უკრავდნენო (თსუფა №31141).

მთქმელი ნუკრი ლობუანიძე იხსენებს, რომ წისქვილთან ღამით გავლას მთელი სოფელი ერიდებოდა, რადგანაც იცოდნენ რომ ჭინკები ღამით წისქვილთან იყრიდნენ თავს, თანაც მთქმელის თქმით, წისქვილში მოკლეს ბაბუამისის ძმა. ამის გარდა წისქვილს კიდევ ბევრი ცუდი რამ უკავშირდება (თსუფა №31142).

ა. ნადარაია, როცა განიხილავდა დემონოლოგიურ საკითხებს საქართველოში, ერთგან წერდა, რომ კუდიანი სხვას კუდიანად გადააქცევდა წისქვილში, თმის მოფუჩქნით (ნადარაია 1980:186).

წისქვილზე ასეთი წარმოდგენა გავრცელებულია არა მხოლოდ დასავლეთ საქართველოში, არამედ აღმოსავლეთ საქართველოს მთიანეთშიც. მაგალითად, ანდრეზი, „ეშმაკის გუდა“, მოგვითხრობს რომ ერთი დედაკაცი წისქვილში წასულა და ის ადგილი სულ ეშმაკებით ყოფილა სავსე (ანდრეზები 2009: 332). ასევე, ანდრეზი „კუდიანი დედაკაცი“ მოწმობს იმას, რომ კუდიანების შეკრების ადგილი შეიძლება წისქვილი იყოს და რომ დედაკაცები წისქვილთან ახლოს, მიწაზე გაგორებით მგლად

¹ 2016 წელს ხორხის ხეობაში ფოლკლორული ექსპედიციის დროს, ტყის პირას ექსპედიციის მონაწილეებმა მოვიხსნა ერთი წისქვილი, რომელიც მიტოვებული ჩანდა. იქ ვნახეთ მგლის მიერ მოტაცებული ცხვრის ჩონჩხი.

იქცევინ, რადგანაც, მთქმელის თქმით, მან ეს დაინახა და ისიც დაინახა, ცხვარი როგორ მოჰპარა, შემდეგ ადამიანდ გადაქცეული წისქვილის მხრიდან როგორ გამოვიდა (ანდრეზები 2009: 333).

წისქვილი რომ ეშმაკების შეკრების ადგილია, მოგვითხრობს ანდრეზი „შეთე და ეშმაკი“. ერთხელ ქუმელაურთელი შეთე გულუხაიძე, ხომანის ჭალაში, წისქვილში ყოფილა. ცეცხლის პირს მჯდარა. ამ დროს შესულა იქ ერთი ქალი, რომელიც სხვასაც ეპატიუებოდა, მოდი, შეთეს რა კარგი ცეცხლი უნთია გავთბეთო, მაგრამ შეთემ შეხედ ქალს და დაუნახა რომ ფეხები უკუღმა ება (ანდრეზები 2009: 334).

ანდრეზი „ეშმაკის ფერხული“ მოგვითხრობს, რომ გვიან ღამით წისქვილიდან გამოსულ ალუღაიძე იროდის უნახავს ეშმაკებს ცეცხლი უნთიათ და ერულა ჩაუბამთ, გარშემო უვლიან ცეკვა-თამაშით (ანდრეზები 2009: 335).

ზემთ მოხმობილი მაგალითებიდან ჩანს, რომ ხალხის ცნობიერებაში წისქვილმა მისტიკური ადგილის თვისება შეიძინა, სადაც შეიძლება ერთი სახეობის საგნის სხვა სახეობის საგნად (ხორბლის ფქვილად) გარდაქმნა. მენისქვილეს ამ ტიპის თქმულებებში დემონური თვისებებით აღიჭურვა.

3.2.2. ხიდი

ხიდი, როგორც ნაძრახი ადგილი ისე უნდა გავიაზროთ, რადგან კუდიანთ წუხრას შესახებ არსებული გადმოცემები, რომელიც ჩანერილია აღმოსავლეთ საქართველოს მთიანეთში, მოგვითხრობენ იმის შესახებ, რომ ამ დღეს ეშმაკები განიხილავენ ადამიანის ბედს და თუ ადამიანებს სურთ გაიგონ, რა მოელოთ, მაშინ ისინი უნდა წავიდნენ ხიდზე. მაგალითად, ერთ-ერთი ანდრეზის მიხედვით, ამ დღეს ხიდზე მიდიან, რათა მოუსმინონ ეშმაკებს, რადგანაც ისინი ამ დღეს განიხილავენ ადამიანის ბედს, ვის რა მოუვა, ვის ვისზე გაათხოვებენ და ვის ვინ მოუკვდება. კუდიანების მოსასმენად წასულ კაცს ისინი მოაჩვენებენ გველს, ეშმაკს, ხიდზე მწოლარეს უზარმაზარ წყალს გადაატარებენ, ქვის ლოდებს დააგორებენ. ისინი იკრიბებიან აჩხოტის ველზე, სადაც კუდიანების სულები

ცოცხზე გადამჭდარი მიდიან. იქიდან დაბრუნებული სულები, თუ თავიანთ სხეულებს უძრავად ნახავდნენ, ისევ შიგნით ბრუნდებოდნენ (ანდრეზები 2009:133).

ხიდი რომ დემონურ არსებებთანაა კავშირი ამას ადასტურებს ოსური ნართების ეპოსის პერსონაჟი სირდონი, ნართების ჭირად დაბადებული, ცბიერი და შორსმჭვრეტელი კაცი, რომელმაც იცოდა ყველაფერი, რა იყო და რა მოხდებოდა, ცხოვრობდა ხიდისყურთან და მისი სახლის ასავალ-დასავალი არავინ იცოდა (ნართები 1977:103).

აღსანიშნავია, რომ აღმოსავლეთ საქართველოს მთიანეთში ჯვარში მიმავალი ხევისბერი ხიდზე, როგორც უწმინდურ ადგილზე არ გაივლიდა. ის ხიდს უეჭველად გვერდს აუქცევდა, რაც უნდა ყინვა ყოფილიყო, პირდაპირ მდინარეში გაივლიდა, რათა ხიდზე, როგორც „რიოშ“ ადგილზე არ გაუწმინდურებულიყო.

ხიდის გარდა, უწმინდურ ადგილად ითვლებოდა ორი გზის შესაყარი. დ. ხიზანიშვილის ცნობით, თშავლები წილს უყრიან ადამიანს, რათა გაიგონონ ეშმაკების მისნობა, ამისათვის ის უნდა წავიდეს ორი გზის შესაყარზე, მაგრამ თან არ უნდა წაიღონ იარაღი, რადგანაც ის ღვთისგან ნაკურთია და ეშმაკებს მისი ეშინიათ. მისნად წასულ ადამიანებს შორის ერთ-ერთი უნდა იყოს პირმშო, რადგან უიმისოდ ვერაფერს გაიგებენ მისნები (ხიზანიშვილი 2018:102).

ხიდი ერთ ნაპირს მეორე ნაპირთან აერთებს, რომელსაც კომუნიკაციისთვის, ხალხის აზრით, სხვადასხვა ტიპის არსებები იყენებდნენ. აქედან გამომდინარე, ხიდი ეს არის კიდევ ერთი ადგილი, იმ მრავალ ადგილთა შორის, რომელიც დემონურ და უწმინდურ ნიშნებს ატარებს.

3.2.3. კაკლის ხე

რატომ შეიძლება კაკლის ხე და მისი შემოგარენი იყოს ნაძრახი ადგილი, როდესაც ხალხში გავრცელებული წარმოდგენებით მას სამკურნალო თვისებებიც მიენერება? როცა ბავშვს აქვს ყვიანახველა, ის მიჰყავთ კაკალთან. დედამიწის ზედაპირის მალლა

ამონეული მისი ფესვის ქვეშ ავადმყოფ ბავშვს გაატარებენ და ბავშვიც იკურნება. ამას ადასტურებს არაერთი მასალა ფოლკლორის არქივიდან.

მოქმელი ელზა გორგაძის, 1965 წელს დაბადებული, თქმით მისი დეიდაშვილის შვილს სჭირდა ყივანახველა და ექიმებმა ვერ უშველეს, ამიტომაც ბავშვი გააძვრინეს კაკლის ქვეშ, რის შემდეგაც მას ამ დაავადებამ გაუარა და აღარც შეხვედრია (საკუთარი არქივიდან).

ნ. აბაკელიას აზრით, მრავალი ხალხის, მათ შორის ქართველების ცნობიერებაშიც, ადამიანის სიცოცხლის ციკლი ხშირად ხის სიმბოლიკასთან არის დაკავშირებული, ამიტომაც საქართველოში იყო წეს-ჩვეულება, რომელიც მე-20 საუკუნეშიც კი დასტურდებოდა, რომლის მიხედვითაც, ახალშობილების სახელზე რგავდნენ ხეს და ეს ხე იყო კაკალი, რომელსაც შვილის ჯანმრთელობასა და კეთილდღეობის გამო რგავდნენ დასავლეთ საქართველოში ე.წ. სახვამლო კაკალს ეზოში. ავტორის დასკვნით, კაკლის ხეს დასავლეთ საქართველოში ჰქონდა საკრალური დატვირთვა, რომელსაც სხვადასხვა სნეულებისგან განკურნება შეეძლო, მათ შორის ხველის თავიდან აცილება, „ბატონების“ სახელით ცნობილი სხვადასხვა სახადების მშვიდობით გასტუმრება (აბაკელია 2010).

თუმცა მეორეს მხრივ, აღმოსავლეთ საქართველოში იყო განსხვავებული ტრადიცია. როგორც გივი მდივანმა მიაშობ, მას სოფელ ტყვიავში მცხოვრები დიდი ბებისგან მოუსმენია, რომ კაკლის ხის ქვეშ გავლა არ შეიძლებოდა, რადგანაც იქ ეშმაკები იკრიბებოდნენ, თუმცა ამასთან დაკავშირებით რაიმე სიუჟეტი ვერ გაიხსენა, სამაგიეროდ თამრიკო ვარძიგულოვს, 79 წლისას, სოფელ მუხრანიდან ახსოვდა, რომ კაკლის ქვეშ ეშმაკები იკრიბებიანო. მისი თქმით „მეზობლის ბავშვს, პირველ კალსში რომ ვიყავით იმ კაკლის ქვეშ უნდა გამოევლო და მოეღანდა რაღაცეები და იმ წელიწადს იმ ბავშვმა სკოლაში ვეღარ იარა, რო შეეშინდა ენა ჩაუვარდა. ფულურო იყო იმ კაკალში, ისეთი ფულურო იყო, კაცი რო ჩამჭდარიყო მოტრიალდებოდა“.

კაკლის ხესთან დაკავშირებით, ოდნავ განსხვავებულ ისტორიას იხსენებს ინდირა ვალიშვილი, 1968 წელს დაბადებული. მისი თქმით, ბავშვობაში ერთხელ მამამისი სადღაც ყოფილა წასული, დაჰგვიანებია და დასვენება გადაუწყვეტია, კაკლის ქვეშ

დაუძინია და იქიდან სახლში რომ მისულა, მის ჰატარა ბავშვს, შორენას, დაუნცია ტირილი და მაშინვე კანზე გასჩენია ისეთი წყლულები, თითქოს ადამიანები დამწვარ ხელებს ადებდნენ, ბავში გარდაცვლილა. ამიტომ ბებიამისი სულ ამბობდა, რომ კაკლის ქვეშ ბალახიც კი არ ხარობსო (საკუთარი არქივიდან).

წარმოდგენილი მასალიდან ჩანს, რომ ის სივრცე, რომელიც კაკლის ხეს ეკავა, ნაძრახ ადგილად იყო მიჩნეული.

3.3. ტაბაკონის მთა და აჩხოტის მინდორი დემონოლოგიურ გადმოცემებში

ხალხური ტექსტების მიხედვით, ქაჯების მსგავსად, სხვა სახის ავსულებსა და დემონურ არსებებსაც უყვართ შეკრება, დღესასწაულის მოწყობა და მარულაში ჩაბმა.

გადმოცემების თანახმად, ისინი იკრიბებიან ერთ კონკრეტულ დღეს, კონკრეტულ სივრცეში. თუ სად, როგორ და რა მიზნით იკრიბებიან დემონური არსებები, განვიხილოთ, ერთი მხრივ, იმერეთში, სამეგრელოში, გურიასა და აჭარაში ჩანერილი დემონოლოგიური გადმოცემები და, მეორე მხრივ კი, ხევსურული, ფშაური, თუშური და სვანური გადმოცემები.

სამეგრელოში ჩანერილ მითოლოგიურ გადმოცემებში გვხვდება არაერთი დემონური არსება: როგორიცაა: ოჩოკოჩი, ტყის მეფე, ჭინკა, მიწის კაცი, ჟამი, წყლის დედა, ეშმაკი, მაზაკვალი ანუ კუდიანი და ა. შ (სახოკია 1956:7). აქედან ჩვენ ყურადღებას გავამახვილებთ მხოლოდ მაზაკვალზე ანუ კუდიანზე. თ. სახოკია „ეთნოგრაფიულ ნაწერებში“ წერს, რომ მეგრელების წარმოდგენით კუდიანი, რომელიც აუცილებლად ქალია, ცდილობს გაანადგუროს სიკეთე, ბედნიერება, სილამაზე და ა.შ. მას უყვარს თავისი მსხვერპლის გულის ჭამა. კუდიანი ადამიანის გულს ჭამს მაშინ, როცა ყველას სძინავს. კუდიანები იქცევიან კატებად. ისინი სხვადასხვა ბალახებისგან აკეთებენ მალამოს, რომელსაც ილღიაში ამოისვამენ და მაშინვე გადაიქცევიან ჰაერზე უმსუბუქესად და დაიწყებენ ფრენას. კუდიანების გადაადგილების საშუალებაა მგელი (სახოკია 1956:19).

მეგრული გადმოცემების მიხედვით, მზაკვრებს ჰყავთ უფროსი, რომელსაც როკაპი ჰქვია და რომელიც კუდიანებს აძლევს რჩევებს, აწინაურებს ან ჩამოაქვეითებს მათ. როკაპი არის ბებერი დედაკაცი, გრძელ და შავკბილებიან ჩამოფხავებულ თითებზე გრძელი ფრჩხილები აქვს. ის სულ ერთ ადგილას ზის უძრავად და გარს მსხახურები ახვევია, რომლებიც ატყობინებენ, რა ხდება მისი სამფლობელოს ირგვლივ. მას სასახლე ტაბაკონის მთაზე აქვს (ხალხური სიტყვიერება 1991: 388).

საინტერესოა, რომ იოანე ღვთისმეტყველი, გამოცხადებაში წერს ასეთ რამეს: „ და წამიყვანა მე სულით უდაბნოში, და ვიხილე ქალი, რომელიც ზედ აჯდა წითელ მხეცს, რომელსაც, გმობის სახელით სავსეს, შვიდი თავი ჰქონდა და ათი რქა. ხოლო ქალს ემოსა პორფირი და ძონეული, ოქროთი, პათიოსანი ქვიტა და მარგალიტით შემკული, და ხელთ ეპყრა ბარძიმი, სავსე სიბილწითა და მისი სიძვის უწმინდურებით“ (გამოცხად. 17: 2). აქედან გამომდინარე, შეიძლება დავასკვნათ, რომ როკაპი არის ერთგვარი აპოკალიფსური დედაკაცი, რომლის შესახებ გადმოცემები ჩამოყალიბდა, როგორც უძველესი ტრადიციების, ისე ქრისტიანული რელიგიის გავლენით.

მეგრული ტექსტების მიხედვით, კუდიანების უფროსს აქვს საშინელი გარეგნობა, რომელიც ცოდვის დასს წარმოადგენს. ამავე ტექსტის მიხედვით, ვიგებთ, რომ კუდიანების შეკრების დღეს ჰქვია ჭეჭეთობა ანუ მზაკვრების დღესასწაული, რომელიც ემთხვევა ელიაობის წინა ღამეს (ივლისში), ან სამეგრელოს სხვადასხვა სოფელში მარიამობის წინაღამეს. მზაკვრები მიდიან ტაბაკონის მთაზე ან ცოცხზე ამხედრებულები, ან საწნახელში ჩამსხარნი (ხალხური სიტყვიერება 1991: 389).

გადმოცემების მიხედვით, ტაბაკონის მთაზე კუდიანებს დანთებული აქვთ დიდი კოცონი, რომელზეც ჰკიდია დიდი წყლით სავსე ქვაბი და მასში იხარშება ყველა იმ ადამიანის გული, რომლებიც კუდიანებმა მოკლეს. როკაპთან კუდიანებს მიაქვთ ძღვენი. მისი მინისტრი ძღვენის მიტანისას როკაპს გარეთ გამოშვებულ კბილზე უკაკუნებს. მას შემდეგ რაც როკაპს კუდიანები მართმევენ ძღვენს და მოახსენებენ ვინ რა ჩაიდინა, ისინი მართავენ ნადიმს, რომელსაც როკაპი თავმჯდომარეობს. სუფრაზე ისინი ღვინის ნაცვლად სვამენ ადამიანის სისხლს, ხორცის მაგივრად - ადამიანის გულის მწვადს. მღერაინ, ცეკვავენ და მართავენ ორგიებს (ხალხური სიტყვიერება 1991: 392).

ა. ნადარაია თავის წიგნში წარმოგიდგენს გურიაში გავრცელებულ შეხედულებებს. გურულების წარმოდგენით კუდიანების ღამე ძვ.სტილით 1 ენკენისთვის იყო და ის ემთხვეოდა მცხეთობას. კუდიანების შეკრებას გურულები უწოდებენ **დადევობას**. ისინი იკრიბებიან ერთგვარ ვირტუალურ სამყაროში -ჭაჭავეთში. გურულების წარმოდგენითაც კუდიანების უფროსს როკაპი ჰქვია და მისი საცხოვრებელი ადგილი მიუვალი კლდეებია. ეს ქვეყანა ჭაჭავეთი ზღვისპირას მდებარეობს. ნადარაიას ჩანაწერებიდან ვიგებთ , რომ **დადევობას** კუდიანებს შეკრების კონკრეტული ადგილი არ გააჩნიათ და ისინი იმ ადგილას შეიკრიბებიან, სადაც მათ როკაპი დაიბარებს. თავად როკაპი კი ცხოვრობს გამოქვაბულში და მას იქ ცეცხლი არ უნთია, რადგანაც ავსულებს ცეცხლის ემინიათ (ნადარაია 1980:185-187).

თუ შევადარებთ თ. სახოკიასა და ა. ნადარაიას ჩანაწერებს, დავინახავთ ურთიერთსაპირისპირო აზრს. სახოკიას თქმით, კუდიანებს ცეცხლი უნთიათ ტაბაკონის მთაზე, ხოლო ნადარაიას თქმით, ავსულებს ემინიათ ცეცხლის, ამიტომაც ისინი სახლებში შუა ღამისას, შედიან, როცა ბუხარი ჩამქრალია.

ჯ. ნოლაიდელის ცნობით, როგორც გურიაში, ასევე აჭარაში კუდიანების შეკრების დღეს დადები ჰქვია და ის პირველ სექტემბერს იმართება. მათ მეთაურს კი რომპაპი ჰქვია, იგი მიუვალ კლდეებში ცხოვრობს, ან მთებშია მიჯაჭვული და დადების ღამეს ყველა მაგნე სული მასთან იკრიბება (ნოლაიდელი 1971:136).

გ. ელიავა წიგნში „აბაშისა და გეგეჭკორის რაიონების ტოპონიმია“ განიხილავს ტაბაკონის გორას და წერს, რომ გიორგობის თვეში, მთის გაშლილ თხემზე ეშმაკები ცეკვა - ლხინს მართავენ. ამ დღეს ამოდის მთავარი ეშმაკი როკაპი ქალის სახით, რომელიც ზის მგელზე. იგი ჭაში ცხოვრობს. იქ მიდიან მგელზე შემჯდარი ეშმაკი კაცები და ქალები, რომლებსაც საწნახლები ჰკიდიათ, ამასთანავე თან მიაქვთ მოჭადლოებულ ადამიანთა გულები, ნაწლავები, თმები, ტანსაცმელი და ყრიან ცეცხლისმფრქვეველ ჭაში და მის ირგვლივ იწყებენ ცეკვასა და თამაშს, მართავენ ტაბაკონობას (ელიავა 1977:117).

ზემოთ მოყვანილი გადმოცემების მიხედვით, შეგვიძლია წარმოვიდგინოთ, როგორ გამოიყურება კუდიანების უფროსი, როგორია მათი დღესასწაული, რას აკეთებენ და როდის მიდიან იქ. ერთი შეხედვით, გაურკვეველი რჩება, თუ სად ცხოვრობს

როკაპი, მაგრამ ტექსტების უმრავლესობა მის საბრძანისად ტაბაკონის მთას წარმოგვიდგენს, რომელზეც ავსულთა უფროსი არის მიჯაჭვული.

ხევსურული გადმოცემების თანახმად, კუდიანების შეკრების დღეს „კუდიანთ ნუხრა“ ეწოდება და ის გაზაფხულზე იმართება. ამ დღეს ყველაფერს, თივას, ცხვარს, საქონელს და ა.შ. ჯვარი უნდა გადასახო, ასევე ამ დროს უნდა თქვა : „ჯვარიმც გწერავავ, ჯვარდაუნერიმც ნურა დასჩებითავ“ (ანდრეზები 2009:133).

ანდრეზების თანახმად, კუდიანები ერთმანეთთან ფიცით არიან შეკრულები. სანამ შეკრებაზე წავლენ ბურგზე რაღაცას ისვამენ და ისე მიდიან აჩხოტის მინდორზე (ანდრეზები 2009:134). თუ ადამიანი დარჩება პირჯვარგადაუნერი, მაშინ ანდრეზის თანახმად, მას თხასავით დააბლავლებენ და საქონლის ხის ბეჭს გაუკეთებენ, ან ღვიძლს ამოუღებენ და მის ნაცვლად თხის ღვიძლს ჩაუღებენ (ანდრეზები 2009: 140).

ფშაველთა წარმოდგენით, კუდიანები შეიძლება იყვნენ ქალებიც და კაცებიც (ანდრეზები 2009: 230). სხვა მხრივ, იქაც ისეთივე რწმენა-წარმოდგენები აქვთ კუდიანებზე, როგორც ხევსურებს. დ. ხიზანაშვილი წიგნში „ფშავეთი და ფშაველები“ წერს, რომ „კუდიანთ ნუხრას“ ფშაველები, ისევე როგორც სხვები, ვნების კვირის ოთხშაბათს უწოდებენ. ისინი შეკრების დროს დიდ ნადიმსა და სიმღერა-თამაშობებს მართავენ. კუდიანები ღამით ეშმაკებთან წასასვლელად შემდეგნაირად ეშმაკებიან: საცეცხლურქვეშ, მინაში ინახავენ რაღაც მოჭადლოებულ წამალს, რომელიც ეშმაკებმა მისცეს მათ. ოთხშაბათს დაღამებისას, როცა ადამიანებს უკვე სძინავთ, კუდიანები ამ წამალს წაისვამენ და გადასხდებიან ცოცხებზე და გაფრინდებიან. ფშაველების წარმოდგენით, ჩვეულებრივ ადამიანსაც შეუძლია გაერიოს კუდიანების შეკრებაში, თუ ისიც წაისვამს მათ მოჭადლოებულ წამალს, ისიც კუდიანად გადაიქცევა და კუდიანებზე ვერ გაარჩევნ. ფშაველები, კუდიანობა ღამეს გათენებამდე ოჯახში, ერთ-ერთი, დედაკაცი ადგება უძძრახად, ბამბის რამდენიმე ფთილას ჩამოართავს. დაუვლის ოჯახის წევრებს ლოგინში და ყველას სათითაოდ შეაბამს მარჯვენა ხელის მაჯაზე დართულ ბამბის ძაფს, შემდეგ ჯამში ჩაასხამს წყალს, ჩაყრის ნაკვერჩხალეს და ასეთ წყალს ასხურებს ყველაფერს, ასე ისინი ეშმაკებს იცილებენ თავიდან (ხიზანიშვილი 2018: 99-104).

თუშთა წარმოდგენით, კუდიანები იკრიბებოდნენ დართლოს წინ, კლდეებში. იქ მისასვლელად კუდიანები ისვამდნენ ერბოს და ისე მიდიოდნენ ღორაისხეველთან, თავიანთ უფროსთან (ანდრეზები 2009: 333).

ალ.ოჩიაური „ქართული ხალხური დღეობების კალენდარში“ კუდიანთ წუხრის შესახებ წერს, რომ ის იმართება აღდგომის წინა „ხუთშაბათს“ აჩხოტის მინდორში, სადაც კუდიანი ქალები შავ კატებზე შემსხდრები მიქროდნენ (ოჩიაური 1988:136).

2018 წელს თეთრწყლების ფოლკლორულ ექსპედიციაში რუსიკო ფიცხელაურმა-არაბულმა კუდიანთ წუხრის შესახებ გვიამბო: იგი ტარდება აღდგომის წინა კვირას. არის დიდი ხუთშაბათი, კუდიანთ წუხრა, წითელ პარასკევი. ადრე თურმე აჩხოტის მინდორზე იმართებოდა, „თურმე იქ იკრიბებოდეს ისენი და ეს იციან რო სახლებს მერე დიდ შეშას დასწვენ რო ბოლი და ნაკვერჩხალ გაზდიოდეს, სახლის უკან დაგვარბოლებდეს მერე და გვაძახინებდეს: რო კუდიანებო თავისა შასვითა, თავისა შაჭამეთა, თავისა შაიოთხშაბათეთაო, ჩვენ გვიშველეთაჲ, ჯვარ დაგვწერთაჲ, ბარაქა დაათანეთა, ჩვენს ნაშრომსა ჩვენს სახლ-კარსაო და ავისრევდით იმ ჯოხს და გავჰკრავდით ხევებისკეს“ (თსუფა №31423).

ე. გაბლიანის თანახმად, სვანეთში კუდიანებს უწოდებენ ჰეერეას და სვანების წარმოდგენით, მას შეუძლია ადამიანების გულში ჩახედვა. ის მტრობს ლამაზ ქალებსა და კაცებს, აგრეთვე საქონელს (გაბლიანი 2018: 175).

რა დასკვნის გამოტანა შეიძლება ზემოთ მოხმობილი მაგალითებიდან? პირველ რიგში, დასავლეთ საქართველოში გავრცელებული მითოლოგიური გადმოცემები გვიხატავენ როკაპის გარეგნობას და კუდიანების შეკრების დროს რა ხდება, ხოლო აღმოსავლეთ საქართველოს მთიანეთის გადმოცემები ორიენტირებულია ავი სულებისაგან თავის დაცვის საშუალებებზე, მაგრამ ეს გადმოცემები ერთმანეთს ავსებენ და მთლიანობაში გვექმნება წარმოდგენა კუდიანების შეკრებაზე. კუდიანების შეკრების ადგილი უმეტესად არის ან ტაბაკონის მთა, ან აჩხოტის ველი. რატომ არის ეს ასე? რატომ არის დასავლეთ საქართველოს გადმოცემებში კუდიანთა შესაკრებელი წარმოდგენილი მთაზე?

მ. ელიადე მთასთან დაკავშირებით, წერს რომ მრავალ ხალხში მთა წარმოდგენილია მსოფლიოს ცენტრად და ხშირად მასზე ჯოჯოხეთია წარმოდგენილი. ჯოჯოხეთი, დედამიწის ცენტრი და ზეცის „კარიბჭე“ ერთ ღერძზეა განლაგებული და სწოდებდა ამ ღერძით ხორციელდება ერთი კოსმოსური რეგიონიდან მეორეში გადასვლა (ელიადე 2017: 32). იმას რომ მთა ავი სულების შეკრების ადგილია, ამტკიცებს იაპონური მითოლოგიაც. იაპონური მითოლოგიის თანახმად ქალაქ კიოტოს ჩრდილოეთით მდებარეობს მთა ჰიეი (*Hiei* - 比叡山 *Hiei-zan*), რომელიც, შინტოს რელიგიის თანახმად, მიჩნეულია დემონების საცხოვრისად (https://en.wikipedia.org/wiki/Mount_Hiei).

მაშინ, რატომ არ არის ხევსურულ, თუშურ და ფშაურ გადმოცემებში კუდიანების შეკრების ადგილი მთა და რატომ არის აჩხოტის ველი? ვფიქრობ, ამის მიზეზი არის ის გარემოება, რომ მთა მათთვის არის წმინდა ადგილი, სადაც ბინას იღებენ სალოცავები. მთაზეა წარმოდგენილი სამოთხისებური ადგილები, ის მათთვის საკრალურია, ამიტომაც მათ ცნობიერებაში კუდიანები უნდა შეიკრიბონ მათგან შორს, სადღაც მინდორზე. ამგვარივე რწმენა-წარმოდგენა აქვთ კავკასიის ხალხებს, რომელთა მიხედვითაც კუდიანები, დემონები იკრიბებიან ან მთაზე, ან ველზე. ეს რწმენა-წარმოდგენები, აღწერა ხ. მამისიმედიშვილმა წიგნში „საკრალური ისტორიები“.

იმას, რომ კუდიანების ერთ კონკრეტულ ადგილას იკრიბებიან გავრცელებულია მსოფლიოს მრავალ ხალხში. ყველაზე ცნობილია „ვალპურგის ღამე“, რომელიც იმართება პირველ მაისს და გერმანული ხალხური რწმენით ამ დროს ჰარცის მთის უმაღლეს მზვერვალზე, ბროკენზე, იკრიბებიან კუდიანები და ჯადოქრები, რომლებიც იქ მართავენ დღესასწაულს (https://ka.wikipedia.org/wiki/ვალპურგის_ღამე).

აქვე, უნდა აღვნიშნოთ, რომ იაპონურ მითოლოგიაში, დემონური არსებებს უფრო მეტი სიმძაფრე აქვთ შეძენილი, სწორედ ამიტომაც, ერთ-ერთი იაპონური ლეგენდის თანახმად, ყოველ წელს, იოკაი და ონი, დემონური არსებები, ზაფხულის ღამის პერიოდებში, განსაკუთრებით აგვისტოში, გამოდიან ქუჩებში და მართავენ მსვლელობას, ვინც მათ შეხვდებათ გზაზე, იოკაი მას წაიყვანს, თუ მას არ აქვს დამცავი შელოცვა, რომელზეც წერია: „*KA-TA-SHI-HA-YA, E-KA-SE-NI-KU-RI-NI, TA-ME-RU-SA-KE, TE-E-HI, A-SHI-E-HI, WA-RE-SHI-KO-NI-KE-RI*“ (カタクハヤ, エカセニクリニ,

タメルサケ, テエヒ, アシエヒ, ワレシコニケリ)“. შესაძლებელია იოკაეები სახლშიც მიაღწენ ადამიანებს. დემონური არსებები ქრებიან გამოთენისას (https://en.wikipedia.org/wiki/Hyakki_Yagyō).

ამასთან დაკავშირებით პარალელი სვანური წარმოდგენისა, რომლის თანახმადაც კუდიანებისგან თავის დაცვის საშუალებაა თათრების მიერ გაკეთებული რაღაც ნალოც ტყავში გახვეული ქალაღი, რომელსაც ეძახიან „დუა“-ს. ადამიანები ამას გულზე ატარებენ, მის საწინააღმდეგოდ არსებობს კიდევ შელოცვა (გაბლიანი : 175).

საბოლოოდ, უნდა აღინიშნოს, რომ ქართულ დემონოლოგიურ გადმოცემებს საინტერესო პარალელი აღმოჩნდა იაპონურ თქმულებებთან, რომელიც აქამდე იაპონური ფოლკლორის არცოდნე ადამიანისთვის ცნობილი არ იყო. ეს ფაქტი კიდევ ერთხელ ამტკიცებს, რომ საერთო მოტივები შეიძლება შორეული აღმოსავლეთის ხალხების ფოლკლორშიც აღმოვაჩინოთ.

IV თავი

საიქიოს რეპრეზენტაცია ხალხურ ტექსტებში

4.1. სამოთხის მითოსური სახე ქართულ პოეზიაში

სამოთხე - ადგილი, რომელში მოხვედრაც ყველა მორწმუნე ქრისტიანს სურს გარდაცვალების შემდეგ. იგი დაიკარგა აკრძალვის დარღვევის შედეგად და მხოლოდ მას შემდეგ დაიბრუნა კაცობრიობამ, რაც იესო ქრისტე ჯვარს ეცვა. ხალხურ მესხიერებაში სამოთხისებური ყოფა შემორჩენილია ლექსების სახით. ლექსები აღწერენ იმ სიტუაციებს, რაც სამოთხეში ხდება. ხშირად ეს სიუჟეტები იმდენად სულისშემძვრელია, რომ მისი წაკითხვისას ცრემლიც კი მოადგება ადამიანს, რადგან, ხალხური ტექსტების მიხედვით, არც სამოთხეში არიან გარდაცვლილი ადამიანები მთლიანად ბედნიერი. პირველი კითხვა, ალბათ, რაც გაგვიჩნდება იქნება ის, თუ ბუნების ხიდის გავლის შემდეგ სად ხვდებიან მართლები და როგორ ცხოვრობენ. „სულეთის ლექსის“ მიხედვით, ვინც სამზეს დააკლდება, ერთ ადგილას იკრიბება, როგორც ახალგაზრდა, ასევე მოხუცი, როგორც დედაკაცი, ასევე მამაკაცი, განსხვავება მათ შორის მხოლოდ ისაა, რომ ახალგაზრდები სანთელ-ველაპტრებს ანთებენ, სუფრას შლიან და სუფრასთან უფროსებს პატიუბენ, თვითონ კი გამუდმებით ფეხზე დგანან და გალობენ. გაგვიჩნდება კითხვა, ამ დროს ქალები სად არიან? ისინი ახალგაზრდა ვაჟების მიერ ანთებული სანთლის შუქზე სხდებიან. მართალია სამოთხეში არიან, მაგრამ საერთოდ არ არის მხიარულად ის ცოლ-ქმარი, რომლებიც თავიანთ საყვარელ ადამიანებს დაშორდნენ:

„ახლად გაყრილნი ცოლ-ქმარნი სულეთში გაჩვენდნიანო.

არცა აქვთ თვალთა სინათლე, არც ბაგედ იმლებიანო,

მათ მხილველ ბერნი-მოხუცი მათ ცოდვით იწვებიანო.“

(ხალხური პოეზია 1973:63)

მათზე უფრო ცუდ მდგომარეობაში არიან ის ბავშვები, რომელთაც წუთისოფელი ნაადრევად დატოვეს. ისინი გამუდმებით დაეძებენ დედებს, მშვირები დადიან იქ და დედის ძუძუს გახსენებაზე ისღა დარჩენიათ, რომ მხოლოდ თითები წოვონ. გამვლელ-

გამომვლელებს კი მუხლებზე ეკიდებიან ძახილით: „ დედაო, პური გვჭიანო,“ მაგრამ ისინი

„ ხელსა ჰკვრენ გადააგდებენ, ჩვენ განა დედებ გვეჭიანო?!“

(ხალხური პოეზია 1973: 64)

მაგრამ კიდევ უარეს დღეში არიან ისინი, ვინც უკვე შედარებით წამოზრდილებმა დატოვეს სამზეო, რადგანაც მათი დედები გამუდმებით ტირიან, ეს კი საიქიოში მყოფ მათ შვილებს ცუდად უბრუნდებათ, რადგანაც დედის ცრემლი სამოთხეში წვიმად მისდით შვილებს, ამიტომაც სანამ დედები ტირილს და მათზე გლოვას არ შეწყვეტენ, ისინი ვერასოდეს გაიშრობენ ტანისამოსს.

ვისაც მშობლები ჯერ კიდევ ცოცხალი ჰყავთ და სხვადასხვა მიზეზის გამო მათზე აღრე დატოვეს სააქაო, ისინი ჩუმ-ჩუმად, სხვებმა რომ არ დაინახონ, ისე ტირიან. ლექსი იმასაც გადმოგვცემს, თუ რა მდგომარეობაში არიან იქ მოხუცები.

„ სულეთში ბერნი-მოხუცნი ყავარჯნებს ეძებდიანო,

ყოველ ბედნიერ დღეებში საკლავებს მოეღიანო.

ვისაც მომხსენი არა ჰყავთ, პირუკულმ დასხდებიანო.“

(ხალხური პოეზია 1973:64)

არავინ იცის, რა წესები არსებობს სულეთში, ვის როგორ ასამართლებენ, ან ვინ როგორ უნდა მოიქცეს იქ, ან საერთოდ რა ხდება, როგორც ლექსი „სულეთი“ მოგვითხრობს:

„სულეთს ჯარი ჯნავს ცალა-რქა, ბარაქა მესტუმრეთია.“

(ხალხური პოეზია 1973: 64)

ზემოთ ვახსენეთ, რომ ცოდვიან-მართალთ განარჩევენ, მაგრამ ვინ განარჩევს ვინ სად უნდა წავიდეს, ან ბენვის ხიდის შემდეგ რა ხდება? ამაზე მოგვითხრობს ლექსი „სულეთი“. მას შემდეგ რაც ბენვის ხიდს გადაატარებს მგებრი სულს, იგი აღმოჩნდება სულთქმის ციხესთან, რომლის წვერიც ცამდეა აზიდული, მასში სხედან მოსამართლეები, ბჭეები, რომლებიც გამუდმებით სიმართლეს ამბობენ, მათ ხელში უჭირავთ მაკრატლები და შეუძლიათ ბენვის ხიდი გაჭრან.

„ შავეთში სულთქმის ციხე დგას, წვერ ცამდე მიმდინარია“

(ხალხური პოეზია 1973:64)

ამ ციხეში მსხდომნი ბჭეები, როდესად დაინახავენ მართალ ადამიანს, რომელმაც ობოლი ბავშვები არ მიატოვა და დაბარდა, მას მაშინვე ცხენს შეაგებებენ, ხოლო დედ-მამის დამფასებელს: „ია და ვარდი ფენია“ (ხალხური პოეზია 1973:66).

მართალია ცოდვილი და მართალი ადამიანები განცალკევებით არიან, მაგრამ როდესაც ზეცაში ზარებს დარეკენ, მაშინ ყველანი ერთად იკრიბებიან და იწყება მათი სამსჯავრო. ბჭენი მხოლოდ თითო სიტყვას იტყვიან, მათ შორის კი მღვდელი ხუცობს. სამოთხეში დიდი მინდორია, ამ მინდორზე, როდესაც ნისლი ჩამონვება, იმას ნიშნავს, რომ ცხენ-მხედარნი მივიდნენ იქ, რათა მწყურვალ ცხენებს წყალი დააღვინონ. ამის გარდა სულეთში ვეშა წყარო გამოდის, რომელიც უმამისახლო ადამიანების ცრემლებია. ისინი მათ საყვედრობენ:

„რად შეეცოდვე მიწათა? სამზეოს რაც შვერ, ჩვენია“

(ხალხური პოეზია 1973:67)

სხვა გადმოცემით, სულთქმის ციხის ნაცვლად სულეთში სამი ხე დგას, რომელთა წვერიც ცაშია ასული. მათი ძირებიდან კი წყარო გამოდის, რომელშიც დგას ვერცხლის თასი და თუ იმ თასს აიღებს რომელიმე იქ მყოფი, მისთვის ეს მაღლი იქნება. ამ წყაროსთან მოდიან მხედრები.

„ბევრი მოდგება ცხენ-ჯორი, ძუა-ფაფარი კრულია,

იმაზედ მჯდომი მხედარი, პირს ლახტი დადებულია. „

(ხალხური პოეზია 1973: 68)

მხედრების შემდეგ წყაროსთან ქალები მიდიან, რომელთაც უკან მიჰყვებიან დედ-მამის მაძებარი ყმაწვილები. სულეთში ყველაფერს თავისი ფასი აქვს და რაც არ უნდა გასაკვირი იყოს,

„სულეთში მატყლი, მარილი, თეთრი ხარისა ფასია,

თამბაქო და ბიჭონი ერისა მარგებელია“

(ხალხური პოეზია 1973:68)

კაი ყმებს, რომლებიც ბრძოლის დროს, ან სიბერეში გარდაიცვლებოდნენ, თან აყოლებდნენ თავისსავე იარაღს, მაგრამ საკითხავია, გამოიყენებს კი ის იქ ამ იარაღს? ამ

კითხვაზე პასუხს კარგად სცემს ლექსის „ შავეთში“ ლირიკული გმირი, რომელმაც ეს იარაღი იქ ვერ გამოიყენა. არსებობს წესი, რომელიც უნდა დაიცვას შავეთში შესვლისას ვაჟკაცმა. შავეთის უფროსს სამჯერ უნდა დაუკრას თავი, ის კი გამოარჩევს ნარჩევ ყმებს და შეაჯიბრებს ახლად მისულს.

„ შავეთის მეუფროსესა სამჯერ დაუკარ თავია.

უკლეუბ გამაარჩია, სუ შიგ ნარჩევებ ყმანია.“

(ხალხური პოეზია 1973:68)

შავეთში ხალხი რიგებადაა დანყობილი. შემალლებულ ადგილას დგანან უფროსები, ხოლო ცოტა ქვემოთ ნარჩევი ყმების ჯარი. თუმცა სამოთხისებური ყოფა არც ისეთი კარგია, რადგანაც იქ სულიერის ჭაჭანება არაა, თან ვაჟს, როგორც საიქიოს მომხილველი ჰყვება, თურმე არ ჰქონდა ულვაში, ქალს მისი გიშრის თმა და იქ მყოფთაგანს არც ერთს არ აქვს თურმე თვალი. გარდა ამისა,

„ მოდგება ცხენი-დ მხედარი, სუ ძუა დანასკულია,

მაჰყვება წვრილი ყმანვილი, სუ დედის მაძებარია.“

(ხალხური პოეზია 1973 : 69)

ვახსენეთ, რომ საიქიოში დგას სულთქმის ციხე, ან მის მაგივრად სამი ალვის ხე, მაგრამ კიდევ ერთი ლექსი გვამცნობს, რომ სულეთში დგას თეთრი ციხე, რომლის წვერიც ცაშია, მის ახლოს კი დგას ალვის ხე, რომელსაც ასევე წვერი ცაში აქვს აზიდული და მისგან გამოდის ვეშა წყარო. ამ წყაროდან წყლის დღევანევი კი ყველას არ შეუძლია. ამ წყალს მხოლოდ მადლიანები სვამენ, ცოდვილები კი მწყურვალეები რჩებიან.

„ თეთრი ციხე დგა სულეთში, წვერი ცას მიმდინარია,

მაგანეთ (მოშორებით) ალვის ხეი დგას, ცაში მიუდის წვერია;

ბოლოზედ ვეშა წყარო დის, სასმელად გემნიერია;

მადლიან მავლენ, წყალსა სმენ. ცოდვიან მწყურვილნია“

(ხალხური პოეზია 1973: 70)

სამოთხეში მდგარი სულთქმის ციხე ან სამი ხეან თეთრი ციხე ესხომ არ უნდა გავიაზროთ როგორც სამოთხის ცენტრი, რადგანაც ვიცით, რომ ცენტრი გვხვდება ყველგან. ქაჯავეთში ეს არის სამჯედლო, ადამიანთა საცხოვრისსში-კერია.

ყველაზე უკეთ, ალბათ, სამოთხისებურ ყოფას გადმოგვცემს ლექსი „ შავეთს რა გვიჭირს“. მისი ანალიზისას ცხადად დავინახავთ, რომ სამოთხისებური ყოფა, მართლაც სანატრელია და სულის საცხონებელი, რადგანაც მართალოთ გამუდმებით სანთლის შუქი აქვთ და თეთრი ტირიფის სახლებში ცხოვრობენ, რომლებშიც საკმევლის საუცხოო სუნი დგას, ასევე შიგნით მოსასვენებელი სკამიც დგას, მაგრამ ერთი უცნაურობაა, კარებად სახლებს ცოდვა-მადლი აქვთ შებმული.

„ შავეთს რა გვიჭირს უკლოთა, წინ შუქი გვიდგა სანთლისა.
თეთრი ტირიფის სახლები შიგ კვამლი ბრუნავს საკმლისა.“
სკამ გვიდგა სასვენებელი, კარ გვიბავ ცოდვა-მადლისა“

(ხლხური პოეზია 1973 :70)

სახლში ყოველგვარი ფუფუნებაა. იქ საღვინეებია, რომლებიც სავსეა ნაკურთხი სასმლით, გარდა ამისა ოქროს ტაბაკიც უდგათ. სახლს გვერდით ჩამოუდის ვიცი წყარო, რომელსაც ქალები პირისაბანად იყენებენ. მათ საკუთარი ცხნებიც ჰყავთ, რომლებიც შეუწირავთ მათთვის და რომლებიც სახლის გვერდით უბიათ და თუ საიქიოს რომელიმე კუთხიდან დაიძახებენ ქუდზე კაცს, მაშინვე იქ გაემართებიან. მართალოთ გვერდით უდგანან მოჭაბრეები, რომელთაც წინ იახსარი უდგას თავისი ლახტით.

„ გვერდს მიდგან მოჭაბრეები, აიხსარ უდგა ლახტითა.“

(ხალხური პოეზია 1973: 71)

თუმცა მართალონი იქ მაინც ნატრულობენ მზის სინათლეს.(„თუ მკითხავთ, კიდევ გიამბობთ“)

„შიაყრებიან უკლონი, ნახვას ნატრობენ მზისასა:

მუჭლებს ველარა ჳმარობენ, ნატკივნებს ლოდებისასა,

ვერც თვალებს აჭრევიანებენ დათხრილებს გველებისასა“

(ანთოლოგია 2010:127)

შავეთში შვიდ რიგად არის ჯარი დანყობილი. ცალ-ცალკე იმყოფება დარჩეული, კარგი ქალ-რძალი. თუმცა შავეთში მყოფნი მაინც ჩივიან, მათი საჩივარი არის ის რომ გველებმა შეაწუხეს ისინი და საფლავეები გაუხეთქეს და წყალი ჩასდით. წყალმა კი ბევრ

ვაჟკაცს დაუშალა როსტომისნაირი მხარი და ბევრ ალს შვიდად დაწნული ნაწნავი. (შავათბედ ამოვიარე)

„ შავეთბედ ამოვიარე, შვიდ პიად ისხდა ჯარია,
სულ ცალკე დარჩეულიყო კარგი ქალი და რძალია“

(ხალხური პოეზია 1973: 72-73)

სამოთხეში შესვლა ყველას არ უხარია და ყველა წყნარად არ შედის იქ. შავეთში მიდიან ომის დროს უსამართლოდ დაღუპული გმირები, რომელთაც პროტესტის გრძნობა აქვთ, მაგალითად (ჩილოს წახდენა მტრისაგან) სამოთხეში ერთდროულად შედის მთელი თემი, ჩილოელთა თემი, რომლებიც იქ ჩივილით შევიდნენ იმის გამო, რომ თუშეთი არ მიეშველა მათ და მტრის ჯავრი აჭამა. იქ რა თქმა უნდა მათ ხვდებოდათ საკუთარი თემი და თემიც წყრომას გამოხატავს შემდეგი ფორმით:

„ ჩილოელთ დიაც- ყმანვილნი, ტირილით მოიდისაო,
ჩვენი წახდენის მიზეზით, სისხვაიმც გქონდეთ ღვთისაო!“

(ხალხური პოეზია: 251-252)

გარდა ჩილოელებისა, სულეთში ჩივილით შედიან ღულელებიც (სულეთში ღულეთშვილები), რომლებიც ხევსურებზე ჩიოდნენ, რადგან ისინი არ მიეხმარნენ მათ, რისი შედეგიც სახეზეა. მედგარი ბრძოლის მიუხედავად მტერს მაინც ვერ აჯობეს.

„ სულეთში ღულეთშვილები ჩივილით შამადიოდა:
“მწარ არ გვიჭირეს ჴევსურთა, მარტოთა არ გადიოდა”.

(ანთოლოგია 2010:125)

შესაძლოა არ ვიცით უმეტეს გმირებს რა ჰქვიათ და როგორ ხვდებიან მათ საიქიოში შესვლისას, მაგრამ გამონაკლისებიც არსებობს და ერთ-ერთი ასეთი გამონაკლისია გმირი ობოლა („ხუთშაბათ თენებაზედა“), რომელიც სამოთხეში მიდის და ციხის კარს აღებს, მას წინ ხვდება ამბიკა და მთელი ვაჟკაცთა რჩეული ჯარი. იქ მისულ გმირს შესძახეს, წინ ოქროს სკამი დაუდგედს, გვერდით კი საწლდე. კელაპტარიც აუნთეს და იქ მყოფ ქალებს მიმართეს კარგად ეგლოვათ მოსული ვაჟკაცი. შემდეგ ჩამოთვლიან გმირის გვმირობებს, რადგანაც

„ ნაქნარსა ობოლასას, ვერვინ იქმოდეს სხვანია.“

(ხალხური პოეზია:255-256)

მეორე გამოჩინებისა წიქა (წყალში ჩავარდნა და სიკვდილი), რომელმაც ხელით შეალო ციხის კარები, შესულმა კი იქ მყოფი სწორები გაიწნო და მათ გვერდით დადგა. ჩუამ სიმღერა დაიწყო, ჩალხიამ ბანი მისცა. შატილელმა ვაჟებმა კი სამზეოს გასასვლელი კარები გატეხეს.

„სწორებმ გაიწნა ერთურცი, დასხდა ქორების ჯარია
სამგლოვიართ იმღერეს, ამოდ შამახკრეს ზარია.“

(შანიძე 1931: 217).

ობოლასა და წიქას საიქიოში შესვლას სულაც არ ჰგავს დავითის იქ მისვლას (დავით წიკლაური), რომელიც იქ ხმამაღლა კივილით შევიდა, მაგრამ ვაჟკაცს წინ კელაპტრის შუქი მაინც მიჰყვება. იქ მისულმა სულ დაანგრია ყველაფერი

„სულეთ შავიდა დავითი, ჯმა-მაღლა კივილითაო,
გზას მიუნათებს მოყმესა წინ შუქი კელაპტრისაო,
ციხის სათავეს შამჯდარა, ტოშის ჯმა გამადისაო,
დალენა ციხის კარ-კედი, ნამტვრევებ გარდადისაო.“

(შანიძე 191:219-220)

სიკვდილი გამუდმებით ცდილობს, რომ საიქიოში შეკრიბოს ნარჩევი ვაჟკაცებისგან ჯარი, რომელთაც „ წინით ჩხუტს ჩამუდგამ, კოშკს ჩამურიგებ რვლისასა“(შანიძე 1931:213-214). სამოთხეზე კიდევ უფრო შთამბეჭდავად გადმოგვცემს ლექსი „საიქიოზედ ნანახი სიზმარი“, სადაც ლექსის ლირიკული გმირის ცნობით, მას სამოთხეში აჩვენებს ერთი საყდარი, რომელსაც ასი კარები ება. ოთხი მხრიდან დარეკილი ზარების ხმა კი ცაში აღიოდა. საყდარის ას კარებში იქ მყოფი სულელები შედიოდნენ, ხოლო ანგელოზები ბუღბულისებურად გალობდნენ. საყდარი მორთული იყო ოქროს ვარაყებით:

„ერთი საყდარი მიჩვენეს, კარები ება ასია,
ოთხგან დარეკეს ზარები, ხმა აღიოდა ცაშია,
ყოველი სული შევიდა, ერთი არ დარჩა კარშია,
ანგელოზები გალობდნენ ტურფათ ბუღბულის ხმაშია,
ოქროს ვარაყით მორთულსა საყდარ ვინ დაზდო ფასია,

სულ დაამტკრიეს სამოთხე, გამამიყვანეს კარშია“.

(სახუმარო ლექსები 1880: 10)

სამოთხის შესახებ ხალხური რწმენა-წარმოდგენები ჩაიწერეს ვაჟა-ფშაველამ, ბ. ნიჟარაძემ, მ. ბალიაურმა და ნ. მაკალათიამ. მათი ცნობები სამეცნიერო სივრცეში ყველასათვის კარგად ცნობილია აღარ წარმოვადგენთ ამ ეთნოგრაფიულ მასალას. ალ. ხახანაშვილის აზრით, თუშების რწმენა-წარმოდგენები სამოთხისა და ჯოჯოხეთის შესახებ ჩამოყალიბდა ქრისტიანობის ზეგავლენით. საიქიოს ისინი უწოდებენ სულეთს. სულეთს მფლობელობს „ბატონი“, რომლის წინაშე არაფერი დაიმალება და საიქიოც ისე აქვთ აღწერილი, როგორც გვხვდება ხალხურ ლექსებში, რომლებიც ზემოთ უკვე განვიხილეთ (ხახანაშვილი 1888: N173, 177, 181, 185).

ინგილოების რწმენა-წარმოდგენით, სამოთხის კარზე კუპრის ტბა არის, ზედ ხილია გადებული, რომელზეც ცოდვიანი ვერ გადავა, მართალი კი მარდად გადაივლის. იმის გამოსარკვევად, თუ ვინა არის მართალი და ვინ ცოდვილი, იქ მისულ ადამიანს სამოთხისა და ჯოჯოხეთის პატრონი მას წონის. მართლებს სამოთხეში ყანა უბიბინებთ, იქვე ძოვენ ყოჩებიც. სამოთხეში არის ბევრი ვენახი და ხილი. ყანა იმ ხორბლით ამოსდით, რომელიც გარდაცვალებისას თავთან დაუდგეს, ხოლო ყოჩები ის ყოჩებია, რომლებიც თავიანთ სიცოცხლეში დაუკლავთ ადამიანებს. სამოთხეში წლისა და ორი წლის ბავშვს საკმეველი არ ეკუთვნის. საიქოში არის ერთი რძის ტბა, რომლის შუაშიც თეთრად გადაფოთილი ხე დგას. ზუსტად ამ ხეზე სხედან ეს ბავშვები. როცა მათ მოშივდებათ, მაშინ ხე ჩავა ტბაში, როცა ბავშვები რძის ჭამით გულს იჭერებენ, მაშინ ხე ისევ აიწევა (თაყაიშვილი 1913: 167).

რძის ტბასთან დაკავშირებით უნდა შევნიშნოთ, რომ რძის ტბა გვხვდება ოსურ ცხენშენირვის ტექსტებშიც, როდესაც მიცვალებული შედის საიქიოში, ბარასთირის სამეფოში, ის ნახულობს რძის ტბას. ამასთან დაკავშირებით ხ. მამისიმედიშვილი ფიქრობს, რომ სამოთხეში მზის მაგივრობას წევს რძისფერი ტბა, რომელიც მინდვრის შუაგულში მოჩანს და მის ირგვლივ კი ოქროსქოჩრიანი ბავშვები თამაშობენ (მამისიმედიშვილი 2015: 171).

ლექსი „სიზმრათ ვნახე ედემი“ მოგვითხრობს, თუ როგორაა მოწყობილი ედემი. სამოთხის მომხილველის თქმით, ის არის აღმოსავლეთის მთაში. მის ცაზე არის როგორც მზე და მთვარე, ასევე ვარსკვლავებიც. ბაღში დარგულია ათასნაირი ხილი. ამ ხილთაგან ზოგიც მნიფეა, ზოგიც მკვახე, ზოგიც ჯერ კიდევ ყვავის (შედარება, ზღაპრებში როდესაც მედე ზღაპრის გმირს ან საიქიოში გზავნის ან დავალებას აძლევს ის ნახულობს ზუსტად ასეთ ხეებს). სამოთხეს გარს ახვევია ათასნაირი ფრინველი. იქ არის ტაძარიც, რომელსაც ოქროს არაყი გადმოსდის. ედემში არის ერთი შენობა, რომლის კარშიც ორი გველი აბია. იმ შენობაში თორმეტი ოთახი არის. ის არც ხისგან არის გაკეთებული, არც ფიცრისგან. მას საძირკვლად ქვაც კი არ აქვს. თითო ოთახიდან, თითო წყარო გამოდის (ხალხური პოეზია 1973: 154).

ი. სურგულაძე წიგნში „მითოსი, კულტი, რიტუალი საქართველოში“, ერთ-ერთ თავს ჰქვია „წასულთა და დაბრუნებულთა ნაამბობი“. ამ თავში მას მოჰყავს საიქიოს აღწერის მაგალითი, რომელიც XIX საუკუნეში მწერალ დავით კლდიაშვილს ჩაუწერია. ამ ცნობის მიხედვით საიქიო არის მშვენიერი მწვალე ველი, სადაც მიცვალებულთა სულები, სპეტაკი, თეთრი ცხვრების სახით ძოვენ, ხოლო მწყემსად ანგელოზი უდგათ (სურგულაძე 2002: 406).

ამგვარად, მთიელთა წარმოდგენებში საიქიოს სულეთი, ან შავეთი ეწოდება, ხოლო წმინდა წერილში სამოთხე მოიხსენიება სხვადასხვა სიტყვებით როგორცაა: ზეციური სასუფეველი, ზეცური მამის სახლი, ზეცური იერუსალიმი და ა.შ. სამოთხისებური ყოფა შეიძლება სანატრელია, რადგანაც იქ არის გაშლილი ტრიალი მინდორი, სადაც მუდამ გაშლილია ღვთის ტაბლა და მართალნი ტკბებიან ქრისტესთან ახლოს ყოფნით, ან სულ მუდამ მხიარულობენ, მართავენ ღოღს ან სხვადასხვაგვარ შეჯიბრს, მაგრამ ისინი საბოლოოდ მაინც არ არიან ბედნიერი. გამუდმებით იტანჯებიან ბავშვები, ახლად გაყრილი ცოლ-ქმარი, ან უფროსებიც, რადგანაც მათ არ სურთ სიკვდილი და სამზეოში გასვლა სურთ.

იაპონური მითოლოგიის თანახმად, ტაკამაგაჰარა (高天原, "Plain of High Heaven"), ეს არის სამოთხის ადგილი, სადაც ბინადრობენ ღმერთები. იაპონური წარმოდგენით, ეს ადგილი დედამიწას უკავშირდება ხილით *Ama-no-uki-hashii* (the "Floating Bridge of

Heaven"). შინტოს რელიგიაში, ამე - სამოთხე, არის მაღალი წმინდა სამყარო, კოტამატსუკამის სახლი. შინტური რელიგიის თანახმად, შესაქმის დროს, ნათელი, სუფთა ელემენტები გაიფანტნენ, რათა გადაქცეულიყვნენ სამოთხედ (ame), ხოლო მძიმე ელემენტები გადაიქცნენ დედამიწად (tsuchi), ame იქცა ზეციური ღმერთების სახლად (<https://en.wikipedia.org/wiki/Takamagahara>).

4.2. ჯოჯოხეთის მითოლოგემა ქართულ ფოლკლორში

ჯოჯოხეთის მითოლოგემა ქართულ ხალხურ სიტყვიერებაში როგორც ტექსტების ანალიზმა ცხადყო, ჩამოყალიბდა ქრისტიანული ლიტერატურის ზეგავლენით, რომელიც ზეპირი გზით ვრცელდებოდა. ასეთ ლიტერატურად შეიძლება დავასახელოთ აპოკრიფი „წმიდისა ღმრთისმშობლისაგან კაცთა ცოდვილთა სატანჯველთა ხილვაჲ“, ღვთისმშობელმა საიქიოში იხილა ცეცხლის მდინარე, რომელშიც იტანჯებოდნენ ადამიანები და მათ ცეცხლის მდინარე სხეულის სხვადასხვა ნაწილებამდე სწვდებოდათ. აპოკრიფი მოგვითხრობს იმის შესახებ, თუ როგორ ისჯებიან სხვადასხვა ცოდვის ჩამდენნი. მაგალითად, მევახშეებს ჯოჯოხეთში მატლები ჭამდნენ. იქვე იყო დედაკაციც ჩამოკიდებული ძუძუებით და მას მხეცები ჭამდნენ, პირიდან კი ცეცხლის ალი გადმოსდიოდა. ერთ ადგილას ნახა ცეცხლის ღრუბელი, რომელშიც ადამიანებს ცეცხლისფერი ვეშაპი ისე შემოხვეოდა და სწვავდა, როგორც ხმელ ლერწამს. იქ იტანჯებოდნენ ისინი, ვინც წირვა-ლოცვას აცდენდნენ. ჯოჯოხეთში იდგა ხე, რომელსაც რკინის ტოტები ჰქონდა და მასზე ეკიდნენ ადამიანები, თრჩხილებიდან სისხლი მოსდიოდათ და ენა ცეცხლის ალით ჰქონდათ შეკრული, ისე რომ ვერც სიტყვას ამბობდნენ და ვერც ტიროდნენ. ერთ ადგილას ერთი კაცი ცეცხლში იდგა და სცემდა მას მხეცი და ა. შ (ყუბანიეშვილი 1946:15-19).

ჯოჯოხეთში მოხვედრა, რა თქმა უნდა, არავის სურს. ამიტომაც ადამიანებისთვის უკეთესია, თუ იგი არ იარსებებს. ამ სურვილის გამოძახილი უნდა დავინახოთ ხალხურ ლექსში „დალოცვილმა ქრისტე ღმერთმა“, საიდანაც ვიგებთ, თურმე ქრისტე ღმერთს ცაში დაუდგამს საბერველი და გაუკეთებია რკინის კეტი ჯოჯოხეთის დასანგრევად.

ჯოჯობეთის სამი კუთხის დანგრევის შემდეგ, მეოთხეზე გადასვლისას მას ეშმაკები წინ აღუდგნენ და ღმერთს მისი დანგრევის ნება არ მისცეს.

„დალოცვილმა ქრისტე ღმერთმა ცაში დადგა საბერველი,
გააკეთა რკინის კეტი, ჯოჯობეთის სანგრეველი.
სამი კუთხე დაანგრია, მეოთხესაც მიჰყო ჯელი,
წამაუდგნენ ეშმაკები, ნება არ ასრულდეს შენი,
თუ მეოთხეც დაანგრიე, ლოცვა აღარ იყოს შენი!“

(ანთოლოგია 2010: 22-23).

ხალხური ლექსები ჯოჯობეთურ ყოფას და ცოდვილთა დასჯას შემდეგნაირად აღგვიწერენ: როგორც უკვე ვახსენეთ, ბენვის ხიდის შემდეგ სხედან მართლის მოქმელი ბჭენი, რომლებიც მართლებს სამოთხეში აგზავნიან, ცოდვილებს კი სჯიან (სულეთი), ის აღამიანები, რომლებმაც ტყუილ-უბრალოდ დასაჯეს ქალ-ვაჟნი, მათ ენის წვერს აჭრიან და თან ეუბნებიან: „-რაად ამბობდი მაგასა? ენა დაგიხვდა მტერია.“ ჯოჯობეთში თურმე ცეცხლზე ქვაბები უდგათ, რომელთაგანაც ორთქლი გადმოდის და ვინც ხელით ცოდვას სჩადიოდა, მას ამ ხელს იქ უხარშავენ, შემდეგ კი აჭმევენ: „ნახე რა გემრიელია!“. დედებს, რომლებმაც ობოლი ბავშვები მიატოვეს, უბეში გველი უსვამენ და ჯოჯობეთის იმ ადგილას არიან, სადაც მას ბნელი კარი აქვს.

„დედას ობლების დამყრელსა უბეს ჩაუსხეს გველნია,
ჯოჯობეთისკე გაღმართეს, ჯოჯობეთისჯარ ბნელია,
ეშმაკი გამააყოლეს, რომელიც უფრო ძნელია.“

(ხალხური პოეზია 1973:65)

სამანის ამრევს, ზურგზე გოდრით ჰკიდია კლდე და სულ ეს სიტყვები ესმის: „ რად შეეცოდე მიწასა? ნაწოვ-ნადაგი ჩვენია.“ საიქიოს კედლებს, როცა შუქი დაადგება ეს იმას ნიშნავ, რომ ეს არის უბედურთა ბედი, ხოლო როცა მინდორზე დადებულია ნისლი, ეს ნიშნავს იმას, რომ ეს ნისლი არის ქვრივ-ობლების ცრემლი.

„ნისლი დაიდვა მინდვრებზე, ეგ ქვრივ-ობლების ცრემლია,
შუქი დაადგა კედლებსა, ეგ უბედურთა ბედია.“

(ხალხური პოეზია 1973:65)

ძმამ, რომელმაც ძმას უღალატა ჯოჯოხეთში, თან მისდევს მას ცეცხლი და გენია, ხოლო ქალს, რომელმაც ქმარს უღალატა და რომელიც ამავედროულად ორგული და ცუდი ენის პატრონია, იგი ჯოჯოხეთში სირცხვილისგან თავსაც ვერ სწევს ზემოთ (სულეთსა) (ხალხური პოეზია 1973:66). ხოლო ქალი, რომელიც ქმარს იწუნებს ჯოჯოხეთში “ბაზარგნის“ ჯარს გაჰყვება. ვაჟი, რომელმაც ცოლს უღალატა უარესს შეხვდება. (ზეცას დარეკეს ზარები) (ხალხური პოეზია 1973:67). შვილი, რომელიც დედას ცუდად ექცევა და მამას გარეთ გააგდება იმას რა მოუვა? ბედისწერა აუცილებლად წინ დახვდება და ერთი წლის სავალი გზა მისთვის ნარ-ეკლით მოიფინება, ზედ კი კუპრის ქვაბებ დადგამენ, რომელსაც გენია მოეკიდება და მასში ენას ჩაუდებენ. ვინც ნათლიდედას შესცოდავს, მას სამწვადეს გამოჭრიან, ენის წვერს გაუხვრეტენ და შიგ გაუყრიან დანის წვერს(ბენჯის ხიდზე).

„ნათლიდედის შემცოდველსა გამოსჭრიან სამწვადესა,
გაუხვრეტენ ენის წვერსა, შიგ უყრიან დანის წვერსა.“

(ხალხური პოეზია 1973:71).

როგორ არის ჯოჯოხეთი მონყობილი და სად მდებარეობს იგი, ამას ნათლად გადმოგვცემს ლექსი „გააჩინე ჯოჯოხეთი“, სადაც მთქმელი მიმართავს ღმერთს და ეუბნება, რომ მან ჯოჯოხეთი გააჩინა მიწის შუაში და იგი წარმოუდგენია როგორც უფსკრული, რომლსაც არც კიბე აქვს და არც ძირი და ნაპირი. ის ისეთი ღრმაა, რომ იქიდან მტანჯველთა ხმა ზემოთ არ ამოდის(ხალხური პოეზია 1973:145).

მეორე ლექსი „ჯოჯოხეთის აშენება“, აქ მთქმელი ჯოჯოხეთის გაჩენას ეშმაკს უკავშირებს. თითქოსდა ჯოჯოხეთი ეშმაკმა ააშენა. ის ძალიან ღრმაა და პირი ქვევრივით ვიწრო აქვს და იქ სხვადასხვა ცოდვს ჩამდენი სხვადასხვანაირად ისჯება. მაგალტად, მენისქვილეს პირში სარეკი სჩრია, ფეიქარს-ყელზე ჰკიდია წნეხი, მჭედელს-თავში კვერს ურტყამენ, მღვდელს კი კუპრით აქვს გავსილი წვერი, სამშობლოს მოღალატეს კი პირში მღრღნელი უზის (ხალხური პოეზია 1973: 149-150).

სხვა გადმოცემით, ჯოჯოცეთი სამი დღის სავალზეა და მას კაკლის კარი ჰკიდია (ხალხური პოეზია 1973:152).

(რა იცის წუთისოფელმა) ჯოჯოხეთში შესვლა და იქ გზის გავლა არც ისე ადვილია, ცოდვიანს გზაზე ნარ-ეკალი უფენია, თან აქვე დგას კუპრის ქვევრებიც, რომელშიც დულს და გადმოდს კუპრის ცეცხლი და რომელთაც შენთებული აქვთ გენია. ქვევრებს გარშემო ეშმაკები ჰყავთ მცველებად. ამ ქვევრებში არიან როგორც კაცის მკვლელებიც, ასევე ისინიც ვინც ნათლიას შეურაცხყოფას მიაყენებს. მამა, რომელიც შვილზე შესჩივლებს უფალს და მასზე ეტყვის, რომ ის ცოდვას სჩადის, მაშინ მას ხელს ჰკრავენ და ჩააგდებენ ჯოჯოხეთის ამ ქვევრებში, თან ეშმაკსაც გააყოლებენ და ეტყვიან:

„კარგა შეექე, ეშმაკო, მაგისი სული შენია; მალ-მალ ჩაასხი პირშია ნადული კუპრი ცხელია“. (ანთოლოგია 20010:126)

მოყმე, რომელსაც სააქაოში დიდი ქონება ჰქნდა და ჯოჯოხეთში მოხვდა, იქ მისულს თუმრე ჰკითხეს, იმ ქონებიდან რაც მან დააგროვა თან რა წაიღო? ვაჟი კი დანანებით იტყვის იმას, რომ მშვიდრებს პური არ აჭამა, რომ გაყინული არ გაათბო, რომ ამვლელ-ჩამვლელისთვის კარი არ გაუღია და ნეტა ეს მაინც ექნა, რომ იქნებ „ამთვენი ცოდვების მოქმედსა სულ იმით მაინც მამეგო.“ (ანთოლოგია 2010:124) (ნეტაინ სული მამეგო). ლექსი „საიქიოზედ ნანახი სიზმარი“ გვამცნობს, რომ ცოდვილი ადამიანების ნავთში არიან ჩამსხდარნი და ერთ ადვილას არიან შავ-შავი კაცები, რომელთაც თავზე ნავთი ასხიათ და დაკრეჭილი აქვთ კბილები, ხოლო ხელში უჭირავთ ლახტები.

„აქ დგას ცოდვილთა სული, ჩამჯდარ არს ნავთშია.“

(სახუმარო ლექსები 1880:10)

როგორც მ.ბალიაური და ნ.მაკალათია გადმოგვცემენ, ხევსურების წარმოდგენით ჯოჯოხეთი ბნელი ადვილია, ძალიან ცუდი სამყოფელი. იქ არც სინათლე აქვთ და არც გართობა-გახარება. იქ ცოდვიანების საწამებელია. მათ არც „ხითთ შუქი ადგებათ“, არც სამზეოდან ნალოცი ტაბლა მიუღით. არც კვირაობით „ხითთ ულუფა“ აქვთ გამწვანებული, არ ედგმით ულუფა და ვერც მადლიან მკვდრებში გაერევიან. (მსე 1940:59)

სვანური მასალების მიხედვით, ჯოჯოხეთი მდებარეობს სამოთხიდან მოშორებით და ეს არის ერთი კუნჭული, სადაც განუწყვეტლივ წყვილია. აქ არის ასევე ფისის ტბაც. ეს არის სამყოფელი წაწყმედილი სულებისა. ისინი ვერ ხედავენ ვერც ქრისტეს, ვერც მის

ნათელსა და ტაბაკს. ისე ბნელა, რომ იქ ეერთი მეორეს ვერ არჩევს. ზოგიერთი სვანის აზრით, საკურთხი მათაც მისდით, მაგრამ ყველაფერი უშნო და უგემურია, რადგანაც ბნელში უნდა მოიხმარონ. ზოგის აზრით, მათთვის დამზადებული საკურთხი ქრისტეს განკარგულებით იმ ცხონებულ სულებს ურიგდებათ, რომელთაც ამ ქვეყნად ჭირისუფალი არ ჰყავთ, რომ საკურთხი გაუმზადონ. სვანებს ისიც სწამთ, რომ, თუ ჭირისუფალი საკურთხის ხშირად გაუკეთებს წარწყმედილ, ანუ დაკრგულ სულს, მაშინ ამ უკანასკნელს ქრისტე შეუნდობს ცოდვებს და სამოთხეში გადაიყვანს. ასევე შეიძლება წარწყმედილი სული სამოთხეში გადავიდეს, თუ მართალნი შესთხოვენ მის იქ გადაყვანას ქრისტეს. ხოლო ფისის ტბაში არიან ისინი, ვინც მირონი გატეხა. (ნიჟარაძე 1962: 179) ჯოჯოხეთის სიბნელესთან დაკავშირებით თავის სტატიაში ტ.მახაურს მოჰყავს ერთი მაგალითი რომლის მიხედვითაც, ადამიანი თუ დიდ დანაშაულის ჩაიდენდა, ერთი წელი სიბნელეში უნდა მჯდარიყო. მას ამ ქვეყნად უნდა გამოეცადა ჯოჯოხეთი, რათა განმნდილიყო და იმ ქვეყნად მართალი წასულიყო (მახაური 2011:136)

ბ. ნიჟარაძის ცნობით, სვანებისთვის დიდი ცოდვა არის კაცის მოკვლა და სამან-სამძღვრის არევა. კაცის მკვლელობა იმით, რომ მოკლულის სული მუდამ უკან დასდევს მკვლელს. მკვლელი ცდილობს დაემალოს სადმე, მაგრამ ვერ ახერხებს, რადგანაც ეს ქრისტეს ბრძანებაა. სხვის ადგილების საზღვრების მიმთვისებელი, მომპარავი კი ასე ისჯება: ასეთ კაცს მუდამ ჰკიდია მიწით სავსე გოდორი და გაუჩერებელივ დარბის. საზღვრის პატრონის გარდა, ყველა მიცვალებულის სული მიწით სავსე გოდორს ურტყამს ჯოხს. ამ ცოდვის ჩამდენმა მუდამ უნდა ირბინოს. თუმცა ამ სატანკველისაგან თავის დახსნაც შეიძლება, თუ მიცვალებულის სული ოჯახის წევრს გამოეცხადება და სთხოვს საზღვარი პირვანდელ მდგომარეობაში დააბრუნოს. ცოდვებისთვის როგორიცაა: ქურდობა, მრუმობა, ცილის წამება, პირუტყვის ცემა - შიმშილი, უქმე დღეებში მუშაობა, უმწეო ადამიანის დაჩაგვრა და ა.შ. სასჯელი ასეთი ცოდვებისთვის მსუბუქია. ამ ცოდვების ჩამდენი კაცი საიქიოში იმით ისჯება, რომ ქრისტესთან ახლო მისვლა და იმის აუღებელ ტაბაკთან ჯდომა არ შეუძლია (ნიჟარაძე 1962: 180-182).

ინგილოების წარმოდგენით საიქიოში ლეკები შიშვლები არიან, რადგან შიშვლად იმარხებიან. მხოლოდ სასირცხვო ადგილები აქვთ დათარულ. მათ არც სამელი აქვთ და არც სასმელი. შიმშილისგან გული მისდით, მართალია ქრისტიანებს სთხოვენ ყელ-გამოღებულები საჭმელს, მაგრამ საიქიოში წესად არ არის რაიმეს მიცემა. ამიტომაც ისინი ქრისტიანებს საჭმელს ჰპარავენ. თუ დაიჭირეს, მაშინ ქრისტიანები შორს განდევნიან მათ. ცოდვილი დასაფლავების შემდეგ გაცოცხლდება, ან გალორდება, ან გააფრდება (თაყაიშვილი 1913:167-168).

გარდა ხალხური ლექსებისა და ეთნოგრაფიული ცნობებისა, ჩვენ განვიხილავთ ასევე ზღაპრებს: „უცნაური ძილი“, „უუუუნა მეფე“.

ზღაპარი „უცნაური ძილი“ მოგვითხრობს ერთ კაცზე, რომელსაც სასწაულად დაეძინა. არც მკვდარი იყო და არც ცოცხალი. დიდი ხნის შემდეგ როგორც იქნა გამოთხიზლდა და მოჰყვა მისი თავლით ნანახ საიქიოზე. იქ ის ანგელოზებმა აიტაცეს, მაგრამ ბენვის ხიდთან მისულს მისი ცოდვების ავგაროში გადმოუშალეს წინ. ეშმაკებმა და ანგელოზებმა დაიწყეს ანგარიში. ბენვის ხიდისკენ რომ გაიხედა ზღაპრის გმირმა, დაინახა უფსკრული, რომელზეც ობობების ქსელი იყო გაბმული და რომლისგანაც გუნდა-გუნდად ამოდოდა კვამლი, ისმოდა აურზაური, კვილ-წივილი და ა.შ. შემდეგ გმირი ჰყვება ბენვის ხიდზე შემდგარი, როგორ ჩავარდა ბენვის ხიდიდან და აღმოჩნდა კუპრის ტბაში, სადაც ნაცნობი მეზობელი შეხვდა, რომელიც იდგა ხუცესის ტანზე. იმ ადამიანის ტანზე, რომელიც არიგებდა, როგორ უნდა ეცხოვრა (თაყაიშვილი 1909: 39-41).

ხოლო სხვა ზღაპარი „უუუუნა მეფე“, მოგვითხრობს მეფეზე, რომელიც განცხრომით ცხოვრობდა, მაგრამ თუ ვინმე მასთან თხოვნი მივიდოდა, არავის ეხმარებოდა. უკან უშვებდა მიზეზით ისედაც ბევრი საზრუნავი მაქვსო, მაგრამ მოვიდა მისი აღსასრული და ყველამ ვინც სიცოცხლეში მის გვერდით იყო მიატოვა. ირგვლივ მხოლოდ სულთამხუთავი ეშმაკები დარჩა, რომლებმაც პირში ჩანგალი ჩაუყვეს და სული ამოაცალეს. როდესაც მისი სული ღმერთთან სამსჯავროზე მივიდა, მეფემ მოუყვა მას მთელი მისი ცხოვრების შესახებ. ღმერთმაც უუუუნა მეფის სული სასწორზე შედო. სასწორის მეორე მხარეს ეშმაკებმა მისი ცოდვების ავგაროში შედეს. ცოდვებმა სძლია

და მეფის სულიც წივილ-კივილით წავიდა ჯოჯოხეთისკენ, იქ ადუღებულ კუპრში ჩავარდა და გამოუთმელი ტანჯვით იტანჯებოდა (თაყაიშვილი 1909:141-143).

დასკვნის სახით შეიძლება ითქვას, რომ წარმოდგენები ჯოჯოხეთზე მეტად მრავალფეროვანია, რადგანაც ჯოჯოხეთი ცუდია და რატომ არის ჯოჯოხეთი ცუდი? იმტომ რომ იქ ეშმაკები ბინადრობენ და სადაც ეშმაკია იქ ბოროტებაა. უნდა იტყვას, რომ ჯოჯოხეთის ხალხურ წარმოდგენებში უფრო უკეთა აისახა რელიგიური წარმოდგენები, ვიდრე ეს სამოთხისებურ წარმოდგენებში მოხდა. ხალხმა ჯოჯოხეთზე წარმოდგენებისათვის, რელიგიური ცნობებიდან ბევრი ხალხური ლექსის სიუჟეტისათვის აიღეს ფაბულა, რომლებიც შემდეგ გადაასხვაფერეს, მაგრამ თუ ღრმად ჩავალთ ტექსტის ანალიზისას, მათ შორის მსგავსებას ადვილად შევნიშნავთ. აქვე, უნდა აღვნიშნოთ, რომ სიზმრათ ნანახი საიქიო ცოტათი განსხვავდება ჩვენ მიერ წარმოდგენილი მაგალითებისაგან. მაგალითად, ანდრეზების მიხედვით, საიქიოს მომხილველს ეკრძალება საიდუმლოს განთქმა. საიქიოში დაუშვებელია ქურდობა და ღალატი. ჭრელა მურღუევის თქმით, „კაცსა არცა რა უნდა მაჰპაროო, არ უნდა უღალატოო. უნდა იყო ისეო, თავის შრომითა, თავის წვალეებითაო.“ ამის შემდეგ, როგორც წესი, საიქიოს მომხილველი ჰყვება ცოდვილი ადამიანების გასაჭირს. (ანდრეზები:2009:268).

კავკასიის ხალხთა ეპიკურ ტექსტებში მრავალფეროვანი სცენებით არის წარმოდგენილი საიქიო. ნაწარმოებების მიხედვით, საიქიოში არაერთ გმირს უმოგზაურია. ასეთია ოსური ეპოსის სოსლანი, რომელმაც იმისთვის იმოგზაურა, რომ იქიდან აზა მცენარის ფოთლები ამოეტანა, ამასთან ერთად ნახა საიქიოს მოწყობა. მართალია ცოცხლები იქ ვერ შედიან, მაგრამ როცა ამინონმა(მეკარემ) კარები არ გაუღო ნებით, მან შეამტვრია. „ კარს იქით რომ მოხვდა, ხედავს მის შესახვედრად უამრავი ხალხი მოიწევს, სულ იარაღასხმულნი. იწვევენ სოსლანზე, ემუქრებიან: - შავი დღე დაგიდგეს, სოსლან, ჩვენ ხომ შენ გეძებთ, ახლა სადღა წაგვიხვალ?!- მიიწვევენ სოსლანზე,მაგრამ ვერ სწვდებიან, ხელსაც ვერაფერ უწვდენს.“ (ნართები1977:72).

სოსლანის საიქიოში მოგზაურობა და, ზოგადად, საიქიოს სცენები ოსურ ეპოსში

ქრისტიანული რელიგიის ძლიერ ზეგავლენას ამჟღავნებს. იქ მართალნი ნეტარებენ და ცოდვილნი ტიანჯებიან.

ინგუშური მითოსის მიხედვით, საიქიოში მიმოსვლის უნარს ფლობს ბათოყო შერთუყო. გადმოცემა მას მიაწერს მიცვალებულის სახელზე საკლავის დაკლავის ტრადიციას.

ბათოყო შერთუყომ ორხუსთოელები იხსნა სილარიბისგან, ამიტომაც ის გახდა სახელოვანი. მას შეეძლო ნებისმიერ დროს გამგზავრებულიყო საიქიოში და დაბრუნებულიყო უკან. ინგუშური ნართული თქმულების მიხედვით, ნართ-ერხუსთოელებში ქელეხის გადახდის წესი ბოთოყო შერთუყომ საამკვიდრა.

ინგუშური ნართული თქმულების მიხედვით, ერთ-ერთ ორხუსთოელ გმირს გარდაეცვალა დედა. ორხუსთოელი ძლიერ მწუხარებაში ჩავარდა. ბათოყო შერთუყომ მას უთხრა: თუ გინდა, რომ შენი მწუხარება შეიმსუბუქო და დედაშენსაც დაეხმარო, მაშინ შენი პირუტყვებიდან დაკალი ერთ-ერთი და ის დედაშენს იმ ქვეყნად მიუვა. ორხუსთოელმა ვაჟუკაცმა არ დაუჯერა ბათოყოს და იმის დასამტკიცებლად, რომ რასაც ბათოყო ამბობდა, სიმართლე იყო, ორხუსთოელი გაემგზავრა საიქიოში იმ ადამიანთან ერთად, რომელსაც გმირი ენდობოდა. იმ ქვეყნად ჩასულებმა ნახეს, რომ ბოთოყო სიმართლეს ამბობდა. ორხუსთოელი დარწმუნდა, რომ დედის სახელზე დაკლული პირუტყვი საიქიოში უკლებლივ მიუვიდოდა მიცვალებულს. ამის შემდეგ ჩეჩნებში დამკვიდრდა მიცვალებულის სახელზე პირუტყვის, საქონლის შეწირვის ტრადიცია (далгат 1972:296).

საინტერესოა, რომ იოში ან იოში-ნო-კუნი (Yomi / Yomi-no-kuni (黄泉, 黄泉の国, or 黄泉ノ国) იაპონურ მითოლოგიაში არის მკვდართა მიწა (სიბნელის მიწა). შინტურ მითოლოგიაში მას კოჟიკი (Kojiki) ეწოდება და ეს არის ადგილი, სადაც მიცვალებულები მიდიან გარდაცვალების შემდეგ. თუ ვინმე შეჭამს Yomi-ს ცენტრში, ის უკან, ცოცხლების მიწაზე ვეღარ დაბრუნდება. მიცვალებულთა სამეთვო არ განიხილება როგორც სამოთხე, მაგრამ მას ვერ აღვწერთ როგორც ჯოჯოხეთს, რომელშიც იტანჯებიან ადამიანები თავიანთი ცოდვების გამო. ამ ადგილას მიცვალებულები არიან სამუდამო სიბნელეში,

რაც არ არის დამოკიდებული იმაზე, თუ როგორ იცხოვრეს მათ სიცოცხლეში (<https://en.wikipedia.org/wiki/Yomi>).

მაშასადამე, ჯოჯოხეთი ქართულ ხალხურ პოეზიაში, წარმოდგენილია მეტად მრავალფეროვნად და ეს წარმოდგენები პარალელს პოეზებენ, როგორც აპოკრიფ ტექსტებთან, ასევე კავკასიის ხალხში გავრცელებულ თქმულებებთანაც.

V თავი

„სხვა სამყარო“ ქართულ ხალხურ ჯადოსნურ ზღაპრებში

„სხვა სამყარო“ / „სხვა სამეფო“ უაღრესად თვალსაჩინოა ჯადოსნურ ზღაპრებში. იგი მეტად აქტუალური თემაა. ამ საკითხზე არაერთ მეცნიერს დაუწერია მონოგრაფია თუ სტატი. იმ მრავალრიცხოვან მეცნიერთა შორის, რომლებიც იკვლევენ ზღაპარში „სხვა ქვეყანას“, აღსანიშნია რუსი მეცნიერები ევგენი ტრუბეცკოი და ვლადიმირ პროპი, რომელთაც საკმაოდ ვრცელი გამოკვლევები მიუძღვნეს რუსული ჯადოსნურ ზღაპრებში „სხვა ქვეყნას“. ამ მიღმურ სამყაროს კი მოიხსენიებენ როგორც : „Иное“, „Небывалое“, „Тридцатое“ სახელმწიფოს ან „нового место“-ს სახელით. ტრუბეცკოიმ და პროპმა გამოიკვლიეს რა არის სხვა სამყარო, საიდან იწყება, როგორ არის მონწყობილი, რა საშუალებებით ხდება იქ მისვლა და მთავარი ამ ყველაფერს შორის, რტომ მიისწრაფვის გმირი „მიღმური“ სამყაროსაკენ.

ე. ტრუბეცკოის აზრით, „სხვა“ ქვეყანას ეძებს ყოველდღიური ცხოვრებით დაუკმაყოფილებელი გმირი. ვინ არის ზღაპარში ასეთი პერსონაჟი? ესენი არიან: ლატაკები, შვეინროვებულნი და ნაწყენი ადამიანები, ბოროტი დედინაცვლის სიძულვილის მსხვერპლნი, დის შურიანობის მსხვერპლნი, ძმებისა და საერთოდ ბოროტი უღმობელი ხალხის მსხვერპლნი (Трубецкой 1922: 4-5). თუ დავუკვირდებით ზღაპრებს, დავინახავთ, რომ ეს ეხება არა მხოლოდ რუსულ ზღაპრებს, არამედ ეს მოტივი უნივერსალურია. ამ თემაზე შექმნილია არაერთი ქართული ზღაპარი. მაგალითად, ზღაპარი „სიზმარა“, მოგვითხრობს გერისა და მისი დედინაცვლის დამოკიდებულებაზე, რომ დედინაცვალს არ უყვარს სხვისი შვილები, მას ცუდად ექცევა და პატარა რამის გამოც კი შეიძლება სახლიდან გააგდოს. თუნდაც იმ მიზეზით, რომ გერი დედინაცვალს არ აძლევს სიზმარს.

ზღაპარში ყველაფერი იწყება მაშინ, როცა გმირი გადის სახლიდან და მთავრდება მაშინ, როცა ის შინ ბრუნდება, მაგრამ სად მიდის ის? ე. ტრუბეცკოი წერს, რომ მათ, ზღაპრის გმირებმა, თვითონაც არ იციან სად მიდიან, თუმცა მათ სწორედ ეს იღუ-მალეობა იზიდავთ, ამიტომაც არ იციან სად მიდიან და ზოგჯერ ისიც არ იციან რას ეძებენ. აქედან

გამომდინარე „სხვა“ სამეფოს აქვს სხვადასხვა სახელები და იქ მისასვლელად საჭიროა ოცდაათი დღე და ოცდაათი ღამე, ან ირიბი გზით - სამი წელი, პირდაპირი გზით - სამი საათი, თუმცა პირდაპირ გზაზე სავალი არ არის. კითხვაზე - რა მანძილია ახალ სამეფომდე, ზღაპრის გმირს სამხრეთის ქარი პასუხობს, რომ ფეხით ოცდაათი წლის სავალია, ფრთებით - ათი წლის, ხოლო მისთვის ეს სამი დღის სავალი გზაა. და მაინც, სად არის ეს ქვეყანა? იგი მდებარეობს ქვეყნის დასასრულს, იქ სადაც წითელი მზე ამოდის ლურჯი ზღვიდან. ეს არის მზიანი წყლის ჰორიზონტის ხაზი, ზოლი, ქვეყანა სადაც ღამეს ათევს მზე. ახალ სამეფოში მისაღწევად კი გმირმა უნდა გადალახოს დაბრკოლებები, პირველ რიგში, ეს არის უსასრულო მანძილი, რომელიც აშორებს სინამდვილეს „ჯადოსნურ სამყაროსთან“ (Трубеукой 1922:15-17).

ე. ტრუბეცკოისთვის „სხვა“ სამყარო შეიმეცნება მხოლოდ მისკენ ლტოლვაში, თავად ფაქტში ზეალსვლისა ყოველდღიურობიდან, რადგან ეს ზეალსვლა შეუძლებელია შინაგანი გასხივოსნების გარეშე (ტრუბეცკოი 1991: 63).

ე. ტრუბეცკოის გამოკვლევა მეტად მნიშვნელოვანია, რადგანაც მეცნიერი სხვამს კითხვებს და თვითონვე სცემს ამ კითხვებს პასუხს. ამ თავის, კვლევის, მთავარი კითხვა იყო, გაგვერკვია რა ინვეს მისწრაფებას „სხვა ქვეყნისაკენ“, რატომ უჩნდება გმირს სურვილი დატოვოს თავისი ყოველდღიური ყოფა და წავიდეს იქ საიდანაც ვერ დაბრუნდება. ამასთან დაკავშირებით, ე. ტრუბეცკოი წერს, რომ გმირში „სხვა სამყაროსკენ“ სწრაფვას ინვეს ზიზღი იმ ყოველდღიური ცხოვრებისადმი, რომელშიც არც ნამდვილი სიკეთე არსებობს და არც ბოროტება. იგი გარბის ყალბი სამყაროსგან შორს. გმირი მიისწრაფვის რათა აღმოაჩინოს სინამდვილე. გაივოს ცუდი და კარგი. ეზიაროს მწუხარებასა და სიხარულს. გმირს უმძიმს,, მისთვის აუტანელია ის ყოფა, რომელშიც იმყოფება. ეს წლების მანძილზე გროვდება და გმირი საბოლოოდ სახლიდან მიდის (ტრუბეცკოი 1961 : 60).

ზემოთ თქმულიდან გამომდინარე, შევეცდებით წარმოვადგინოთ, როგორ არის ქართულ ჯადოსნურ ზღაპრებში „სხვა სამყარო“ წარმოდგენილი. თუმცა, ამის კვლევაში, ასევე აუცილებლად უნდა გამოვიყენოთ ვ. პროპის „ზღაპრის მორფოლოგია“, კერძოდ მისი კვლევა მოქმედ პირთა ფუნქციებზე. მე-11 ფუნქციის მიხედვით, გმირი ტოვებს

სახლს, თუმცა ეს წასვლა სულ სხვანაირი წასვლაა და იგი არ ნიშნავს სახლის დროებით დატოვებას. იგი არ ნიშნავს გმირის გზას, მიუხედავად იმისა, მძებნელია იგი, თუ არა. ზოგიერთ ზღაპარში არ გვხვდება გმირის სივრცობრივი გადაადგილება და ყველა მოქმედება ერთ ადგილას ხდება, ზოგჯერ კი პირიქით, გაგზავნა ძლიერდება და მას გაქცევის ხასიათი ეძლევა (პროპი 1984: 82), ხოლო მეორე ფუნქცია, რომლის მიხედვითაც უნდა ვიხელმძღვანელოთ, არის მე-15 ფუნქცია, რაც გულისხმობს შემდეგს: გმირს გადააფრენენ, გადაიყვანენ, მიიყვანენ იქ, სადაც საძებნელი საგანია, რადგან ჩვეულებრივ საძებნელი ობიექტი „მეორე“, „სხვა“ სამეფოშია, რომელიც შეიძლება მდებარეობდეს ან ძალიან შორს ჰორიზონტალურად, ანდა ძალიან ზევით ან ქვევით ვერტიკალურად.

1. ის მიტრინავს ჰაერში
2. იგი მიემგზავრება ხმელეთით ან წყლით
3. ის მიჰყავთ
4. მას უჩვენებენ გზას.
5. იგი იყენებს მიმოსვლის უძრავ საშუალებებს
6. მიდის სისხლიან ნაკვალევზე

(პროპი 1984: 92).

კვლევისათვის გამოვიყენებთ ქართული ხალხური ზღაპრების სამ სხვადასხვა გამოცემას. პირველი ეს იქნება ალექსანდრე ლლონტის, მეორე - თედო რაზიკაშვილისა და მესამე - ელენე ვირსალაძის რედაქტორობით გამოცემული ზღაპრები. სანამ ზღაპრების ანალიზზე გადავალთ, ჩვენ გვჭირდება გეგმა, რის მიხედვითაც უნდა აღმოვაჩინოთ ზღაპარში „სხვა“ სამეფო, ამაში კი უნდა დავიხმაროთ ვ. პროპი, რომელმაც წიგნის „ჯადოსნური ზღაპრის ისტორიული ფესვები“ მე-8 თავში, სხვადასხვა ხალხთა ჯადოსნური ზღაპრის ანალიზის საფუძველზე განხილვა რას წარმოადგენები არსებობს სხვა სამყაროზე და სად მდებარეობს, საიდან იწყება ის.

მისი თქმით, „სხვა“ ქვეყანას მართავს ამაყი და ძლიერი დედოფალი, სადაც ასევე ბინადრობენ ქვეწარმავლები (გველეშაპები). ამ სამეფოში კი ზღაპრის გმირი მიდის მოტაცებული მზეთუნახავის გამოსახსნელად, ან გამახალგაზრდავებელი ვაშლისთვის,

ან უკვდავების წყლისთვის, რომელიც იძლევა მარადიულ ახალგაზრდობას და ჯანმრთელობას, ან უცნაური საგნებისთვის. ეს „სხვა“ სამყარო იწყება გაუვალი ტყით, ან ზღვით, ან ცვეცხლმოდებული მდინარით, რომელზეც აუცილებლად ხიდია გადებული და რომლის ქვეშაც იმალება გველეშაპი, ან ეს არის ქვესკნელი, სადაც გმირი ან ვარდება, ან თავისი ფეხით ჩადის (Пропп 1946:260).

„სხვა სამყაროს“, როგორც დათარულსა და მიღმიურს, სხვადასხვა საფეხურზე მდგომი ადამიანი სხვადასხვანაირად გაიაზრებს. მაგალითად, მონადირისთვის ის სხვანაირად იქნება წარმოდგენილი და მიწის მუშისთვის - სხვანაირად, რადგანაც ადამიანს იმ სამყაროში გადააქვს არა მხოლოდ თავისი ცხოვრების წესი, არამედ მას იქ გადააქვს თავისი ინტერესები და იდეალები (Пропп 1946: 266-276). ჯაღოსნური ზღაპრების მიხედვით, მაინც სად უნდა ვეძებოთ და როგორია სხვა სამყარო?

უკვდავების ვაშლი

პირველი ასეთი ადგილი, სადაც „სხვა ქვეყანას“ ვხვდებით არის ის სივრცე, სადაც მოიპოვება უკვდავების ვაშლი.

ზღაპარი „მეჩონგურე“ მოგვითხრობს იმის შესახებ, რომ ზღაპრის გმირი, რომელსაც სურდა მეფის ასულის ცოლად შერთვა, წავიდა უკვდავების ვაშლის მოსატანად. მან ცხრა მთა გადაიარა და მიაღწა ბაღს, რომელიც ისეთი მაღალი კედლით იყო შემოღობილი, რომ მასზე ჩიტიც კი ვერ გადაფრინდებოდა, ამასთან ბაღს შესასვლელიც კი არ ჰქონდა. მეჩონგურე ამ სანახაობამ ძალზედ დაანაღვლიანა და დაიწყო სიმღერა. მისმა ტკბილმა ხმამ ქვეყნიერება დაატკბო, ირგვლივ ყველაფერმა შეწყვიტა მოძრაობა. მაშინ სალი კლდის კედელიც გაიხსნა და გამოჩნდა ყვავილებით მოფენილი გზა, რომელმაც მეჩონგურე ბაღში მიიყვანა. იქ მან ნახა უკვდავების ვაშლის ხე, რომელსაც მცველად გველეშაპი ჰყავდა (ლლონტი 1975: 21). თუმცა, უფრო მძაფრად აღგვიწერს ამ ადგილს ზღაპარი „დღისით მკვდარი“, რომლის მთავარი პერსონაჟია სოვდაგრის უმცროსი ქალიშვილი, რომელმაც მოისურვა ნატვრის ამასრულებელი ვაშლი, რომელიც მხოლოდ ერთ ბაღში იდგა და ეს ბაღი მდებარეობდა

აღმოსავლეთისაკენ. ამ ბაღს ჰქონდა გველების ღობე, თვითონ ვაშლის ხეს კი მცველად ჰყავდა პირდაღებული ვეშაპები. შუადღეზე მზე რომ მაღლა აინევიდა და დაცხებოდა, გველებსა და ვეშაპებს ეძინებოდათ. იქ მისასვლელად ზღაპრის გმირს ერთი თვე დასჭირდა. იქ მისულს კი შემდეგი სანახაობა დახვდა: ბაღში იდგა ერთადერთი ვერცხლის ხე, რომელსაც ზურმუხტის ფოთლები ესხა, მსხვილ-მსხვილი ვაშლები ერთ მხარეს ლალის ფერი იყო, მეორე მხარეს - ალმასის. მაგრამ ვაშლის მოპარვა იქიდან არც თუ ისე ადვილი აღმოჩნდა, რადგან ვაშლის მოკრეფვისთანავე მთელი გველეით აიშალა, გველეშაპებიც წივილ-კივილითა და ყვირილით გამოეკიდნენ ზღაპრის გმირს. ამასთანავე, რაღაც უცნაური ხმა გაიძახოდა: „გადაყარე ვაშლები, თუ არა დაილუპები!“ (ღლონტი 1975: 31).

ზღაპრების ანალიზმა აჩვენა, რომ ვაშლის ხეს შეიძლება ჩაენაცვლოს ბრონეული, როგორც ეს მოხდა ზღაპარში „გაუცინარი ხელმწიფე“, მაგრამ ეს ადგილი რაიმე განსაკუთრებული თვისებით არ გამოირჩევა. უბრალოდ ვაშლის ნაცვლად ბრონეულის ხე იდგა დევების საცხოვრისში (ღლონტი 1975: 121). მართალია, დევების საცხოვრისი ადამიანთა საცხოვრისისგან განსხვავებული სივრცეა, მაგრამ ქართული ხალხური ჯადოსნური ზღაპრები აგებულია დევებთან ბრძოლის ეპიზოდებზე. დევისგან გამოსახსნელია საცოლფე, დედა, ნატვრისთბალი და სხვ. ჩვენი კვლევის საგანს კი წარმოადგენს ის სივრცე, რომელიც ყოველთვის არ შეგვხვდება ზღაპარში. ხშირად ისე აღმოჩნდება ხოლმე, რომ ერთი განსხვავებული სივრცე, გმირს მეორე სივრცეში გადაიყვანს ხოლმე, რომელიც ასევე „სხვა“ სამყაროდ უნდა მივიჩნიოთ.

ტრიალი მინდორი

ტრიალი მინდორიც გამორჩეული სივრცეა, რომელიც შეიძლება ჩაანაცვლოს ტყემ, თუმცა ქართულ ჯადოსნურ ზღაპრებში ტყე, როგორც „სხვა“ სამყაროს ნაწილი, არ გვხვდება. ზღაპრების მიხედვით, მინდორი განსაკუთრებული სივრცეა. ტექსტების მიხედვით, იქ დგას ტაძარი, რომელშიც მცხოვრები ზღაპრის გმირი აუცილებლად, დღისით მკვდარია და ღამით ცოცხლდება. ტაძარში სუფევს სამოთხისებური ყოფა,

რადგან იქ მცხოვრებ გმირს სუფრა აქვს გაშლილი და რამდენიც არ უნდა ჭამოს, პურ-ღვინოს არაფერი აკლდება. იქ სანთელიც კი თავისით ინთება (ღლონტი 1975:32).

თუმცა შეიძლება ტრიალ მინდორში მდგარი სახლი გამოხატავდეს „სხვა სამეფოს“. მაგალითად, ზღაპარში „ილანკულა“, ტრიალ მინდორში მდგარი სახლი არის ეშმაკების საცხოვრებელი ადგილი. სახლში მშვენიერი ცეცხლი ანთია, სამი შამფური მწვალი თავისით იწვის. სახლის ერთ კუთხეში ტახტი იდგა, კედელზე ერთი ხმალი, ერთი ქელი და ერთ ხელსახოცი ეკიდა (ღლონტი 1975: 93). აქ, როგორც ვხედავთ, ეშმაკების სახლში არის მოჩვენებითი მშვენიერება, ყველაფერი ეფემერულია.

ქაჯების საცხოვრებელ ადგილადაა მინდორში მდგარი სახლი წარმოდგენილი, ასევე ზღაპარში „ხელმწიფის მზეთუნახავი ქალისა“, რომლის გმირი მზეჭაბუკიც ქაჯებს ჰყავთ დატყვევებული, რათა მათ ემსახუროს. თუმცა ჩვენ ამ ზღაპარში ვხვდებით, ამ სივრცის განადგურების ფაქტს. გმირი აკეთებს თავისი თავის მსგავს გამოსახულებას ერთი კონა ჯარჯისგან, რომელსაც აგდებს საკირეში. ამას იგრძნობენ ქაჯები და გმირის საშველად ფიტულს თან ჩაჰყვებიან, თუმცა ისინიც ფიტულთან ერთად იწვიან (ქართული ზღაპრები 1951: 259).

მზის სამეფო

მზის სამეფოში ზღაპრის გმირი ყველაზე ხშირად მიდის, რათა დღისით მკვდარი და ღამით ცოცხალი საქმრო გადაარჩინოს. იქ მისასვლელად ზღაპრის გმირს წლები სჭირდება. იმდენი ხანი უნდა იაროს სანამ მხლებლები არ დაეხოცება, თვითონ კი ტანსაცმელი არ დაეხევა და არ დაგლახაკდება. მზის სამეფოდან კი მოაქვს მზის პირის ნაბანი, რომელსაც შეუძლია მიცვალებულთა გაცოცხლება (ღლონტი 1975:35).

ზღაპარი „მზის ქალი“, მზის სამეფოს ადგილმდებარეობასა და მის აღწერილობას შემდეგნაირად გვაძლევს. ზღაპრის გმირმა, მზის ასულის ქმარმა, მრავალი ქვეყანა გაიარა, მანამ სანამ არ გაათავა სახმელეთო და არ მიაღვა იმ ადგილს, სადაც მზე და მთვარე ერთად იყვნენ. მზის სამეფოს ბალი მშვენიერი რამ იყო, იქ მდგარი ხეებიდან

ზოგი მწვანე იყო, ზოგი მაშნ ყვავდა, ზოგი მაშნ იფოთლებოდა, ზოგს კი ფოთოლი ჩამოსდიოდა. ბაღში მგელი და ელია ერთად არიგებდნენ საჭმელს (ლლონტი 1975:110).

უნდა აღინიშნოს, რომ მზის სამეფოში, შეიძლება არა საცოლვე, ან საქმრო წავიდეს, არამედ ვაჟიც, რათა მამას დაეხმაროს. ამ სიუჟეტზეა აგებული ზღაპარი „ქვადქვეული ვაჟისა“. თუმცა ანსხვავებას ვხვდებით ამ ზღაპარში, სხვა ზღაპრებისგან. აქ გმირი მზის სამეფომდე მიღწევამდე, გადის ისეთ ადგილებს რომლებიც აღჭურვილია საიქიოს ელემენტებით. ასე მაგალითად, ვაჟი მინდორში ნახულობს მეგუთნეებს, რომლებაც გუთნები, უღლებიც, ტაბაკებიც, აპურებიც სულ რკინის აქვთ. ხოცავენ ცხრა უღელ ხარსა და კამეჩს მუშაობით, მაგრამ ერთი ხნულის გავლებას ერთ დღეს ანდომებენ. გასცდება მათ და ერთ მინდორში შეხვდება მეცხვარეებს, რომლებსაც ისეთი ცხვრები ჰყავთ, რომ მატყლი მინაზე დასთრევთ, ამის გამო ცხვრები სიცხით იხოცებიან. მათ გასცდა და ბევრი იარა თუ ცოტა, მიადგა ირემს, რომელსაც ცხვირი მინაზე დაუდვია და რქა ცისთვის მიუბჯენია. ვაჟი ირმის რქებით ავიდა მზის სამეფოში (ქართული ხალხური ზღაპრები 1951:228).

უნდა აღინიშნოს, რომ ირემი თავისი რქებით განასახიერებს მზის სხივებს. მითოლოგიაში მკვლევართა მიერ შენიშნულია, მზისა და ირმის სიმბოლიკის სიღრმისეული იდენტობა. მაგალითად, თარნავაში სიზმარში ნახულობს, რომ მზის ცვრით იბანს პირს, ცხადში კი ირემს მიჰყავს გამოქვაბულში.

წყალი

ზღვის ნაპირი, როგორც ამ ქვეყნისა და იმ ქვეყნის გასაყი წარმოადგენს სხვა სამეფოს. ჯადოსნური ზღაპრის „ირმისას“ მიხედვით, მის ქვეშ ცხოვრობენ დევები (ლლონტი 1975:46). უნდა აღინიშნოს, რომ ეს ეპიზოდი არაა უცხო ოსური ნართების ეპოსისასთვის. ზღვის სამეფოში ცხოვრობენ დონბეთირები, სადაც ოსური ნართების ეპოსის გმირი ახსართაგი, მას შემდეგ მოხვდა, რაც დარაჯობდა ნართების ბაღში მდგარ ვაშლის ხეს, რომლის ყვავილიც ცისფრად ბრწყინავდა და მხოლოდ ერთ ცალ ნაყოფს ისხამდა. ბაღს ირგვლივ ირმის რქების მაღალი ღობე ერტყა. ამ ვაშლის ხის ნაყოფს

მოსაწყვეტად კი სამი ფრინველი მიფრინდა. ერთი ახსართაგმა დაჭრა ისრით, მის სისხლის კვალს გაჰყვა. კვალმა კი ზღვის პირას მიიყვანა (ნართები1977:6). ზღაპარში „ირმისა“, ირმისამაც ზღვის ნაპირზე მგომი ვაშლის ხიდან ვაშლები მოწყვიდა და მხოლოდ ამის შემდეგ ამოვიდა წყლიდან დევი, რომელსაც ირმისა შეებრძოლა.

ზღა ქართული ზღაპრისათვის არ უნდა იყოს დამახასიათებელ, რადგან ზღვა უცხო სტიქია. ის ანტაგონისტია - ქაოსის სიმბოლო, რომელიც უცხოა ქართუ-ლისათვის, თუმცა მაინც გვხვდება ქართულ ფოლკლორში. კერძოდ, თამარის მითოსთან, როდესაც თამარი ებრძვის ზღვას.

„ზღვასაც კადაჰკრა ჩიქილა,
გადააქანნა წყალნია,
შუა ზღვას ჩადგა სამანი,
არ გადმოსცილდეს ცვარია“
(ქართ.ხალხ.საისტ.სიტყ. 1961:206).

ზღვა გვხვდება, ასევე, ამირანის ეპოსში, ყამარის საცხოვრებელი ადგილი არის ზღვაში. მისი კოშკი ცასაა ჯაჭვით გამოკიდებული.

ზღაპარში „მინა თავისას მოითხოვს“, უკვდავების მაძიებელი ბიჭი ბევრი სიარულის შემდეგ მიადგება ზღვის ნაპირს, რომელსაც სამი დღე უარა გარშემო. მესამე დღეს შორს ბრჭყვიალა სარკე დაინახა. ვაჟი მივიდა მასთან და აღმოაჩინა მინის სახლი. სახლს კარი არ ჰქონდა, თუმცა ერთან სახლს პატარა ხაზი ჰქონდა. ხაზთან მივიდა და აღმოჩნდა ზღაპრის გმირი სახლში, სადაც ნახა ლამაზი ქალი, რომელიც შექმნის პირველ დღეს იყო გაჩენილი. ამ ქალთან წლები - წუთებივით გადიოდა. ვაჟი ვერც მიხვდა ისე დაჰყო მასთან ათასი წელი (ლლონტი 1975:81).

მეტად საინტერესო პარალელის გავლება შეგვიძლია იაპონურ მითოლოგიასთან. ხალხის რწმენა-წარმოდგენით წყლის ქვეშ არსებობს დრაკონის სასახლე - Ryūgū-jō (竜宮城, 龍宮城,). ლეგენდის თანახმად, სასახლე აშენებულია წითელი და თეთრი მარჯნისგან, ან მყარი კრისტალისგან. ზოგიერთი ლეგენდის თანახმად სასახლის ოთხი მხარე გამოხატავს წელიწადის სხადასხვა სეზონს. სასახლე მართლაც „სხვა ქვეყანას“ წარმოადგენს, რადგანაც ლეგენდის თანახმად სასახლეში გატარებული დღე

უტოლდება საუკუნეს, რომელიც გადის მის საზღვრებს გარეთ. ამ სასახლეში ცხოვრობენ რუჯინის ოჯახები და მოსამსახურეები, რომლებიც არიან ზღვის დინები (<https://en.wikipedia.org/wiki/Ry%C5%ABg%C5%AB-j%C5%8D>).

იაპონური ზღაპარი ოტოგი ბანაში, რომელიც საფუძვლად დაედო ანიმეს (ანიმაციურ ფილმს) *Urashima Tarō*, მოგვითხრობს იმის შესახებ, რომ პროტაგონისტი ურაშიმა ტარომ- Urashima Tarō (浦島 太郎), რომელიც პროფესიით მეთევზე, გადაარჩინა კუ და დააბრუნა უკან დრაკონის სასახლეში. ამის სანაცვლოდ იგი დაასაჩუქრეს და მისი მსახური და მეუღლე გახდა პრინცესა ოტოჰიმი. ურაშიმას ეგონა, ზღვის სამეფოში რამდენიმე დღე გაატრა და მოინდომა უკან, სოფელში დაბრუნება. უკან დაბრუნებულმა აღმოაჩინა, რომ მისი წასვლიდან 1000 წელი გასულა. ზღვის სამეფოდან წამოსვლისას, პრინცესა ოტოჰიმე მას მისცაა ძვირფასეულობის ყუთი (*tamatebako*). როდესაც ურაშიმა ტარომ ეს ყუთი გახსნა, ის უეცრად გადაიქცა მოხუც ადამიანად ([https://en.wikipedia.org/wiki/Urashima Tar%C5%8D](https://en.wikipedia.org/wiki/Urashima_Tar%C5%8D)). მოცემული ზღაპარი, ეხმიანება როგორც ქართულ ზღაპრებს, ასევე ნართების ეპოსსაც.

საიქიო

საიქიოში იმოგზაურა ზღაპრის „მზის ქალის“ გმირმა ხელმწიფის დავალებით. საინტერესოა, როგორ მიაღწია გმირმა საიქიოში. იქ მისასვლელად მან გააგორა ვაშლი და მიჰყვა მას. ვაშლმა იმდენი იგორა სანამ ერთ მინდორზე არ აღმოჩნდა. იქ გმირს შეხვდა ერთი ირემი, რომელსაც რქები ცას ჰქონდა აწვდენილი. შემდეგ ნახა კლდის შიგნით ება ერთი ხარი, რომელსაც არც საჭმელი ჰქონდა, არც სასმელი, მაგრამ მაინც მსუქანი იყო. გაიარა ცოდაოდენი მანძილი და ნახა, რომ მშვენიერ მინდორზე, სადაც ნიავის ქროლვაზე ბალახი ზღვასავით რელავდა, წყაროები ჩუხჩუხებდა იდგა ერთი ხარი, რომელიც ვერაფერს სვამდა და ჭამდა. იქვე ნახა მღვდელიც, რომელსაც ზურგზე საყდარი ეკიდა და ისე დადიოდა. ამის შემდეგ, ბევრი იარა თუ ცოტა იარა, ნახა ცულის ტარზე ცოლ-ქმარი იწვა და ადგილიც ჰქონდათ დარჩენილი. მათ გაშორდა და ნახა ხარის ტყავზე მწოლარე ცოლ-ქმარი, რომლებიც ჩხუბობდნენ ადგილის გამო. ისინი

ხარის ტყავზე ვერ ეტეოდნენ. ასევე შეხვდა ერთი დედაკაცი, რომელიც კვერცხებისგან კოშკს აგებდა, მაგრამ მიწას ააცდენდა თუ არა მაშინვე ენგრეოდა და ისიც ხელახლა იწყებდა კოშკის შენებას. ნახა კიდევ ერთი დედაკაცი, რომელიც თონეში პურს აცხობდა, ჩააკრავდა ბამბასავიტ ტეთორ პურს და უკან ნეხვივით შავ პურს ირებდა. ნახა ერთი კაცი, რომელიც ხევზე ხიდად იყო გადებული (ლლონტი 1975:111). მსგავსი სიუჟეტები აქვს ზლაპარს „ნაბიჭვრიშვილისა“, რომლის გმირიც ასევე საიქიოში მოგზაურობს. სამოთხეში შესასვლელად მან უნდა გაიაროს ღრანტე ადგილი. იქ მისასვლელად რაშს ერთი ისეთი უნდა დაჰკრას, რომ სამი შოლტი ტყავი ასძვრეს და სამი პირი ტყავი მას ხელებიდან. ცხენი მხოლოდ ამის შემდეგ ავა სამოთხის კართან (ქართული ხალხური ზღაპრები 1951:248-250). ასეთივე სიუჟეტებს ვხვდებით, ნართების ეპოსში, როდესაც სოსლანი მოგზაურობს საიქიოში და ოსურ ცხენშენირვის ტექსტებში. მაგალითად, ბენვისხიდთან მისულ მხედარს ურჩევენ:

„ცხენს მათრახი გადაუჭირე
ისე ძლიერ, რომ ხელისგულზე ტყავი აგასკდეს,
ცხენს კი ბარძაყზე - ხორცი“
(ოსური ზეპირსიტყვიერება 2005:48).

საიქიოში ანუ ქვესკნელში მოგზაურობს ზლაპარის „იამ რა უთხრა ვარდსა, ვარდმა რა უთხრა იასა“ გმირი, რომელიც იქ მოსახვედრად მივიდა ერთ ხესთან. იქ კი ნახა რომ ფასკუნჯის შვილებს არწივი უპირებდა შეჭმას. მან ისინი არწივისგან იხსნა და მადლიერმა ფასკუნჯმაც ერთი დაიჭეჯა და მის ყვირილზე მიწა გაიხსნა და ვაჟი ქვესკნელში ჩაათრინა (ქართული ხალხური ზღაპრები 1951 : 109).

ქვესკნელში მოგზაურობს ზლაპარის „შავ თეიმურაზი, მზე თეიმურაზი და მთვარე თეიმურაზის“ გმირი, შავ თეიმურაზი, რომელიც იქ ძმებმა ჩატოვეს. ქვესკნელიდან ამოსვლის საშუალება არის თხა, თუმცა ზლაპარის გმირის წინ გამოდის სამი თხა: შავი, წითელი და თეთრი. შავ ტეიმურაზმა დაიჭირა შავი თხა, რომელმაც კიდევ უფრო ღრმად ჩააგდო ქვესკნელში. იქ მოხვედრილი გმირი, კი შეებრძოლა გველეშაპს, რომელსაც იქ მცხოვრები ხალხისთვის წყალი ჰქონდა დაკავებული (ხალხური სიბრძნე 1963:91).

სამი სამეფო

ზღაპრების ერთ ნაწილში ვხვდებით სამ სამეფოს, რომელიც წარმოდგენილია სხვადასხვა ლითონების სახით. ზღაპარი „ივანე ცისკრისა“, მოგვითხრობს, რომ ივანე ცისკარი მიდის დევებთან საბრძოლველად, მაგრამ გზაზე მას ხვდება სპილენძის სახლი, რომელიც სპილენძის დევის იყო. ამ სახლის გავლის შემდეგ ნახულობს ვერცხლის სახლს, რომელიც ვერცხლის დევის იყო. შემდეგ ნახულობს ოქროს სახლს (ხალხური სიბრძნე 1963:96). ამ ზღაპარზე უფრო მკაფიოდ და მძაფრად გადმოგვცემს სპილენძის, ვერცხლის და ოროს სახლების/ სამეფოების ამბავს ზღაპარი „ხელმწიფის მზეთუნახავი ქალისა“, რომელიც სახლიდან მიდის, რათა იპოვნოს მზეჭაბუკი. ხელმწიფის ასული პირველად თავის გზაზე შეხვდება რკინის ქალაქს, სადაც ყველაფერი რკინისაა. ადამიანებიც და წყაროებიც. ამ ქალაქიდან გასული გმირი ახლა მივა სხვა ქალაქში, რომელიც სპილენძისაა. იქაც ყველაფერი სპილენძისაა, ადამიანების, წყაროებიც. სპილენძის ქალაქიდან გამოსული მიადგება ახალ ქალაქს, რომელიც ვერცხლისაა. მასშიც ყველაფერი ვერცხლისაა. ვერცხლის ქალაქიდან გასული მივა ოქროს ქალაქში, სადაც, ასევე, ყველაფერი ოქროსაა(ქართული ხალხური ზღაპრები 1951:257). ამ ზღაპრებთან მიმართებით, აუცილებლად უნდა გავიხსენოთ ბერძნული „ხუთი საუკუნის“ მითი, რომელიც მიხედვითაც, პირველი ადამიანები ცხოვრობდნენ ოქროს საუკუნეში, მას მოჰყვა ვერცხლის საუკუნე, რომელიც უფრო უარესი იყო ვიდრე ოქროსი. მის შემდგომ იყო სპილენძის ხანა, რომელიც კიდევ უფრო მძიმე იყო. მეოთხე საუკუნე იყო ნახევრად ღმერთებისა და გმირების მოდგმის, ხოლო მეხუთე და ბოლო საუკუნე იყო რკინის საუკუნე, რომელიც ყველაზე საშინელი იყო(კიკნაძე 2008:42).

სხვადასხვა სივრცეები

ზღაპრებში გამოიყოფა სხვადასხვა სივრცეები, რომლებიც შეგვიძლია გავიაზროთ, როგორც „სხვა ქვეყანა“. ასე მაგალითად, „ფისასოს ზღაპარში“ ვხვდებით ისეთ ეპიზოდს, როდესაც მეფის სამი ქალიშვილის ხელის სათხოვნელად მიდიან: ბუ, მგელი და შავარდენი, თუმცა ისინი თავინთ სამეფოში, მას შემდეგ, რაც ადამიანთა საცხოვრის

გასცდებიან, იქცევიან უმშვენიერეს ვაჟებად (ლლონტი 1975:59). ასეთივე სიტუაცია გვცვდება ზღაპარში „სამი და“, სადაც უმშვენიერესი ჭაბუკი გველემპის სახით ეცხადება ზღაპრის გმირს. სოფლიდან გასვლისას კი განიცდის მეტამორფოზას, იძრობს ტყავს და იქცევა უმშვენიერეს ჭაბუკად. მისი საცხოვრებელი სივრცე ქაჯეთია, სადაც ყველაფერი უკუღმა ესმით და ყველაფერს უკუღმა აკეთებენ. თუ თქვენს წყალი დააქციე, წყალი უნდა მიუტანო. თონე დაამტვრიე- უნდა გაახურო და ა.შ. (ლლონტი 1975: 25).

„სხვა“ სივრცედ, შეიძლება მოგვევლინოს ემმაკთა საცხოვრებელი ადგილი, როგორც ეს ზღაპარში „ემმაკის ლაგამია“. ძუნწი კაცი გადაარჩინს ემმაკს, რომელიც ზღაპრის გმირს წაიყვანს თავის მშობლებთან. მის საცხოვრებელ სახლთან მისასვლელად კი გმირმა გადაიარა საშნელი კლდეები, თუმცა ტანჯვა-წამებით სიარული ღირდა, რადგანაც ემმაკის საცხოვრებელი სულ ოქროთი და ვერცხლით სავსე ოთახებს წარმოადგენდა (ლლონტი 1975: 29). მსგავსადაა მონყობილი არწივის საცხოვრებელი სივრცეც. „ზღაპარი მონადირისა და არწივისა“ მოგვითხრობს, რომ ერთმა მონადირემ გადაარჩინა არწივი, მას უნამლა და სამაგიეროდ არწივმა ის თავის მშობლებთან წაიყვანა. იქ მისაყვანად არწივმა იფრინა სულ ზევით და ზევით. გმირმა იქ მისასვლელად მსხვერპლად საკუთარი ხორციც კი გაიღო, რომელიც არწივს აჭამა. თუმცა არწივის სახლი სულ ოქრო-ვერცხლით სავსე იყო. ასვე იქ იყო თვალ-მარგალიტი და ჩასაცმელ-დასახური.

„სხვა სივრცე“ შეიძლება წარმოდგენილი იყოს კლდეზე. ისეთ კლდეზე, რომელსაც თავი თეთრი აქვს, შუაგული წითელი, ძირი კი შავი. იქ ცხოვრობს ქაჯის ქალი, რომელსაც იმხელა თმები აქვს, რომ მისი თმების სიგრძე კლდის ძირამდე ჩამოდის. მას თმაში ბომის ყავილები აბია (ლლონტი 1975 : 75).

ე. ტრუბეცკოის აზრით, ადამიანური ყოველდღიური ყოფის უღიმღამობა, სადაც „არ იპოვება არც ნამდვილი სიკეთე და არც ნამდვილი ბოროტება“, ადამიანში იწვევს „სხვა სამყაროს“ ნატერას. ზ. კიკნაძე კი „ჯადოსნური ზღაპრის ესქატოლოგიაზე“ საუბრისას წერ: „ ძიება "სხვა სამეფოსი", წარმოადგენს სულიერი ცხოვრების უდიდეს ფასეულობას და აუცილებელ საფეხურს იმ კიბეზე, რომელსაც ხალხური შეგნება წარმართობიდან ქრისტიანობამდე აჰყავს“(კიკნაძე 2017).

„ახალი სამეფოს“ მისაღწევად ზღაპარში აუცილებელია საარაკო გმირობის ჩადენა. „სხვა სივრცეში“ მოგზაურობისას გმირი იძენს მისტიკურ გამოცდილებას. „სხვა სივრცისკენ“ სწრაფვა, სადაც მთავრდება ჩვეულებრივი ქვეყანა და იწყება სასწაულებრივი მზიური ქვეყანა, დამახასიათებელია როგორც ქართული ისე მსოფლიოს ხალხთა ჯადოსნური ზღაპრებისთვის

დასკვნა

ნაშრომის მიზანი იყო ფოლკლორულ ნაწარმოებებში ადამიანთა ჩვეულებრივი საცხოვრებელი არეალისგან განსხვავებული სივრცის განხილვა. ამასთან დაკავშირებით განვიხილეთ სხვადასხვა უანრის ტექსტები. უნდა ითქვას, რომ მითოლოგიური გადმოცემები გადმოგვცემენ ხსოვნას სრულიად განსხვავებული სივრცეების შესახებ, რომელიც პირობითად შეიძლება ორ ჯგუფად დაიყოს: საკრალურ სივრცედ და მის საპირისპირო დემონურ არსებათა სამოქმედო სივრცედ, რომელიც გამოირჩევა ჯოჯოხეთური ელემენტებით.

ქართული ხალხური ლექსები გადმოგვცემენ ადამიანთა ყოფას გარდაცვალების შემდეგ, რაც იმაზე მიანიშნებს, რომ სიკვდილის შემდეგ ადამიანი აგრძელებს ცხოვრებას „სხვა ქვეყანაში“, რომელიც ორ სამეფოდ არის წარმოდგენილი. ერთგან არის ღვთის მეუფება, ხოლო მეორეგან - ეშმაკი ბატონობს. აღნიშნულ ტექსტებს საფუძვლად უდევთ რელიგიური წარმოდგენები. შეიძლება ვივარაუდოთ, რომ მთქმელი სიტუაციის გასამძაფრებლად და ხალხში შიშის დასამკვიდრებლად, უფრო აძლიერებს და ქმნის სასტიკ სცენებს ჯოჯოხეთზე, იმაზე, თუ როგორ დაისჯებიან გარდაცვალების შემდეგ ცოდვილნი.

ზღაპარში გმირის სამოქმედო სივრცე მრავალფეროვანია. მას შეუძლია მოგზაურობა მთელ სამყაროში. მისთვის დაბრკოლება არ არსებობს. რა თქმა უნდა, ზღაპრის სიუჟეტები კონტამინირებულია და რამდენიმე მოტივი, შერწყმულია ერთ ზღაპარში. ამიტომაც, განსხვავებული სივრცე, შეიძლება რამდენჯერმეც კი შეგვხვდეს ერთ ზღაპარში. ასე, მაგალითად, გმირი ჯერ მიდის უკვდავების ვაშლის მოსაკრეფად, შემდეგ ხვდება ტრიალ მინდორზე და ბოლოს მას უწევს ზესკნელში მოგზაურობა, მზის სამეფოში.

ნაშრომის პირველი თავი ეძღვნება ქართულ ლიტერატურულ ძეგლებში ისეთი ეპიზოდების განხილვას, რომლებშიც დასტურდება სამოთხისა და ჯოჯოხეთის მოტივები, საკრალური და მისი საპირისპირო - უწმინდური სივრცე. ჩვენი მიზანი იყო, დაგვეხასიათებინა ასეთი ადგილები და გაგვევლო პარალელები შესაბამის

ფოლკლორულ-მითოსურ სიუჟეტებთან. ძველი ქართული ლიტერატურის ისეთ ძეგლებში, როგორცა არის „წმინდა ნინოს ცხოვრება“, „დავით გარეჯელის ცხოვრება“, „შო მღვიმელის ცხოვრება“, „შუშანიკის წამება“ და „ვეფხისტყაოსანი“, გვხვდება, როგორც ედემის ბალის პარადიგმა, ასევე წმინდა ბერების მიერ პროფანული სივრცის კოსმიზირება. პირვანდელი ე. ი. „მას უამს“ დამყარებული იდეალური სამყაროს გამოძახილი და მისკენ ადამიანების ლტოლვა.

ნაშრომის მეორე თავში ქართული მითოლოგიური გადმოცემების მიხედვით, განვიხილეთ საკრალური სივრცე. ამ თავში აღმოსავლეთ საქართველოს მთიანეთში გავრცელებული გადმოცემები, ანდრეზები გავაანალიზებ. ტექსტებში გამოვყავი ისეთი ადგილები, რომლებიც სივრცობრივად განსხვავდება ადამიანთა ჩვეულებრივი საცხოვრისისგან. კვლევის შედეგად, შეიძლება ითქვას, რომ ასეთი ადგილები ადამიანებისთვის თვალით უხილავია. ადამიანს თავისი დაცემული ბუნების გამო, არ შეუძლია სინმინდეს მიუახლოვდეს. სივრცე ადამიანის „ფეხის ნალისგან“ თავს იცავს სხვადასხვა საშუალებებით. იქნება ეს საფარველის დადება, თუ მნახველისთვის ცეცხლოვანი ხბოს მოჩვენება. მაგრამ რომ არ დაიკარგოს ხალხში ასეთი ადგილების ხსოვნა, ღვთიშვილები გამოარჩევენ საყმოდან წმინდა ადამიანებს და მათ მოახილვინებენ საკრალურ სივრცეს, ზეციურ არსებათა საბრძანისს, სადაც სანთელი თავისთავად ინთება, უფლის აკვანს მტრედები არწევენ და ბერები ერთი პურის ამარა, ერთი დაუღვეველი პურით იზამთრებენ.

ნაშრომის მესამე თავი ეხება დემონურ არსებათა სამოქმედო სივრცეს. ასეთი ადგილების შესასწავლად კი გამოვიყენეთ როგორც აღმოსავლეთ საქართველოს მთიანეთის ანდრეზები, ასევე დასავლეთ საქართველოში გავრცელებული გადმოცემები. უნდა აღინიშნოს, რომ ამ კუთხით ქართული ფოლკლორის პარალელურ ვპოულობთ კავკასიის ხალხის რწმენა-წარმოდგენებთან, მაგრამ საინტერესოა, რომ „კუდიანთ წუხრას“ მსგავსი დღე, რომელიც ევროპაში ცნობილია ვალპურგის ღამის სახელწოდებით, არსებობს იაპონურ ფოლკლორშიც, მართალია, განსხვავებულად, მაგრამ იქ დემონურ არსებათა მოქმედება უფრო მასშტაბურ სახეს იძენს და კუდიანების მსვლელობა თითქმის ერთი კვირის განმავლობაში გრძელდება. მნიშვნელოვანია, რომ

ე. წ. ნაძრახ სივრცედ ხალხურ ტექსტებსა და რწმენა -წარმოდგენებში მიჩნეულია ასევე კაკლის ხე და მისი შემოგარენიც, რასაც ჩემ მიერ ქართლის სოფლებში ჩანერილი ხალხური ტექსტებიც ადასტურებს.

ნაშრომის მეოთხე თავში განვიხილეთ საიქიოს თემა ხალხურ პოეზიაში, რომელიც ვრცლად წარმოგვიდგენს, თუ როგორ პატივს სცემენ უფროსებს იქ უმცროსებს, როგორ ხვდებიან იქ შესულ ვაჟკაცებს საიქიოში მცხოვრებნი და ა.შ. ხოლო ჯოჯოხეთის თემაზე არსებული ხალხური ტექსტები მოგვითხრობენ იმის შესახებ, თუ როგორ ისჯებიან ამა თუ იმ ცოდვის ჩამდენი ადამიანები, რა ელით არა მხოლოდ დედ-მამის შეურაცხმყოფელ შვილებს, არამედ იმათაც, ვინც შვილები მიატოვეს, ძმასა და მირონს უღალატეს. ამქვეყნიური ცოდვის სიმძიმეს კი ცხადად გადმოგვცემს, როგორც ქართული ხალხური პოეზიის ნიმუშები, ასევე ქართული ფოლკლორის სხვა ნიმუშებიც.

ნაშრომის მეხუთე თავში, განხილულია „სხვა სივრცე“ ქართული ჯადოსნური ზღაპრების მიხედვით, რადგან საყოფაცხოვრებო ზღაპრებში გმირის სამოქმედო არეალი მისი საცხოვრისია, განსხვავებით ჯადოსნური ზღაპრისა. ზღაპრების ანალიზმა გვაჩვენა, რომ გმირის სამოქმედო სივრცე ნამდვილად მოიცავს სამ სკნელს. როგორც ე. ტრუბეცკოი მიუთითებს, „ზღაპარში მონმენი ვხვდებით გმირის ზეალსვლისა ყოფითობიდან სასწაულებრივისკენ. მთავარი გმირს მიერ „სხვა სამეფოს“ ძიება წარმოადგენს სულიერი ცხოვრების უდიდეს ფასეულობას და აუცილებელ საფეხურს.“ ის ჩადის ქვესკნელში, ადის მზის სამეფოშიც და მოქმედებს შუასკნელის სივრცეში. ჯადოსნურ ზღაპარში „სხვა ქვეყანა“ შეიძლება წარმოდგენილი იყოს როგორც ქაჯების, ეშმაკების საცხოვრისის სახით, ისე ღვთაებრივი ბალის ან ტრიალი მინდვრის სახით, სადაც მოიპოვება უკვდავების ვაშლი და ის სამოთხის ნიშნებს ატარებს.

გამოყენებული ლიტერატურა

1. აბაკელია 2010: ნ. აბაკელია, სტატია სიცოცხლის ციკლთან დაკავშირებული საკრალური ხის სიმბოლიკა ქართულ მითო-რიტუალურ სისტემაში, ურნალი „სემიოტიკა“, რედ. ც. ბარბაქაძე, თბ., 2010.
<https://semioticsjournal.wordpress.com/2010/08/04/%E1%83%9C%E1%83%98%E1%83%9C%E1%83%9D-%E1%83%90%E1%83%91%E1%83%90%E1%83%99%E1%83%94%E1%83%9A%E1%83%98%E1%83%90- -%E1%83%A1%E1%83%AA%E1%83%9D%E1%83%AA%E1%83%AE%E1%83%9A%E1%83%98%E1%83%A1-%E1%83%AA/>
2. აბულაძე 1963 : რედ. ი. აბულაძე, ძველი აგიოგრაფიული ლიტერატურის ძეგლები წიგნი I (V-Xსს), საქართველოს სსრ მეცნიერებათა აკადემიის გამოცემა, თბ., 1963.
3. ანდრეზი 2009 : ზ. კიკნაძე, ანდრეზი (აღმოსავლეთ საქართველოს მთიანეთის რელიგიურ-მითოლოგიური გადმოცემები), ილია ჭავჭავაძის სახელმწიფო უნივერსიტეტის გამომცემლობა, თბ., 2009
4. ანთოლოგია 2010 : ხალხური პოეზიის ანთოლოგია, შემდგენელი ზ.კიკნაძე და ტ.მახაური, „მემკვიდრეობა“, თბ., 2010.
5. ბიბლია : საქართველოს საპატრიარქო, თბ., 1989.
6. გაბლიანი 2018 : ე. გაბლიანი, ქართული ეთნოგრაფიული მემკვიდრეობა, II, თბ., 2018.
7. გელოვანი 1983 : ა. გელოვანი, მითოლოგიური ლექსიკონი, გამომცემლობა „საბჭოთა საქართველო“, თბ., 1983
8. ელიავა 1977: გ. ელიავა, აბაშისა და გეგეჭკორის რაიონების ტოპონიმიკა, „მეცნიერება“ თბ., 1977
9. ელიაძე 2017: მ. ელიაძე, მარადიული დაბრუნების მითი, „ალეფი“, თბ., 2017

10. ვეფხისტყაოსანი 1957: შ. რუსთაველი, ვეფხისტყაოსანი, „სახელგამი“, თბ., 1957
11. თაყაიშვილი 1909: „ძველი საქართველო“, საქართველოს საისტორიო და საეთნოგრაფიო საზოგადოების კრებული, ტომი I, რედ. ე.თაყაიშვილი. თბ., 1909
12. თაყაიშვილი 1913: „ძველი საქართველო“, საქართველოს საისტორიო და საეთნოგრაფიო საზოგადოების კრებული, ტომი III, რედ. ე.თაყაიშვილი, თბ., 1913
13. თსუფა N 26034: თბილისის სახელმწიფო უნივერსიტეტის ფოლკლორის არქივი
14. თსუფა N 26048: თბილისის სახელმწიფო უნივერსიტეტის ფოლკლორის არქივი
15. თსუფა N 31141: თბილისის სახელმწიფო უნივერსიტეტის ფოლკლორის არქივი
16. თსუფა N 31142: თბილისის სახელმწიფო უნივერსიტეტის ფოლკლორის არქივი
17. თსუფა N 31 423: თბილისის სახელმწიფო უნივერსიტეტის ფოლკლორის არქივი
18. კიკნაძე 2004: ზ. კიკნაძე, მითოლოგია VIII კლასელოთათვის, გამომცემლობა „ლოგოს პრესი“, თბ., 2004
19. კიკნაძე 2007: ზ. კიკნაძე, ქართული ფოლკლორი, თსუ უნივერსიტეტის გამომცემლობა, თბ., 2007.
20. კიკნაძე 2016 I ტ: ზ. კიკნაძე, ქართული მითოლოგია, I ტომი, ილია ჭავჭავაძის სახელმწიფო უნივერსიტეტის გამომცემლობა, თბ., 2016.
21. კიკნაძე 2016 II ტ: ზ. კიკნაძე, ქართული მითოლოგია, II ტომი, ილია ჭავჭავაძის სახელმწიფო უნივერსიტეტის გამომცემლობა, თბ., 2016.
22. კიკნაძე 2017 : ზ. კიკნაძე, სტატია „ჯადოსნური ზღაპრის ესქატოლოგია“, საიტი გეოროიალი, თბ., 2017
23. <http://www.georoyal.ge/?MTID=5&TID=46&id=3392>
24. მამისიმედიშვილი 2015: ბ. მამისიმედიშვილი, ოსური ფოლკლორი, თსუ გამომცემლობა, თბ., 2015
25. მამისიმედიშვილი 2017: ბ. მამისიმედიშვილი, საკრალური ისტორიები, გამომცემლობა „უნივერსალი“, თბ., 2017
26. მამისიმედიშვილი 2018: ბ. მამისიმედიშვილი, სტატია „ნისქვილისა და მენისქვილის მითოლოგემა ზეპირსიტყვიერებასა და მხატვრულ ლიტერატურაში“, ივანე ჯავახიშვილის სახელობის თბილისის სახელმწიფო უნივერსიტეტის ჰუმანიტარულ

მეცნიერებათა ფაკულტეტის რეცენზირებადი ელექტრონული ბილინგვური
სამეცნიერო ჟურნალი, თბ., 2018
<http://www.spekali.tsu.ge/index.php/ge/article/viewArticle/12/123>

27. მახაური 2011: ტ. მახაური, ფოლკლორულ-ეთნოგრაფიული ნარკვევები, წიგნი III, „უნივერსალი“, თბ., 2011
28. ნადარაია 1980: მ. ნადარაია, დემონოლოგიის საკითხავისათვის საქართველოში, მასალები გურიის ეთნოგრაფიული შესწავლისათვის, რედ. გ. ჯანგლაბაძე, „მეცნიერება“, თბ., 1980
29. ნართები 1977: ნართები, თარგმნა მერი ცხოვრებოვამ, გამომცემლობა „ირისთონი“, ცხინვალი, 1977
30. ნიუარაძე 1962: ბ. ნიუარაძე, ისტორიულ-ეთნოგრაფიული წერილი I, თსუ-ის გამომცემლობა, თბ., 1962
31. ნოლაიდელი 1971: ჯ. ნოლაიდელი, ნარკვევები და ჩანაწერები, წიგნი I, ბათუმი, 1971
32. ოჩიაური 1967: თ. ოჩიაური, მითოლოგიური გადმოცემები აღმოსავლეთ საქართველოს მთიანეთში, „მეცნიერება“, თბ., 1967
33. ოჩიაური 1988: ა. ოჩიაური, ქართული ხალხური დღეობების კალენდარი. ხევსურეთი (არხოტის თემი), „მეცნიერება“, თბ., 1988
34. ორბელიანი 1991 : სულხან-საბა ორბელიანი, ლექსიკონი ქართული I, „მერანი“, თბ., 1991
35. ოსური ზეპირსიტყვიერება 2005 : ოსური ზეპირსიტყვიერება, თარგმნეს მერი ცხოვრებოვამ და ნაირა ბეპიევამ, „კავკასიური სახლი“, თბ., 2005.
36. პროპი 1984: ვ. პროპი, ზღაპრის მორფოლოგია. გამომცემლობა „მეცნიერება“. თბ., 1984
37. სახოკია 1956: თ. სახოკია, ეთნოგრაფიული ნაწერები, სამეცნიერო-მეთოდური კაბინეტის გამომცემლობა, თბ., 1956
38. სახუმარო ლექსები 1880: სახუმარო ლექსები; სიმღერები და სიმშრათ ნანახი საიქიო, სტამბა ა. მელიქ-შახნაზაროვისა, თბ., 1880

39. სირაძე 1982: რ. სირაძე, სახისმეტყველება (საუბრები ესთეტიკაზე), პირველი გამოცემა, „ნაკადული“, თბ., 1982
40. სირაძე 1987: რ. სირაძე, ქართული აგიოგრაფია, „ნაკადული“, თბ., 1987
41. სირაძე 2000 : რ. სირაძე, ქართული კულტურის საფუძვლები, უნივერსიტეტის გამომცემლობა, თბ., 2000.
42. სურგულაძე 2002: ირ. სურგულაძე, მითოსი, კულტი, რიტუალი საქართველოში, თბ., 2002.
43. ტრუბეცკოი 1991 : ე. ტრუბეცკოი, თარგმანი ზ. კიკნაძისა, ჟურნალი „სკოლა და ცხოვრება“ N8, გამომცემლობა „სამშობლო“, თბ., 1991
44. ქართლის ცხოვრება 1973: ქართლის ცხოვრება, ტ. IV, ბატონიშვილი ვახუშტი, აღწერა სამეფოსა საქართველოსა, „საბჭოთა საქართველო“, თბ., 1973.
45. ქართული პროზა 1981: წიგნი I, „საბჭოთა საქართველო“, თბ., 1981
46. ქართ. ხალხ. საისტ. სიტყვ. 1961 : შემდგენელი ქს. სიხარულიძე, ქართული ხალხური საისტორიო სიტყვიერება. საქართველოს სსრ მეცნიერებათა აკადემიის გამომცემლობა, ტომი I, თბ., 1961
47. ქართ. ხალხ. საისტ. სიტყვ. 1964: შემდგენელი ქს. სიხარულიძე, ქართული ხალხური საისტორიო სიტყვიერება. საქართველოს სსრ მეცნიერებათა აკადემიის გამომცემლობა, ტომი II, თბ., 1964
48. ქართული ხალხური ზღაპრები 1951: რედ. თ. რაზიკაშვილი, ქართული ხალხური ზღაპრები, საქართველოს სსრ განათლების სამინისტრო, საბავშვო და ახალგაზრდობის ლიტერატურის სახელმწიფო გამომცემლობა, თბ., 1951
49. ქოროლლი 2003: ქოროლლი, აზერბაიჯანული ხალხური ეპოსი, აზერბაიჯანულიდან ქართულ ენაზე თარგმნა ზეზვა მედულაშვილმა, გამომცემლობა „კავკასიური სახლი“, თბ., 2003
50. ქურდოვანიძე 2011: თ. ქურდოვანიძე, ქართული ფოლკლორის პოეტიკა, გამომცემლობა „მწიგნობარი“, თბ., 2011
51. ღლონტი 1975: ალ. ღლონტი, ქართული ზღაპრები, გამომცემლობა „განათლება“, თბ., 1975

52. ყუბანიშვილი 1946 : სოლ. ყუბანიშვილი, ძველი ქართული ლიტერატურის ქრესტომათია I ტ, სტალინის სახელობის თბილისის სახელმწიფო უნივერსიტეტის გამომცემლობა, თბ., 1946
53. შანიძე 1931: ა.შანიძე, ქართული ხალხური პოეზია I, ხევსურული, სახელმწიფო გამომცემლობა, თბ.,1931
54. ჩიქოვანი 1947: მ. ჩიქოვანი, მიჯაჭვული ამირანი, სტალინის სახელობის თბილისის სახელმწიფო უნივერსიტეტის გამომცემლობა, თბ., 1947
55. ჩოლოყაშვილი 2004: რ. ჩოლოყაშვილი, უძველეს რწმენა-წარმოდგენათა კვალი ხალხურ ზღაპრულ ეპოსში, გამომცემლობა „ნეკერი“, თბ., 2004
56. ჭავჭავაძე 2007: ი. ჭავჭავაძე, გამომცემლობა „საქართველოს მაცნე“, თბ., 2007
57. ხალხური პოეზია 1972: ქართული ხალხური პოეზია, I, „მეცნიერება“, თბ., 1972
58. ხალხური პოეზია 1973: ქართული ხალხური პოეზია, II, „მეცნიერება“, თბ., 1973
59. ხახანაშვილი 1888: ალ. ხახანაშვილი, გაზეთი „ივერია“, N173, 177, 181, 185, თბ., 1888
60. ხალხური სიბრძნე 1963: რედ. ე. ვირსალაძე, ხალხური სიბრძნე, I ტ, გამომცემლობა „ნაკადული“, თბ., 1963
61. ხალხური სიტყვიერება 1991 : მეგრული ტექსტები, ტ.II, ტექსტები შეაგროვეს კ. დანელიამ და ა. ცანავამ, „თბილისის უნივერსიტეტის გამომცემლობა“, თბ., 1991
62. ხიზანაშვილი 2018: დ. ხიზანაშვილი, ფშავეთი და ფშაველები, შემკრებელი ტ.მახაური, საქართველოს პარლამენტის ეროვნული ბიბლიოთეკა, თბ., 2018
63. Далгат 1972: У.Б.Далгат, Героический Эпос Чеченцев и Ингушей, „Наука“, Москва, 1972
64. Пропп 1946 : В. Я. Пропп, Исторические Корни Волшебной Сказки, Ленинград, 1946
65. Трубецкой 1922: Е. Трубецкой, Иное царство и его искатели в русской сказке, Москва, 1922

Ivane Javakhishvili Tbilisi State University
Faculty of Humanities

Master's programme: Georgian Literature

Salome Sukhiashvili

„The Other World” in Georgian Folklore

The work is represented to obtain the degree of MA of Georgian Literature

Supervisor: **Khvtiso Mamisimedishvili**,
Doctor of Philology,
TSU Associated Professor

Tbilisi
2019